

**NATIONAL ASSEMBLY OF
SEYCHELLES**

Tuesday 19th March 2024

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble e nou piblik e en byenveni spesyal pour nou bann viziter ki dan Galeri ki sorti dan distrik Grand Anse Mahe.

Mersi zot tou pour zwenn nou, pour sa lazournen travay e byenveni bann Manm pour zot deliberasyon. Avan nou pran bann *item* lo *Order Paper*. Mon le pran laparol pour fer remark lo de size.

Premye i lo prosedir pour apel zofisye dan Staz Komite, lo en Mosyon. Apre konsern ki'n ganny leve dan Lasanble semenn pase enkli bann lakizasyon malapropo lo Speaker e Sekretarya Lasanble, mon le adres sa prosedir.

E sa i aplike pour Lasanble apel zofisye teknik dan Staz Komite lo en Mosyon ki lo *Floor*. Mon le asir tou dimoun konsernen avek Lasanble e manm piblik ki prosedir nou'n swiv semenn pase i annord e i pa'n en manipilasyon regilasyon.

Standing Order i fer provizyon ki Manm i kapab demann Lasanble, pour al dan Staz Komite pour konsider en size ki devan zot, ler i neserer.

Manm i kapab demann en Mosyon pour sispann Lasanble, pandan ki i annan e Mosyon pour konsider en size an relasyon avek deba lo Lasanble.

Sa Manm i bezwen fer sa ler i annan laparol lo sa Mosyon. Apel en zofisye pour vin devan Lasanble pour eksplik en regilasyon oubyen en program, i fer parti konsiderasyon en Mosyon. E i en privez ki Lasanble, in servi plizyer fwa.

An sa ki konsern Speaker, *Standing Order* i dir ki Speaker i kapab pa aksepte pour sispann Lasanble, si i war ki sa i en labi lo prosedir Lasanble.

Mon war ki apel en zofisye pour vin adres Lasanble lo en size ki devan zot, i an totalman annord avek prosedir Lasanble.

Manm i annan drwa pour demann sa zofisye pour eklersi

size ki devan zot, permet Manm al pli byen konpran ki annan dan en mezir e ed zot fer zot desizyon lo sa size.

Mon war ki lo en size koman en *S.I.* i byen, ki Manm i pran tou mwayen pour eklersi sa ki i annan ladan. En *S.I.* i en morso Lalwa, i en seri regilasyon ki kontrol en fonksyon Gouvernman pour *quash* li.

I en aksyon ase serye, ki i pa met an kestyon ki mannyer en fonksyon Gouvernman i marse.

Alor mon rezet lakizasyon ki'n ganny fer, konmkwa Speaker oubyen Sekretarya ti annan kek konplisite dan apel bann zofisye Lotorite Por dan Lasanble semenn pase.

Si en kote Lasanble i annan lentansyon apel en zofisye, i byen ki zot deside ki zofisye e fer sir ki sa zofisye i kapab vin dan Lasanble.

Sa i nesaser pour nou kapab kontinyen avek sa Mosyon, san anvoy li pour en lot zour. Speaker i demann Sekretarya pour apel sa zofisye, zis apre ki Mosyon pour apel zot in pase dan Lasanble.

Savedir si Manm i aranze pour en zofisye, se ler Sekretarya i apel li ki sa zofisye i kapab vin dan Lasanble. Be selman i annan en keksoz ki

mon krwar nou kapab fer pli byen dan sa prosedir. Mannyer i ete la konmela i kapab - i vin koman en sirpriz, sirtou pour bann Manm Lopoziyon. Sa mon krwar i pa nesaser, prosedir Lasanble i devret otan transparan ki posib.

Alor mon'n demann *Deputy Whip LDS* Onorab Esparon, pour fer mwan konnen si zot annan lentansyon apel zofisye an relasyon avek lot Mosyon, pour anil en *S.I.* ki lo *Order Paper* sa semenn. E Onorab Esparon in konfirman avek mwan ki wi. Alor mon fer tou Manm konnen ki mannyer sa pour pase.

Bon, sa i mon deklarasyon lo prosedir Lasanble, pour apel en zofisye pour vin dan Lasanble pandan en Mosyon.

Mon lot pwen, i konsernan bann alegasyon dan Lasanble e konplent ki mon resevwar akoz sa. Lasanble – bon sa mon adres sa, akoz mon krwar i osi konsern bon deroulman e osi limaz Lasanble ki nou bezwen prezerve.

Lasanble i ekspekte ki Manm pa fer okenn deklarasyon ki zot pa kapab zistifye, oubyen ki zot konnen i fo. Mon pa konsider li koman mon rol, koman Speaker pour mwan koriz Manm lo bann *statement* ki zot fer.

E - me solman mon bezwen met a zot latansyon ki mon ganny lobzekasyon e konplent sorti kot dimoun ki konsernen, ler en Manm i dir en keksoz ki pa korek.

I nesese ki Manm i pran zot responsabilite pour zot fer sir ki sa ki zot dir i korek e zistifye. Mon'n ganny lobzekasyon lo deklarasyon Onorab Uranie semenn pase, ki Digwa i bezwen peye pour antre Linyon Estate La Digue.

E swivan kominikasyon ki mon'n fer, avek zofisye ansarz Linyon Estate, mon bezwen dir ki *statement* mannyer Uranie ti'n met li, pa ti reflekte laverite.

Resaman - resaman mon'n osi ganny kominikasyon sorti kot *Chairman Board SBC*, ki ti obzekte serten deklarasyon ki Onorab *Leader* Lopoziyon ti fer. Konmkwa enn ki *SBC* i anba kontrol Legzekitiv e de ki *SBC* ti'n fini deside pour akoursi program parti politik sorti 13 minit pour vin 6 minit.

Mon'n met *Leader* Lopoziyon okouran obzekasyon *SBC*. Sa bann lobzekasyon i ordinerman vin kot mwan koman demann pour Drwa Repons, *Right of Reply* parey i dir anba Konstitisyon.

Mon le eksplike pour Manm e osi pour piblik, ki *Right of Reply* dan Konstitisyon i

akorde an relasyon avek liminite ki Manm Lasanble i annan ler zot koze dan Lasanble.

Liminite i vedir ki manm piblik pa kapab pourswiv en Manm Lasanble Ankour pour en keksoz ki Manm in dir ki fer li ditor, oubyen ki afekte li negativman. Alor Konstitisyon i donn li sa Drwa Repons.

Me sa i aplik pour en dimoun ki'n ganny afekte personnelman. I pa la pour en Lotorite oubyen en antite koriz en keksoz sak fwa ki en Manm i dir ki i pa korek.

Petet *Standing Orders Committee*, i bezwen reget sa pwenn si i annan en neseseite pour fer prosedir kot sa i kapab arive. Me pour lemoman se koumsa ki mon pe enterpret sa *Right of Reply*.

Bon, sa i mon de remark en dernyen pti pwenn, lo *Order Paper* mon le zis fer kler ki kekyon Onorab Uranie, ki mon ti dir pour vin lo *Order Paper*. Mon pa'n met li sa semenn akoz Minis ki konsernen Minis Ferrari i pa dan pei, lo misyon aletranze.

Me mon'n aranze pour mete semenn prosenn. So Onorab Uranie zis annan pasyans. Bann Onorab ki'n lev lanmen, mon pa pe antre dan

deba, mon pa pe antre dan kestyon.

Si, si zot annan, si zot annan en pwen pour konteste dan mon *ruling*, fer parey *Standing Order* i dir ekrir mwan, ekrir mwan dir mwan e mon a regarde si i merite, mon a met li dan Lasanble. Mersi bokou.

(comments off-mic)

MR SPEAKER

Mersi bokou. Nou pour prosede, nou pour prosede lo Biznes Lasanble, *Private Notice Question*.

Si - *ah!* Avan mon al avan mon al lo *next item* -

(Off-Mic)

MR SPEAKER

Mon pa pe pran *matter of privilege* la, si ou annan en *matter of privilege*, si ou annan en *matter of privilege*, ou devret met sa a mon latansyon mon pour mwan donn ou laparol.

Selman la a se pwen, a se pwen mon pour donn *Leader Lopoziyon* laparol, akoz in demann mwan pour koriz en pwen lenformasyon ki en *misinformation* ki konsern son travay. *Leader Lopoziyon* ou annan laparol, pour sa pwen *misinformation*.

HON SEBASTIEN PILLAY

Mersi Mr Speaker. Bonzour tou dimoun ki pe swiv nou; bonzour tou nou bann viziter dan Galeri. Bonzour tou koleg Onorab. Mr Speaker, mon pa oule ganny problemm avek ou alors mon pa pour al dan sa ki ou'n dir bomaten, sa nou pour *deal* avek sa pa trakase.

Me selman mon le koz lo en lartik dan *TODAY* ki dir poudir *Harbour Port and Harbour Dues Regulations 2023*, in ganny *repealed*.

Savedir sa *S.I.* in tonbe, e ki sa i anmenn en *relief* oubyen i anmenn en soulazman pour Pralinwa ek Digwa. Mon le dir Mr Speaker sa i fo, i pa sa ki'n arive, e ki sa lartik malgre i koz lo soufrans ki bann dimoun eksprimen avek sa zournalis. Sa...

MR SPEAKER

Onorab. Ou pa'n demann mwan laparol pour komant lo sa zournal ou. Ou'n demann mwan laparol pour eklersi ki mannyer vot ti ete, dan Lasanble e se sa ki mon'n donn ou laparol. Silvouple.

HON SEBASTIEN PILLAY

Mersi Mr Speaker. Vot lo sa *S.I.*, dapre sa lartik i dir poudir tou bann Manm *US* ti vot kont pour

repeal sa *S.I.*, e tou bann Manm *LDS* ti vot an faver pour *repeal* sa *S.I.*

Sa i tou le kontrer. Tou bann Manm *LDS*, ti vot kont, pour *repeal* sa *S.I.* Savedir sa *S.I.* pa'n ganny *repealed*. Savedir poudir in napa okenn soulazman pour pep Pralinwa e Digwa.

MR SPEAKER

Mersi Onorab.

HON ROCKY URANIE

(Off-Mic)

MR SPEAKER

Onorab Uranie, parey mon'n dir okenn pwen kontestasyon ki ou annan met an ekrire pour mwan e mon a konsidere.

Madanm Clerk nou a fer Prezantasyon Papye silvouple.

MADAM CLERK

Mersi Mr Speaker. Bonzour Mr Speaker. Bonzour tou bann Manm to bann *staff* Lasanble, bann dimoun ki pe lo vizit dan Galeri e tou dimoun ki a lekout.

Bann Papye ki pe ganny prezante *ce matin* Mr Speaker i annan plizyer. So mon demann dimoun annan en pti pe pasyans ler mon pe pas dan tou. I annan apepre 15 Papye.

S.I. 1 of 2024 Seychelles Gambling (Fees) (Amendment) Regulations, 2024

S.I. 2 of 2024 Seychelles Gambling (Interactive Gambling) Rules, 2024

S.I. 3 of 2024 Excise Tax (Remission, Rebate and Refund) (Amendment) Regulations, 2024

S.I. 4 of 2024 International Trade Zone (Declaration of Zone) Notice, 2024

S.I. 5 of 2024 International Trade Zone (Declaration of Zone) (No.2) Notice, 2024

S.I. 6 of 2024 International Trade Zone (Declaration of Zone) (Revocation) Notice, 2024

S.I. 7 of 2024 Customs Management (Tariff and Classification of Goods) (Amendment) Regulations, 2024

S.I. 8 of 2024 4.8% Five Year Development Bank of Seychelles Bond Guarantee of Debt Order, 2024

S.I. 9 of 2024 7.40% 10 Year Treasury Bond Order, 2024

S.I. 10 of 2024 7.80% 10 Year Treasury Bond Order, 2024

S.I. 11 of 2024 Prisons (Declaration of Prison) Order, 2024

S.I. 12 of 2024 Electronic Transactions (Amendment of Schedule) Regulations, 2024.

S.I. 13 of 2024 International Trade Zone (Declaration of Zone) (No.3) Notice, 2024.

S.I. 14 of 2024 International Trade Zone (Declaration of Zone) (Revocation) (No.2) Notice, 2024

S.I. 15 of 2024 Business Tax (Filing of Withholding Tax Remittance Form) Regulations, 2024

S.I. 16 of 2024 Business Tax (Residential Rent Return) Regulations, 2024.

S.I. 17 of 2024 Business Tax (Amendment of Seventh Schedule) Regulations, 2024

S.I. 18 of 2024 Revenue Administration (Filing of Business Activity Statement) (Repeal) Regulations, 2024.

S.I. 19 of 2024 Income and Non-Monetary Benefits Tax (Payroll) Regulations, 2024

S.I. 20 of 2024 Physical Planning (Fees) (Amendment) Regulations, 2024

S.I. 21 of 2024 Jurors (Scale of Allowances) Rules, 2024

S.I. 22 of 2024 Control of Rent and Tenancy Agreements (Rent Board Rules and Procedures) (Amendment) Regulations, 2024

146th Assembly of the Inter-Parliamentary Union (IPU) held in Manama, Bahrain from 11th to 15th of March, 2023

147th Assembly of the Inter-Parliamentary Union (IPU) held in Luanda, Angola from 23rd to 27th of October, 2023.
Mersi Mr Speaker.

MR SPEAKER

Mersi Madanm Clerk. Wi i en long lalis Papye, in ganny mete dan Lasanble.

Bon prezan nou kapab prosede avek *Private Notice Question*. Madanm raporter mon ava demann ou pour apel Minis.

Bonzour Minis pour zafer entern, Errol Fonseka. E byenveni pour zwenn nou pour *Private Notice Question* pour ozordi. Mon ava apel *Leader Lopozisyon* pour met son kestyon pour Minis silvouple. Onorab Pillay.

HON SEBASTIEN PILLAY

Mersi Mr Speaker. Bonzour Minis. Byenveni dan Lasanble Nasyonal. Mr Speaker mon kestyon i lir koumsa:-

Pou ki rezon ki lapolis ti tir fizi ler loto Minis Nadir Hassan ti sorti dan laliny loto kot en *checkpoint* lapolis an sortan Plaisance pou al Corgat Estate?

E nou swete nou a ganny bann larepons Mr Speaker. Mersi.

MR SPEAKER

Minis, ou larepons.

MINISTER ERROL FONSEKA

Bonzour Mr Speaker. *Leader Government Business* - absante, *Deputy Leader*, *Leader Lopozisyon Onorab Pillay* tou Manm Onorab e tou manm piblik, tou manm piblik dan *Gallery*, tou manm piblik a lekout, bonzour.

Onorab, mersi pour ou kestyon. Mr Speaker, Onorab Pillay in demann en kestyon relasyon avek en lensidan ant lapolis ek loto Minis Naddy Hassan.

Sa kestyon i konsern en size ki anba en lenvestigasyon par Lotorite Lapolis kot de zofisye, in ganny sispann.

Se selman sa lenvestigasyon ki pour determin kwa egzakteman ki ti arive, e ki bann lezot prosedir e aksyon ki pour swiv. Anliny avek Lartik 19 nou Konstitisyon, ki protez drwa sak endividi pour ganny sa ki Angle i apele, en *fair trial*.

I pour totalman iresponsab, iresponsab lo mon par pou fer okenn referans avek sa ka. Akoz zisteman mon

larepons i kapab ganny war koman en lenterferans dan sa lenvestigasyon e menm ganny servi koman levidans ki mon pa ti a voudre.

Mr Speaker, mon ti a kontan ozordi enform Lasanble ki okenn kestyon ki annan pou fer avek en lenvestigasyon pour annan menm larepons ki mon'n donner semenn pase e osi ozordi.

E *Leader Lopozisyon* i konn sa tre byen aköz i konn son Konstitisyon tre byen, vi ki i fer nou mazine de tanzantan son gran konesans lo la.

Alors atraver Mr Speaker atraver ou, bann tel kestyon ki *Leader Lopozisyon* pe demann mwan ozordi, i pour fors mwan pour kas Lalwa Siprenm; savedir nou Konstitisyon.

Konmsi ozordi nou pe dir nou kapab desir sa paz Lartik 19 dan Konstitisyon. Mr Speaker nou annan plizyer lezot size pour nou rezourd ansanm.

E mwan mon touzour pare pour vin isi e diskite e rod solisyon ansanm pour anmenn lape anbelir lavi nou bann sitwayen dan bann distrik. A se moman in ler pour nou vin ansanm pour travay pour nou pei.

Mr Speaker, alor, malerezman mon pour napa

okenn lenformasyon pour mwan donn lo sa size.

E avek tou respe, tou respe pour ou Mr Speaker pour Lasanble Nasyonal, pour tou Manm isi. Nou ava les sa lenvestigasyon swiv tou prosedir nesese an respektan tou proses legal e drwa tou dimoun enplike. Mersi Mr Speaker.

MR SPEAKER

Mersi Minis. Mon rekonnèt ki Minis in dir poudir sa size i anba envestigasyon e me i kapab ganny trete koman *sub judice*. E i annan *Standing Orders* ki dir ki en Manm pa kapab demann kestyon lo en size ki *sub judice*.

Kestyon i permet, kestyon i permet lo repons ki Minis in donner me mon rekonnèt ki sa size i en size ki anba envestigasyon. Onorab Cosgrow mon a ekout - ou kestyon.

HON WALLACE COSGROW

Mersi bokou Mr Speaker. Bonzour tou dimoun, bonzour tou Manm Onorab tou dimoun ki anler dan Galeri, e tou Seselwa ki pe ekoute.

Mr Speaker, avek tou respe ki mon annan pour Minis. Sa size sete Prezidan Larepublik dan son *press conference*, ki ti

adrese atraver kestyon zournalis.

So si laba anler napa okenn problem pour reponn sa bann kestyon. Mon pa konpran aköz la anba Minis pa kapab vin avek lenformasyon ki annan pou fer avek kestyon *Leader* Lopozisyon in met devan li.

MR SPEAKER

Bon.

HON WALLACE COSGROW

E dan *press conference* Prezidan in met blanm lo sa bann gard. So nou, nou pe rod lenformasyon! E Minis i bezwen kapab dir nou.

MR SPEAKER

Bon. Ou kestyon.

HON WALLACE COSGROW

Mon kestyon Mr Speaker. In ganny etabli dapre larepons Prezidan, ki Minis pa ti santi li *safe*. Alors se sa rezon ki zot ti bezwen sorti dan sa *roadblock*.

In ganny etabli Mr Speaker, se ki sa bann zofisye in ganny sispann aköz zot ti akte dapre zot louvraz, dapre zot lenformasyon ki zot ti annan e dapre *briefing* ki zot ti gannyen ler zot ti *attend briefing* pour sa lopeyasyon.

So Mr Speaker, mon kestyon se ki, eski Minis Hassan i *above the law* kot li i pa kapab tenir en *roadblock* e les zofisye Lapolis fer son louvraz? Akoz nou konnen ki Minis Hassan son sekirite pa ti en *issue*.

Nou konpran ki Minis Hassan pa ti dan sa loto e nou konpran ki Minis Hassan i osi al *jog de fwa* par semenn, so ki *issue* sekirite ki i annan?

MR SPEAKER

Bon. *Ok*. Ou'n dir – ou'n demann ou kestyon? Silvouple si ou annan en kestyon demande.

HON WALLACE COSGROW

Mr Speaker, mon kestyon ki mon'n demann Minis vi ki nou konnen ki Minis Hassan probableman pa ti dan sa loto. Kwa ki ti dan sa loto ki sa drayver, ouswa sa dimoun ki ti pe dray sa loto ti bezwen sorti dan *roadblock* e *avoid* lafouy par Lapolis?

E eski Minis Hassan i *above the law* pour zot kapab - pour li kapab *exit* en *roadblock* Lapolis? Mersi bokou Mr Speaker.

MR SPEAKER

I annan serten pwen lo ou kestyon ki definitivman pa

annord, akoz i lo sa *case*. Minis si ou annan okenn repons.

MINISTER ERROL FONSEKA

Wi Mr Speaker. *The* kestyon lo aksyon sa gard pour ganny dekouver dan sa lenvestigasyon, ki mon pa pour koz lo la, parey mon'n dir.

Mon krwar dapre nou Konstitisyon tou dimoun i pa *above the law*. So se tou mon larepons lo sa kestyon. Mersi Mr Speaker.

MR SPEAKER

Mersi. Onorab Loze.

HON JOHAN LOZE

Mersi Mr Speaker. Mr Speaker, mon vwar li en pe ironik ki menm Minis ki devan nou ki pe sit nou Lartik 19 Konstitisyon. Ki pe sit nou lenvestigasyon i pe vini, apre midi pour vin fer en *statement* lo *case* CCCL Cascade ki osi anba lenvestigasyon.

Mr Speaker, mon pe sey konpran konbyen pwa eski zot annan pour en sel mezir? Parske si in fer en *statement* ek nou la bomaten. Ki i pa reponn nou parske sa i anba lenvestigasyon akoz Lartik 19.

Ki mannyer sa i marse anliny avek son *statement* ki in fini pas *measure of admittance*

MR SPEAKER

Napa *statement*. *Statement* napa relasyon avek sa kestasyon. Mersi. Ou annan en kestasyon? Demande.

HON JOHAN LOZE

Byensir Mr Speaker. Mr Speaker mon kestasyon i tre senp. Prezidan Larepublik in les nou konpran ki sa de polisye pa ti sipoze la kot zot ti ete.

Alors mwan mon pe sey konpran, eski i annan en problem dan Lapolis vizavi sekirite sitwayen? Eski sa de polisye ti devret la? Eski – konmsi ki pe arive?

Minis pe per pour son sekirite en Minis *LDS*, dan Gouvernman *LDS* i per polisye dan Gouvernman *LDS*. Be eski sitwayen, zabitan Corgat Estate, avek sa bann dezord ki bann *bodyguard* Prezidan ek ibou i vin fer dan Corgat estate.

Eski sitwayen i sipoze santi zot an sekirite fas a sa kalite *mess* ki pe ganny prezide par Minis Fonseka? Mersi Mr Speaker.

(APPLAUSE)

MR SPEAKER

Mon pa vwar ki i annan en kestasyon valab ladan. Onorab Vidot ou kestasyon.

HON AUDREY VIDOT

Mersi Mr Speaker. Mon a dir bonzour Mr Speaker, Minis tou Manm Onorab e bann dimoun dan Galeri, tou dimoun ki a lekout.

Eski Minis Hassan ti dan sa loto? Akoz i ti santi i pa bezwen korpore avek *check point* Lapolis? Ki ti annan dan sa transpor ki ti bezwen sanze dan sa *checkpoint*?

E si gard i tir fizi alalezer dan pei? Mersi.

MR SPEAKER

Minis eski i annan okenn pwen ladan ki ou santi ou bezwen reponn?

MINISTER ERROL FONSEKA

Wi, Mr Speaker. Premyerman lo sa dezyenm kestasyon ki'n demande – (*excuse me*) – lo gard pe tir fizi. Parey mon'n dir lo komansman sa pour vin dan lenvestigasyon. Mr Speaker Minis Hassan ti dan sa loto. Mersi.

MR SPEAKER

Mersi. Onorab Uranie.

HON ROCKY URANIE

Mersi Mr Speaker. Bonzour tou koleg Onorab, bonzour tou viziter dan Galeri, tou zabitan Zil Pros ki a lekout.

Minis ki tranzaksyon ki sa loto Minis Hassan ti pe fer, ti pe al fer Corgat Estate...

MR SPEAKER

Sa kestyon pa apropiye. Sa kestyon pa apropiye. Onorab Aglae, si ou annan en kestyon.

HON EGBERT AGLAE

Mersi Mr Speaker. Bonzour Minis. Minis, en Minis ti tap en zofisye Lapolis ek en transpor, ti dir pour annan en *investigation* nou pa ankor tann nanryen ziska prezan.

La resaman en Minis i sot en *spot check* e ki fer ki de atraver sa aksyon, de zofisye Lapolis i ganny sispann e ki ti kapab tap gard tou.

Eski ou pe dir nou poudir nou pour annan investigasyon ki pour kler e onnet? Akoz nou annan en investigasyon nou pa ankor ganny okenn rezilta lo sa premye lensidan.

(APPLAUSE)

HON EGBERT AGLAE

E dezyenmman eski Lalwa ankor enn fwa, ki aplik pour Minis i pa aplikab pour sitwayen ordiner? Nou anvi konnen sa.

MR SPEAKER

Mersi. Minis ou kapab reponn si investigasyon pou kler e onnet.

MINISTER ERROL FONSEKA

Mr Speaker Lalwa i aplik pour tou dimoun. Mersi.

MR SPEAKER

Onorab Pillay, nou a ekout ou kestyon siplemanter.

HON SEBASTIEN PILLAY

Mersi Mr Speaker. Mr Speaker dan son larepons pour mon *PNQ*. Dan mon larepons pour – dan larepons mon *PNQ*, Minis Fonseka in lir nou Konstitisyon in koz lo Lartik 19.

Alors mon annan sa bann kestyon swivan ki mon ti a kontan Minis Fonseka i klarifye, koman etan sa dimoun ki ti sipoze pe protez nou Konstitisyon e ansarz lord ek lape dan nou pei.

Eski ler Prezidan i vini dan en *press conference* e dir poudir sa 2 gard pa ti sipoze kot zot ete. E ki li i ti per pour sekirite Minis Hassan.

Savedir nou'n ariv en staz dan en pei kot en Minis, trwazyenm dan Gouvernman i per son sekirite kot en *checkpoint*. Mon pa konnen ki sitwayen pour panse, eski ler li Prezidan i fer sa *statement* li i

pa pe kas lartik Konstitisyon e vyol Konstitisyon?

Eski sa i leka? Prezan Mr Speaker. Mon ti a kontan Minis Fonseka i klarifye sa pwen pour nou ki la. Minis Fonseka i dir avek nou koumsa poudir sa i anba lenvestigasyon.

Mon demann li kestyon dan PNQ ki pa kapab reponn. Apre i vin fer en *statement* dan lenvestigasyon, ou admet son *statement*, ou'n admet mon kestyon, in pa'n tes *of admissibility*.

E en Minis in vin dan Lasanble i refize donn lenformasyon Lepep Seselwa lo kwa ki pe arive.

Nou konnen Mr Speaker ki Minis pa ti raport sa lensidan li menm. Nou konnen sa. Nou konnen osi poudir sa de gard ti dan *briefing* ler zot ti ganny dir al lo sa *scene*.

MR SPEAKER

Onorab. Ou pe fer, la ankor ou pe fer bann – en alegasyon ki mon pa konnen si i vre. Mon pa konnen si i fo. Me selman mon pe dir ou, si ou annan en kestyon pour Minis poze silvouple, sinon mon pe termin sa kestyon.

HON SEBASTIEN PILLAY

Mersi. Mersi Mr Speaker. Mr Speaker, eski Minis Hassan

koman en Minis dan Gouvernman nou pei. Si li i pa santi li *safe*, ki nou sitwayen ordiner pour dir ler zot ariv kot enn *checkpoint*?

Ki pour arive ek zot, si zot, zot pa swiv en *checkpoint*? Akoz Prezidan li menm in dir Minis pa santi li *safe* e in bezwen sispann sa de gard. Me si sa de gard ti fer zot louvraz dapre *briefing* ki zot in gannyen.

Akoz ki Minis Hassan ek son loto in bezwen sorti dan sa *checkpoint* sa loto, ti pe al Corgat Estate. Sel keksoz ki nou pa kapab krwar se ki dan sa loto ti annan keksoz ki pa oule gard vwar.

(APPLAUSE)

HON SEBASTIEN PILLAY

E mon krwar Mr Speaker. Minis Hassan i devret donn en *public apology*

MR SPEAKER

Ou pe al dan size ki napa nanryen pour fer avek ou kestyon, avek ou repons. Ou pa la pour demann en *apology* Minis. Ou la pour demann kestyon. Minis eski ou annan okenn pwen pour azoute?

MINISTER ERROL FONSEKA

Mr Speaker. Wi, *basically*, ler mon ekout Onorab i pe vin ek

en ponnyen *hypothetical scenarios*, ki pa devret menm vin koman en kestyon la. Mersi Mr Speaker.

MR SPEAKER

Mersi. Bon mon – mon'n termin kestyon la. Ou annan en *matter of privilege*? Mon a ekout ou *matter of privilege*, wi.

HON SEBASTIEN PILLAY

Mr Speaker. Koriz mwan, eksplik mwan, Lotorite Siprenm nou pei se Prezidan Larepublik. Prezidan Larepublik, i vin dan en *press conference* e i dir koumsa poudir sa de gard pa ti sipoze la...

MR SPEAKER

Ki ou *privilege*?

HON SEBASTIEN PILLAY

Be Mr Speaker...

MR SPEAKER

Ou *privilege* ou pe koze...

HON SEBASTIEN PILLAY

Mwan koman en Manm Lasanble mon demann en kestyon lo la, ou a dir ek mwan koumsa poudir – mon kestyon napa relevans.

MR SPEAKER

Ok.

HON SEBASTIEN PILLAY

Be si Minis pe dir mwan mon pe vyol Lartik 19 Konstitisyon par demann sa kestyon. *Then* Prezidan Larepublik in vyol Lartik 19 nou Konstitisyon.

(APPLAUSE)

HON SEBASTIEN PILLAY

E rezilta en Prezidan vyol Konstitisyon se ki i devret demisyonnen!

MR SPEAKER

Mon pa vwar – mon pa vwar okenn privez Lasanble, ki *Leader* Lopozisyon in leve. In fer en kritik kont Prezidan. Lasanble pa la pour ziz Prezidan. Nou ava termin - nou a termin sa size la.

En *point of order*, wi. Mon a ekout en *point of order*. Onorab, wi.

HON GERVAIS HENRIE

Mr Speaker mon le *raise en point of order* anba *Order 36* an relasyon avek '*Content of Questions*'.

MR SPEAKER

Wi?

HON GERVAIS HENRIE

E mon oule aport ou latansyon poudir semenn apre semenn i annan en labi parti minoriter

dan Lasanble ki kontinyelman servi *Question Time* pour fer bann politik ranpli avek bann alegasyon, bann komanter ki zot pa kapab *substantiate*.

E fer bann komanter, demisyonnen, fer eleksyon boner, ki i en labi pour mazorite ki'n vini pour travay.

Si zot ti mentenir *Order* 36, ki demann Konteni Kestyon, nou ti a kapab aksepte sa.

Me sa nou pa pour kapab kontinyen akoz si prezan nou kapab servi nou mazorite pour abiz zot. Mersi.

MR SPEAKER

Mersi. Mon rekonnèt. Mon rekonnèt mon krwar ou komanter i annord. Wi. Minis, Minis mon a les ou fer en dernyen remark si ou bezwen.

(APPLAUSE)

MINISTER ERROL FONSEKA

Mr Speaker. Mon annan en dernyen remark. Ler nou pe koz vyol Konstitisyon lekel, lekel Prezidan ki'n vyol Konstitisyon, ki ozordi zot pe adore?

(APPLAUSE)

MR SPEAKER

Order! Minis nou pa pe al lo dan lezot size. Bon kestyon size *PNQ*

in terminen. Minis i annan en demann pour en *statement* dan Lasanble.

Vre *Standing Orders* i prevwar ki *statement* i vin apre kestyon. Me selman vi ki Minis i la, e i pare pour fer en *statement*. Mon pour permet li fer sa *statement*, mon pour demann – mon pour *order*, mon pour demann sispansyon *Order* 25 *Standing Order*, pour permet nou pran *statement* avan ki nou fini avek kestyon.

Minis, mon pour envit ou fer ou *statement*. Mon pour envit ou fer ou *statement*.

HON SEBASTIEN PILLAY

(Off Mic)

MR SPEAKER

Ki *point of order* Onorab? Tenny ou *micro*. Ki *point of order*?

HON SEBASTIEN PILLAY

(Malelve). Mr Speaker, *Standing Order* i kler ou bezwen ganny en Mosyon pour *suspension of the Standing Order*. Ou napa pouvwar pour *suspend Standing Order*.

E de plis koman en Manm lo *ABC*, ou pa'n enform nou poudir ou pe met *statement* Minis avan kestyon. E sa *statement* i baze lo en envestigasyon ki Minis li menm

in dir i pa pe vin fer okenn larepons lo lenvestigasyon.

(APPLAUSE)

HON SEBASTIEN PILLAY

So what is this?

(APPLAUSE)

MR SPEAKER

Sorry, non - Speaker – Speaker i annan drwa diriz Lasanble manner i santi i nesaser. Minis – Minis ou statement. Minis ou statement.

MINISTER ERROL FONSEKA

Mersi Mr Speaker. Mr Speaker, again Leader Government Business, Leader Lopozisyon tou Manm Onorab, piblik. Tou manm piblik a lekout, bonzour ankor enn fwa.

Mr Speaker mersi pour akord mwan demann pour vin fer statement devan Lasanble Nasyonal.

Sa demann i swiv en statement fer par Onorab Sebastien Pillay Mardi pase dan Lasanble Nasyonal an relasyon avek sa leksplozyon kot CCCL dan ki i ti dir, “eski i aköz Gouvernman ki responsab par lefe ki i annan bann konntener ki ti pour Larme ek Lapolis kot CCCL e se pour sa rezon ki

Gouvernman pa oule donn lenformasyon lo sa lenvestigasyon?”.

Mr Speaker mon'n vin, mon'n vini poudir klerman ki Komisyoner Lapolis ek Sef Lafors Defans dan en fason kategorik i oule fer kler ki ni Lapolis, ni militer ti napa okenn konntener, ki ti annan leksplozif kot CCCL le 7 Desanm 2023 zour ki sa leksplozyon ti arive.

Mon swete ki sa i ava retir tou dout ek lakizasyon e parey mon ti fer kler dan mon larepons lo sa size. En lenvestigasyon pe kontinyen e nou, nou atann pour ganny larepons, lo kwa ki ti arive sa zour. Mersi Mr Speaker.

MR SPEAKER

Mersi Minis. Mon pa pe pran okenn kestyon lo sa statement. Sa i en statement, sa en statement ki klarifye, klarifye en pwen ki'n leve dan Lasanble. Mon satisfè ki sa statement in adres pwen ki'n ganny leve.

Minis, mon pour permet ou –

(Interruptions)

MR SPEAKER

Order! Order! Standing Order, i dir Standing Order i dir – Onorab Pillay silvouple, ler

Speaker pe koze ou reste silans, ou gard silans e ou ekoute. Ou ekoute.

Minis, mon pour permet ou pour sorti, kit Lasanble. Mersi pour ou partisipasyon. Mon pa pe pran okenn lot *point of order*, akoz bann *point of order* i zis fer pour enteronp prosedir Lasanble.

Yes. Madanm raporter ou ava apel lot Minis pour kestyon.

HON AUDREY VIDOT

(Off-Mic)

Mr Speaker mon annan en *point of order*.

MR SPEAKER

Ou annan sa drwa ler mon donn ou sa drwa Onorab napa *point of order*. 10er, *ok*. Bon nou ti'n prevwar lot Minis pour vin dan Lasanble 10er.

Alor nou pour respekte sa Madanm Clerk in fer mwan remark sa. Donk nou pour pran en *technical adjournment*. Lasanble pour rebran 10er pour kestyon.

(BREAK)

MR SPEAKER

Bon, nou a pran kestyon pour Minis. Madanm raporter ou ava apel Minis ki pe atann silvouple.

HON SEBASTIEN PILLAY

(Off Mic)

MR SPEAKER

Onorab Pillay napa nanryen ki'n arive dan Lasanble ki permet *raise en point of order*.

Si ou annan en pwen, si ou annan en pwen silvouple adres mwan an ekrire, an prive e mon a konsidere. Mersi.

HON SEBASTIEN PILLAY

(Off Mic)

MR SPEAKER

Onorab Pillay, ou napa laparol. Bon bonzour Minis pour Zafer Etranzer e Touris Mr Sylvestre Radegonde. E bonzour osi zofisye ki pe akonpany li Anbasader Vivianne Fock Tave, Sekreter Prensipal Mrs Sherin Francis Sekreter Prensipal pour *Tourism*, Mr Christian Faure Direkter Zeneral pour *Regional Affairs* dan *Foreign Affairs Department*. E akote lo latab nou annan Mr Terence Max Direkter *Seychelles Tourism Academy*.

Bon nou a komans avek bann kestyon e nou komans avek kestyon 30, dan non Onorab Richard Labrosse.

Me dan son labsans son kestyon pour ganny demande

par Onorab Kelly Samynadin. Onorab Samynadin kestyon?

HON KELLY SAMYNADIN

Mersi Mr Speaker. Bonzour Mr Speaker, Minis avek ou delegasyon, bann envite dan Galeri mon bann koleg Onorab e tou dimoun a lekout.

Kestyon Onorab Labrosse i konm swivan:-

Eski Minis pour Zafer Etranzer i kapab enform Lasanble ki son Minister pe fer pour revwar rol ki Sesel i zwe:

a) pour kontinyen ganny bann benefis avek bann lorganizasyon enternasyonal bann pei ki i manm?

b) konbyen sa bann lorganizasyon enternasyonal ki Sesel in benefisyé avek? Mersi.

MR SPEAKER

Mersi Onorab. Minis, repons silvouple.

MINISTER SYLVESTRE RADEGONDE

Mersi Mr Speaker. Mr Speaker bonzour, Onorab *Leader* Lopozisyon, Onorab *Leader* Zafer Gouvernman, tou bann Onorab, bann dimoun ki a lekout bann viziter dan Galeri bonzour zot tou.

Mon remerci Onorab pour son kestyon. Mr Speaker, pandan sa 47 an depi

Lendependans Sesel, Sesel in zwenn environ 160 diferan lorganizasyon enternasyonal.

Sa i bann lorganizasyon ki swa rezyonal, ou sou rezyonal Losean Endyen, parey *COI* koman enn, *IORA* koman en lot ouswa i rezyonal Lafrik, ouswa i annan ki pirman pour bann rezon istorik, politik, *Commonwealth*, frankofoni.

E apre parey zot konnen dan nou sou rezyon i annan *SADC*, *COMESA* ek lezot. E i annan en kantite sa bann lorganizasyon pour plizyer rezon nou'n zwenn.

Sa ki mon bezwen dir se ki ek Manm sa lorganizasyon byensir i annan en kou. I kout nou en kantite, i kout nou plizyer milyon Roupie par an.

Parske mazorite sa bann lorganizasyon nou peye pour *être* manm. Me mon bezwen dir ki sak fwa nou regard en lorganizasyon enternasyonal, i vwar si nou devret form parti i pour bezwen rantre dan sa klib. Nou toultan regarde ki mannyer nou pour benefisyé.

Toultan i *litmus test* ki nou fer, ki lentere Sesel pour zwenn en lorganizasyon. I annandler, bann benefis ki nou kapab gannyen i sa konfor ki ou gannyen dan en gran group, dan en gran klib kot ou ganny sipor annandler politik pirman.

I annandler i bann - pour bann rezon ekonomik, e plizyer lezot rezon. Nou *focus* nou i reste touzour koman enn Pti Leta Zil, byensir nou bezwen sipor plizyer pei.

Donk bann lorganizasyon ki nou ladan en kantite letan, i konsernen avek nou koman enn pti Leta e bann lentere ki nou pouse koman enn pti Leta.

Lanvironnman, sekirite maritim, ensidswit. Be i annan osi dan sa 160 lorganizasyon ki mon'n mansyonnen anviron en 50 ki lye direktman avek ouswa i dekoule dan Lorganizasyon Nasyon-z Ini.

WHO i enn, i annan *World Maritime Organization*, i annan *tourism*, *World Tourism Body*, ensidswit. Donk ki nou - ki annandler nou bezwen, nou bezwen ladan. Akoz i annan bann serten mezir regilatwar ki nou pa kapab kontournen, nou pa kapab reste an deor.

Sa ki Lasanble osi i a kontan konnen se ki nou fer en *assessment* regilye. Sak fwa nou regarde nou met tousala ater nou dir be nou ti zwenn. Dizon nou ti zwenn serten lorganizasyon ler nou ti vin endepandan an 1976. Ozordi an 2023, eski i ankor valab? Eski nou pe benefisyè parey nou ti krwar nou pe benefisyè?

Eski i pey fre pour nou kontinyen peye? E ki nou pe gannyen an retour? I vre i pa toultan posib pour nou kapab mezir benefis.

Annandler parey dan zafer enternasyonal, dan la diplomasi, i difisil pour kantifye ki ou pe gannyen egzakteman.

Parske souvan i en lenvestisman a lonterm ki ou fer. En kantite koze, be ou pa kapab apre ki ou'n koze retournen e dir be ki mon'n gannyen avek sa ki mon pe koze toudswit.

Annandler petet i pran en kantite letan, pour sa ki ou'n koze *filter* e i ale, i ale ki evantyelman ou kapab ganny en apersi benefis.

Me nou, nou fer tanzantan en *assessment*, nou *membership* dan sa bann lorganizasyon e pour regarde si i pey fre. E kot nou krwar i pa pey fre, ouswa nou krwar apre en serten letan in annan en *duplication*.

Pwiske sa osi nou bezwen konsyan ki lemonn nou dan en syek ozordi ki dimoun i kontan kree lasosyasyon, i kontan kree lorganizasyon.

Annandler ler ou get bi, lobzektif en lorganizasyon ou dir be tyonbo en kou, be sa ki sa lot i sipoze fer akoz sa enn ankor pe vini. E si ou al ladan

ou bezwen pey ankor en lot *membership fee*.

So nou fer sa bann *assessment* e kot nou krwar i pa neser pour nou ladan *anymore*, ouwa son lorganizasyon in nepli annan litilite pour nou, nou fer rekomandasyon ek Gouvernman pour sorti. Nou'n fer en premye legzersis lannen pase, kot nou'n kapab sorti dan serten lorganizasyon.

Sa legzersis pour kontinyen ankor sa lannen pour nou ankor eseye *hopefully* a lafen sa lannen konplet sa legzersis. En mannyer ki nou ava annan bann lorganizasyon ki nou vreman bezwen ladan, ki anmenn en benefis pour nou, e ki evantuelman i kout pei osi mwens ki posibil.

So vwala larepons ki mon'n ti donner Mr Speaker. Mon ouver pour keston. Mersi.

MR SPEAKER

Wi, Onorab Samynadin, ou siplemanter.

HON KELLY SAMYNADIN

Mersi Minis, pour ou larepons ase detaye. Mon premye keston siplemanter, ou'n mansyonn bann sipor politik ekonomik ki Sesel i resevwar atraver *membership* avek sa bann lorganizasyon.

Me mon ti a kontan konnen si i annan lezot benefis ankor, swa moniter, swa atraver bann *grants, scholarship* ki Sesel petet i resevwar atraver sa bann lorganizasyon?

E dezyenman, konbyen parmi sa bann lorganizasyon ki baze isi Sesel? E ki vreman zot rol atraver zot prezans isi? Mersi.

MR SPEAKER

Mersi Onorab. Minis repons.

MINISTER SYLVESTRE RADEGONDE

Mersi Onorab. Mersi Mr Speaker. Wi, parey mon'n dir Onorab, i pa toultan posibil pour nou kapab mezire egzaktman dan en sans monneter, kwa ki nou pe gannnen. I annan serten, wi.

Par egzanp, si mon rapel dernyen fwa sa lannen ou lannen pase, siny sa Lagreman avek *UNDP* pour en zafer 40 ekek milyon Dolar non? – 20 milyon – 40 milyon avek bann Lorganizasyon *UN* – 49 milyon.

Par egzanp ek tou sa bann lazans ki travay Sesel. Lazans *UN, UNDP* ek lezot ki travay Sesel mon'n siny en Lakor pour environ \$49.7 milyon pour en peryod 4 an.

Sa nou kapab mezire, pour kouver bann program ki sa bann lorganizasyon i fer avek nou.

Donk sa ou kapab mezire monneter. Pour serten lezot si mon pran *Commonwealth*, si mon pran Lafrankofoni, bann sipor ki nou gannyen en kantite letan.

Se apard sa sipor moral ki zot donn nou, lo nou bann *issues* ki konsern nou, zot ed nou avek bann lasistans teknik, ler nou bezwen en *expert* dan en domenn ou en lot.

Par egzanp Lafrankofoni, nou bezwen bann ansenyan Franse, zot ed nou pour gannyen. Menm zafer avek *Commonwealth* pour lezot, dan lezot *area*.

Vwala mon krwar an gro. Apre bon! Sa bann lorganizasyon enternasyonal, i donn osi en platform pour nou dimoun kapab *apply*, ganny en *post* dan en lorganizasyon enternasyonal, ganny en *exposure* enternasyonal.

So a mwen ki *PS* i le azout nanryen, se sa ki mon le dir an term benefis ki nou gannyen. Mersi.

MR SPEAKER

Mersi Minis. Kestyon Onorab Henrie.

HON GERVAIS HENRIE

Mersi Mr Speaker. Mon ava dir bonzour *panel*. E permet mwan Mr Speaker, mon pa ti ankor ganny sans dir *welcome* bann dimoun sorti dan distrik Mont Buxton, dan Galeri ozordi. Nou byen kontan pour annan zot parmi nou.

Mon annan de kestyon pour *panel*. Premyerman, mon ti ava kontan konnen si zot an posesyon sa lenformasyon lo kantite larzan, *or* ki kantite poursantaz Bidze pei *annually* ki al zis pour sa bann lorganizasyon enternasyonal akoz i larzan ki kit pei? Premye kestyon.

Dezyenm kestyon, i ekoul dan larepons Minis ki'n dir dan sa dernyen 47 an depi lendependans, nou manm apepre 160 lorganizasyon enternasyonal. E ou'n dir souvandfwa nou ganny en sipor politik.

Donk mon kestyon i eski partisipasyon Sesel dan bann lorganizasyon enternasyonal parey Nasyon-z-Ini, Fon Monneter Enternasyonal, ouswa *Commonwealth* in ed nou an partikilye lo en nivo politik ant 1977 – 1993?

Letan nou pei ti anba en sistenm diktatir, parti *SPPF* ki ozordi i apel *United Seychelles*. Mersi.

MR SPEAKER

Mersi. Minis, ou repons.

MINISTER SYLVESTRE RADEGONDE

Mr Speaker. Mersi Onorab pour ou keston. An sa ki konsern Bidze ki nou'n fer lannen pase, nou'n fer en segregasyon.

Avan tou Bidze, pour tou lorganizasyon enternasyonal ti tonm anba *Foreign Affairs*. Akoz nou ki annan en drwa regard lo tou sa bann lorganizasyon.

Annandler dan bann domenn ki teknik, ki nou, nou menm nou napa sa konpetans pour nou kapab mezire, e *monitor*. Ki nou'n fer lannen pase avek *approval Cabinet*, nou'n separe.

E prezan sak Minister, sak *MDA* i annan anba zot, zot responsab pour bann lorganizasyon enternasyonal direktman lye avek zot portfolyo responsabilite e se zot ki peye direktman.

So Finans i aporsyon Bidze dapre kote sa bann lorganizasyon i ete. Kot *Foreign Affairs* i ete, lannen pase Bidze ki nou ti gannye pour lorganizasyon, zis bann lorganizasyon.

Mwan mon kapab konnen konbyen – (pour tou *MDAs*?) pa bann ki tonm anba *Foreign*

Affairs. Ok alright. Pour tou *MDAs* lannen pase ti R45 milyon dan Bidze.

Pour sa lannen i annan en Bidze 46 milyon e ladan sa bann lorganizasyon ki tonm anba *Foreign Affairs* i 27 milyon. So anviron 50poursan i tonm anba *Foreign Affairs*.

Lo ou keston Onorab. Mon ava petet elarzi, poudir ki a plizyer moman dan bann lorganizasyon enternasyonal. Wi, i annan bann sipor ki nou gannye sertenman.

Me i annan osi bann letan kot dan sa bann lorganizasyon enternasyonal i osi en letan, pour tou dimoun. Anfen serten dimoun mesaz avek nou.

Mwan mon'n prezan dan bann serten *meetings*, serten lorganizasyon enternasyonal. Par egzanp letan, si mon pran *one party state*. La mon pa pe soz, kot ti annan sa mouvman ki ti'n komanse pour *democratize* ouver, kot serten diskour, serten - anfen pa kapab dir presyon.

Me serten diskour ganny fer pour san mansyon ou, dir be in ler pour ou, ou osi regard dan sa direksyon. Ouver *democratize*, fer *multi-party* vini.

E sa bann diskisyon koumsa i dapre lorganizasyon, i bann konversasyon ki

kontinyen. Petet dan e lot form, dan en lot form ozordi.

Konnen par egzanp si ou swiv nouvel, ou a tande ki ozordi dimoun i annan kestyon ki demande lo sityasyon dan *West Africa*.

Kot i annan en *resurgence* dan kou, bann Gouvernman ki pe vini par koudeta. So ou a trouve annandler menm o nivo Linyon Afriken, bann deklarasyon i ganny fer, pour fer dimoun rapel ki nou prensip zeneral sa lorganizasyon i evite ki bann rezim i vin o pouvwar a mwayen *autre* ki demokrasi.

Mon pa konnen si mon'n reponn ou kestyon, me... Mersi.

MR SPEAKER

Byen nou ava *take* sa, ou repons. Onorab Georges Romain.

HON GEORGES ROMAIN

Mersi Mr Speaker. Minis, bonzour avek ou delegasyon. Minis, mon'n ekout ou byen, byensir i kout bokou parey ou'n dir pei kantite pour reste dan sa lorganizasyon.

Mon konnen nou benefisye. Me selman mon kestyon i mon'n tann ou fer resorti ki i annan nou ki nou pe sorti dan bann lorganizasyon.

Me selman mon kestyon i ki bann reperkisyon ki kapab

arive lo pei ler nou sorti lo sa bann lorganizasyon an kourt term *or* lonterm?

Mon dezyenm kestyon; dan ki domenn ki ler nou'n antre dan sa bann lorganizasyon kot nou'n vwar Sesel in benefisye plis, dan ki *area* vreman si Minis i kapab kot Sesel in benefisye plis? Mersi Mr Speaker.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Onorab. Mersi Mr Speaker. Reperkisyon Onorab, nou pa pour fer bann desizyon dan fou. Se bann lorganizasyon ki par egzanp lannen pase nou'n fer desizyon pour nou kite, mon pa kapab rapel *on top of my head*. Mon rapel ti annan enn ki ti konsern lisyen non – (mon ti riye mwan menm ler mon ti vwar)

Nou fer sir ki nou fer en *assessment*, regarde ki reperkisyon, ki risk ki annan si nou pa dan sa klib *anymore*? Eski soley pour kontinyen leve? Eski lemonn pour kontinyen tournen?

So nou reste dan bann klib, dan bann lasosyasyon, dan bann lorganizasyon ki vreman i anmenn nou benefis.

Pa zis nou la pour akòz nou devret la, akòz tou dimoun i la.

Se ki i anmennen pour Sesel? So sa mon le donn ou sa lasirans. Sa legzersis ki pour ki pour kontinyen i pour baze lo la. Nou, nou fer nou *assessment Foreign Affairs*, ki nou anmenn apre devan *Cabinet*, e *Cabinet* i fer en desizyon final.

I annan ka kot *Cabinet* in dir nou retournen re-al reflexir ankòr lo la, *which is normal*. Lo benefis lorganizasyon ki nou ganny plis avek.

Regarde, parey mon'n dir, benefis ki nou gannyen dan bann lorganizasyon i annan bann moniter, ki nou gannyen sa nou kapab mezire.

E dan sa ka ma dir ou bann lorganizasyon ki asosye avek Nasyon-z-Ini, i enn kot nou kapab mezire. Nou'n ganny preski \$50 milyon pour 4 an. Sa nou'n mezire. Ou kapab.

Prezan i annan lezot ki donn nou bann sipor teknik, ki donn nou en konseye, i anvoy detrwa *teachers* par egzamp. E sa bon ou a kalkile dapre saler, lakaz, ensidswit. Me ou konpran?

Me selman si la *over the top of my head*, direk la mon a dir ou. Lorganizasyon Nasyon-z Ini i enn ki benefisyen nou en kantite.

MR SPEAKER

Mersi Minis. Onorab Loze.

HON JOHAN LOZE

Mersi Mr Speaker. Minis, *sorry* mon vin met en *burden* lo ou. Me solman i en size ki nou'n deza aborde dan *meeting* ki nou ti fer, rankont nou ti fer avek IAC. I konsern ou *droit de regard* lo bann Minister *tutelle* ki sa bann lorganizasyon i tonm anba zot.

E mon konnen ou'n dir, ou pa vreman posed kapasite teknik pour vey Bidze e larzan ki ganny *allocated across the board* pour tou sa bann diferan.

Me i annan en lot kestyon ki leve la dan bann letan ki nou pe viv se isi se *policy* e politik. Mon pe koz *policy* ek politik enternasyonal la, pa antre nou isi anndan.

Eski ou koman - ki annan sa *droit de regard* la, ou kapab etabli mekanizm ki Seselwa *going forward* i ava ganny konsilte, letan bann desizyon ki konsern zot, konsern zot lavi, ki konsern zot personnelman i ganny pran enternasyonalman?

Akòz Minis, si nou pe fer en lotel nou pe konble devan, i annan en *EIA*, i annan en diskisyon ki ganny *entamer* avek Lepep Seselwa.

Me si nou pe koz met pikir dan lebra en Seselwa, napa

diskisyon, napa nanryen ki ganny fer. So mon pe gete si ou koman Lotorite siprenm, mon kapab dir lo Polisi Enternasyonal Sesel, ou kapab get en pe bann diferan MDAs ler zot pe fer sa bann diskisyon enternasyonalman.

E ou petet posibleman ou a pran en desizyon politik baze lo bann Polisi e dir gete la, *stop* nou bezwen ale diskite, les dimoun konnen e konpran ki pe pase. Mersi Mr Speaker.

MR SPEAKER

Mersi. Minis ou repons.

MINISTER SYLVESTRE RADEGONDE

Mersi Onorab pour kestyon. Mersi Mr Speaker. Onorab, wi, mon responsab, mon annan sa portfey pour Zafer Etranzer e mon pa pour dir *the buck stops with me*. Parske i ava enn pti pe arogan pour mwan dir sa.

Mon annan portfey pour Minister Zafer Etranzer, mon Minister i responsab pour evantyelman fer sa rekomandasyon final dan nenport ki lorganizasyon ki en MDA i vin avek.

E i rekomandasyon final ki nou fer ki al kot Gouvernman, e pour Gouvernman kapab *endorse*. Wi, nou kontinyen donn

guidelines. Bann MDA pa sipoze pe al angaz zot, pe al fer *commitment* avek okenn person si pa'n ganny *clearance* sorti kot *Foreign Affairs*.

Sa nou fer li pour bann lorganizasyon enternasyonal. I parey zot enteraksyon osi avek bann Gouvernman etranze, avek bann Lanbasad. *Foreign Affairs* i bezwen konnen kwa ki pe arive.

E nou pa kapab annan plizyer leko dan, anfen plizyer son laklos. I bezwen en laklos ki sonnen e sa laklos i sorti kot *Foreign Affairs*.

E nou dir se *Foreign Affairs* ki responsab pour relasyon enternasyonal. Relasyon avek lezot pei. Donk MDA ki annan en keksoz pour demande, poudir, i pas atraver *Foreign Affairs*, nou, nou *convey*.

Parski si non ou pour ganny sakenn pe fer son bout pour al demann kwa, pour al fer kwa. Mersi.

MR SPEAKER

Mersi Minis. Onorab Pillay.

HON SEBASTIEN PILLAY

Mersi Mr Speaker. Prenon kont larepons ki ou'n fek donner. So eski Minister Lasante ti konsilte Minis *Foreign Affairs* avan ki al fer sa *commitment* an relasyon

avek *International Health Regulations*? Kot in napa okenn konsiltasyon Nasyonal pour li dir ki nou napa swa, nou bezwen sinyen, nou bezwen adere. Eski ti annan konsiltasyon?

E eski ou Minister *Foreign Affairs* ou ti ganny konsilte ler Sesel ti al angaz li dan loperasyon *Prosperity Guardian*, pour al lager kont bann *Houthis* dan Lanmer Rouz?

So si ou dir nou poudir i bezwen annan konsiltasyon ek ou. Eski ou ti ganny konsilte?

Akoz ou a permet mwan Minis ler ou ti ganny kontakte par bann – par medya ou ti dir ou pa konnen, retourn kot *Internal Affairs*.

So mon pe zis swiv larepons ki ou pe donn nou pour mwan konpran ki mannyer sa dinamik i marse.

E ou'n dir poudir ki bann pei i koz bann koze kot, i fer bann konversasyon ek ou pour ou konpran kote ou pe ale.

Be eski bann pei in komans koze tandans ki Sesel pe pran pe al ver la diktatir kot lenformasyon pa ganny donner avek piblik, kot keksoz i ganny kasyet, kot Lasanble Nasyonal ou pa kapab kestyonn en Mini...

MR SPEAKER

Onorab mon pa aksepte sa bann alegasyon, komanter ki ou pe fer. I annan de pwen ki ou'n ganny - ki ou'n mete premye. Minis, si ou kapab adres sa de pwen silvouple.

MINISTER SYLVESTRE RADEGONDE

Mr Speaker. Mersi Onorab pour ou kestyon. Mersi Mr Speaker. Tou negosyasyon, tou konversasyon ki *MDA en* Minister i annan, sirtou kot i konsern bann lorganizasyon enternasyonal.

Wi, *Foreign Affairs* i okouran, so repons ou kestyon dan tou le de ka. *Foreign Affairs* i okouran.

Foreign Affairs i okouran. Mon le zis anmenn en koreksyon lo sa ki ou'n dir ki ler mon ti ganny demande mon ti dir pa mwan. Non. Mon krwar rapor mannyer in pase apre in petet dimoun in mal konpran, ouswa in *distort*.

Mon reste Minis Zafer Etranzer responsab pour *Foreign Policy* Sesel. Be mon pa Minis Lagrikiltir mwan. Mon pa Minis ki responsab pour Defans mwan. Mon pa Minis pour Zafer Sosyal. Mon responsab *Foreign Policy* Sesel.

Ler zournalis i vin kot mwan, koman Sylvestre

Radegonde Minis Zafer Etranzer, i vin demann mwan en keksoz ki konsern en Minister. Ki mwan mon ete pour mwan al konsern, al koz lo defans Sesel, kote patrol i ete? Ki mwan pour al koz Polisi Lagrikiltir? Mon annan en Polisi an zeneral, kote nou le ale.

Me dan bann lenformasyon detay teknik mon refer zot avek Minister konsernen. So ler zournalis i vini i vin demann mwan ki ou panse lo sa? Ki pe arive avek sa. Mon dir sa i en topik ki meyer ou diskrit avek sa Minis konsernen. Mon pa pour ale al enterfer ladan. Mersi.

MR SPEAKER

Mersi. Ou'n demann kekyon pour en klarifikasyon. Laparol pour en klarifikasyon Onorab. Wi.

HON SEBASTIEN PILLAY

Mersi Mr Speaker. Prenon kont ki mon annan gran respe pour ou Minis Radegonde, ou'n en Anbasader pandan plizyer lannen. E person pa kapab *afford* ou kapasite. Byensir.

Me dan sironstans kot ler apre ki'n sorti kot ou, i al kot sa Minister e sa Minister i dir poudir li i pa konnen, i retourn kot ou.

Konmsi ki rekour ki nou popilasyon i annan akouz nou pe koz lo bann langazman ki pei i pran enternasyonalman.

Kote ki pour annan en finalite nou kapab donn en larepons pour Sesel wi in pran sa *commitment*, oubyen Sesel non pa'n pran sa *commitment*? Konpran? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mr Speaker, mersi. Mersi Onorab pour ou kekyon. Onorab, mon krwar ou pe refer lo en ensidan, ki mon krwar ou pe refer lo la, si nou pe konpran lo sa enn lensidan? *Ok*. Zeneral.

Zeneral sakenn antre nou, nou bezwen pran nou responsabilite. Nou bezwen sakenn antre nou pran nou responsabilite.

Si i en zafer ki konsern en Minister parey mon dir, sa Minister i bezwen pran son responsabilite, pour li adrese.

E mwan si i pa ganny adrese i evantuelman retourn kot mwan ki mwan konnen, mwan mon a rod en fason ki mannyer mon a adres sa probleman. Mersi.

MR SPEAKER

Bon mersi Minis. Nou a termin la lo sa kestyon. Osi in ariv ler pour nou pran poz mon regrete ki nou'n pran zis en kestyon Minis.

Me solman nou a retournen pour leres. Nou a pran poz Lasanble a rebran 11er. Mersi.

(BREAK)

MR SPEAKER

Bon, nou ava kontinyen ek kestyon nimerò 31 ki dan non Onorab Richard Labrosse e i pour ganny demande par Onorab Kelly Samynadin.

HON KELLY SAMYNADIN

Mersi Mr Speaker. Prosen kestyon Onorab Labrosse i lir konm swivan: -

Swivan bokou demann dan Lendistri Touris dan Sesel, eski Minis pour Tourizm i kapab enform Lasanble ki bann travay ki pe ganny fer pour *upgrade curriculum* Lakademi Touris STA? E ki bann loportinite ki annan pour bann profeser sa Lakademi? Mersi.

MR SPEAKER

Me eskiz mwan avan kestyon mon a zis rekonnet Mr Terence Max, ki'n zwenn *panel* devan lo latab. E mon a fer remarke osi

ki Anbasader Vivianne Fock Tave in sorti lo *panel*.

So nou annan Minis, Mrs Sherin Francis, e Mr Terence Max. Minis ou repons silvouple.

MINISTER SYLVESTRE RADEGONDE

Mr Speaker, mersi. Mersi Onorab pour kestyon. Mr Speaker, avek ou lotorizasyon mon ava pas laparol enn pti moman avek Direkter STA pour donn detay lo sa kestyon.

E zis koman en lentrodiksyon pour mwan dir mannyer Lakademi Touris an zeneral i ganny en kantite *challenge*, pa selman fizik me osi *challenge* dan bann lezot, lezot domenn ki nou pe sey adrese.

Nou plan ki nou le se ki sa lakademi i pa zis reste en Lakademi pour Sesel, Me ki nou kapab devlop li sifizaman pour li vin en lakademi kot nou kapab vann bann *course*, atir bann etidyan, ki sorti pa selman dan larezyon me pli lwen.

Sa nou vizyon ki nou annan, me annan en vizyon avek aktivman met li an pratik i pa toultan fasil. En kantite travay ki nou bezwen fer e i annan bann travay par egzanp enfrastruktir kot nou pe tou dousman, tou dousman re-sey,

sey remet sa landrwa lo en serten nivo. Mon pa pour al koz lo *challenge* striktirel ki annan. Me vwala plan ki nou annan.

So Mr Speaker si ou permet mwan mon ava pas laparol avek Direkter STA. Mersi.

MR SPEAKER

Mersi Mr Max Direkter STA ou annan laparol.

DIRECTOR STA TERENCE MAX

Bonzour Mr Speaker. Bonzour tou Manm Onorab e tou dimoun a lekout. Pour reponn keston Onorab.

An se moman STA nou pe ofer nou 9 diferan kour. 5 i lo nivo *Advance Certificate*, 4 i lo nivo *Certificate* apre nou annan enn ki lo nivo *Advance Diploma* ki nou apel ADHM.

Si nou pour koz lo nou *curriculum upgrade* sa lannen an 2024, atraver osi konsantman en laprouvasyon nou *Board*, Nou pe revisit tou nou bann program.

E nou pe travay etrwatman avek SQA par egzantp pour nou re-akredit tou nou bann program ki egziste. Sa mon krwar en legzersis osi ki pe fer dan tou bann lezot post segonder.

E sa i anvizaze pour ale ziskan Desanm, kot tou nou bann *course* ki nou annan la an se moman la, i ava ganny akredite.

E osi 2024 nou pe komans travay dan inisyé bann proze kot nou pour sey lans bann nouvo program. Parey nou koman en lakademi, nou manda sey *train* pour baze lo demann lendistri.

Alor an partenarya avek lendistri osi parey mon pe dir laprouvasyon *Board*, nou pe get lentrodiksyon posibilite 2025. Alor nou pe komans sa travay la 2024, pour nou entrodwir sa bann program ki nou apel spesyalizasyon.

Nou pour komans avek par egzantp nou'n agree pour nou koman avek *Sommelier Showmanship*.

E baze lo nou resours byensir kapasite parey Minis in dir, nou a kapab vwar en lot program parey lo nivo *boulangerie*, la patisri. Kot sa i bann kour spesyalizasyon pour nou fer bann travayer, oubyen bann dimoun ki'n pas STA e ki anvizaze spesyaliz dan bann *course* enn pti pe pli o nivo.

Sa nou'n *of course* avek kolaborasyon dan en distrik. Nou pour kapab ganny zot sipor atraver bann spesyalis, ki a vini i a donn sipor lo kote *training*.

E osi avek nou bann *partnership* ki nou annan avek bann lekol aletranze, par egzanzp enn si nou pe koz lo boulanzri, la patisri nou annan en *partnership* avek bann lekol *La Reunion*. Kot nou'n angaz nou zot in pare pour ed nou kekfwa avek bann spesyalis ki kapab vini, pour vin ofer sa bann *training*.

Apard ki sa nou depi 2023 nou'n lans en program ki apel *Foundation Course STA*. Sa i en *course* ki nou fer li pour 6 mwan pour bann zenn ki pa'n ganny loportinite antre *STA* atraver *national selection process*.

I en *pathway* kot nou'n ofer, nou'n konsyan poudir i annan bann zenn ki'n petet son nivo akademik. Akoz sa ki nou servi koman en *national entry criteria* pour fer zot antre, zot annan sa lanbisyon, sa lanvi pour devlop serten *skill* me selman zot napa loportinite pour antre *STA*.

Alor nou'n ofer en nouvo *pathway* anba *foundation*, kot zot fer 6 mwan. E nou'n komans zis avek lakwizin ankor baze lo limitasyon nou resours.

Zot fer 6 mwan e la si zot, zot *pass* zot pas zot bann legzanmen *by* March lannen prosen zot kapab antre lo sa *course apprenticeship STA*,

oubyen si zot anvi zot kapab antre dan lemond travay, osi.

Apré ti annan kestyon lo nivo devlopman nou bann profesyonnel. Lo sa kote nou annan bann loportinite kontinyelman pour form nou bann ansenyan.

Parey nou dir, nou annan bann *lecturers* zot baze *STA* me i enportan ki zot konpran enn pti pe, ki i pase dan lendistri.

So baze lo sa nou annan bann *training plan* ki nou devlope. E enn ladan se ki bann profeser *STA*, zot pe kontinyelman ganny loportinite pour zot al ganny *exposure*. Sa ki nou apel *industry exposure*, zot al dan lendistri pour serten letan pour vwar enn pti pe kwa ki bann nouvo keksoz ki annan dan lendistri.

Met zot azour ki zot kapab apre fer referans avek tousala ler zot pe, dan zot bann *course*. Apard ki sa nou osi annan bann posibilite kot nou, baze lo nou Bidze byensir e ki bann Lagreman ki nou annan, pour nou kontinyelman anvoy zot aletranze dan bann diferan lekol, oubyen letablisman ki nou annan bann diferan partenarya avek.

Pour zot ganny en pe *exposure international exposure*. Tousala i ede dan zot

personal development. *professional development.*

Osi nou ofer bann *course* parey *Advance Diploma* dan Ledikasyon kot bann profeser ki napa sa kalifikasyon, zot ganny loportinite pour zot *embark* lo sa - dan sa bann kour. E osi nou menm nou al lo pli o nivo ki nou antre lo bann kour *Masters* isi.

Me parey nou dir nou, nou kontinyen angaz nou pour nou devlop nou bann *staff* ki an retour zot kapab donn en *training* enn pti pe pli o nivo.

Parey Minis in dir nou vizyon se petet en zour al *beyond* Sesel, *beyond* la rezyon e mon krwar i enportan ki nou devlop nou bann *staff*.

Byensir baze lo nou Bidze ki nou annan. Mersi Mr Speaker.

MR SPEAKER

Mersi. Mersi Direkter. Siplemanter Onorab Samynadin.

HON KELLY SAMYNADIN

Mersi Minis e Mr Max pour zot larepons. Letan – Mr max in mansyonn kour *Masters* isi. Eski i annan pour fer avek okenn *MOU* ki zot annan pour fer ek Liniversite Sesel?

E dezyenm mon ti ava kontan konnen ki relevans sa

relasyon, ki zot annan avek bann lotel vizavi konteni *curriculum* i annan? Dan demars pour asire ki bann etidyan i kontinyelman ganny bann formasyon azour e de kalite. Mersi.

MR SPEAKER

Mersi. Minis, ou pour pas avek Mr Max. Yes, Direkter?

DIRECTOR STA TERENCE MAX

Mersi Mr Speaker. Mersi Onorab pour ou kestyon. Bon lo kote sa *Master's Degree* wi sa i en program Nasyonal ki ganny atraver Lagreman e zot ki ofer nou ki kantite seat nou kapab gannyen tou-le-z-an. Sa i premye kestyon.

Dezyenm kestyon, wi nou pour devlopman nou *curriculum*, parey ou konnen nou osi nou annan en *Board* ki diriz lekol.

E bokou zot, zot annan bann i swa bann otelye ki deza pe travay, ou bann *ex-otelye* ki anmenn bokou, bokou leksperyans lo *Board*.

E nou, ou travay etrwatman avek lendistri, nou annan en kolaborasyon vreman o nivo si mon kapab servi sa term.

Kot lendistri, i partisip en kantite dan lavi lakademi. Swa

an term kot zot ofer par egzantp byensir, bann *internship* pour manrmay. Kot nou bann *lecturers* i al vizit zot, bann *lecturers* i ganny ekspoze dan sa bann lotel.

E osi zot koman bann spesyalis nou ganny zot a souvandfwa pour zot vin *STA* nou envit zot, pour zot fer bann pti kour, oubyen menm donn en *talk*, bann keksoz koumsa.

So nou angaz nou en kantite avek lendistri. *At the end of the day* nou *train* pour zot. Alor sa ki nou fer i baze lo zot demann. Mersi Onorab. mersi Mr Speaker.

MR SPEAKER

Mersi Mr Max. Onorab Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour Minis ek ou lekip e bonzour tou dimoun ki a lekout.

Mr Speaker mon ti ava anvii konnen anvii ki sa kour (*ADHM*) *Advance Diploma and Hospitality Management*, in ganny met lo en *halt* pour lemoman, eski *any time soon* nou pour vwar ki sa *course* pour reganny entrodwir?

Anvii ki dan domenn lotelri i annan bokou, bokou lotel ki napa *senior*

management e menm *junior management* ou kapab dir ki Seselwa.

E dezyenmman Mr Speaker, mon ti a kontan konnen si i annan okenn swivi ki zot pe fer lo sa bann dimoun ki fini *Shannon College*. E ki annan en distrik, i al dan travay e ki souvandfwa zot rankontre bokou difikilte? Mersi.

MR SPEAKER

Mersi. Minis.

MINISTER SYLVESTRE RADEGONDE

Mersi Onorab. Mr Speaker mersi. Mon kontan sa loportinite pour mwan koz lo sa program *ADHM*. Enn bann keksoz ki mon'n fer ler mon'n – ler mon ti vini koman Minis ler mon ti ganny apwente.

Se mon ti oule regard sa program a fon e vwar si vremen i pe anmenn nou sa benefis ki nou sipoze pe gannyen.

Prenon kont ki sa program pe *run* pour omwen 10 an mon krwar. Mon'n mwan menm mwan koz avek dimoun dan lendistri isi, mon'n fer plizyer *meeting* avek bann ki'n pas *Shannon*.

Mon krwar nou'n zwenn tou manrmay, *Shannon* nou'n anvoy, nou'n anmenn zot dan

en *meeting one on one discussion* avek zot.

Mwan menm mwan mon'n al *Shannon*, pour mwan vwar fasilite lekol. Zwenn bann *lecturers*, profeser, ensidswit. *At the end of the day* ki nou le vwar, se nou le vwar en program ki donn nou valer pour larzan.

Ki sa *training* ki pe donner i ed nou bann manrmay *achieve* sa lobzektif pour lekel nou'n met zot dan sa program *in the first place*.

Onorab, mon a dir ou ki sa program i kout nou ser. I kout nou ser. Ziska konmela nou'n *train* anviron 129 manrmay, anfen mon apel zot manrmay. Ou konpran ki mon le dir, 129. Ler mon regarde i annan apenn 50poursan sa bann manrmay ki ozordi zot dan lendistri.

Sa lot 50poursan in ale, pour plizyer rezon. Bi sa program se *train*, nou bann zenn dimoun pour evantyelman pran en *post management* dan lotel. Se sa lobzektif.

I kout nou zis pour anvoy - kot manrmay i fer 3 an isi. E deza i fer 3 an isi, zot dernyen lannen zot al *Shannon Island*. Zis sa 1 an, *Shannon* i kout nou \$38 mil, par manrmay.

E nou pe *train* anviron en douzenn, nou bann *cohort* anviron, en douzenn a sak fwa.

Ou zis fer en kalkil konbyen i kout nou.

Alors sa bann manrmay i retournen, e apre i pa ni menm reste dan lendistri zot *move on*. Lefe ki zot pa reste dan lendistri, i pa neseserman solman zot lafot ler mwan mon'n koz ek zot. I annan plizyer rezon.

Prezan bann ki reste dan lendistri, pa pe avanse osi vit ki zot devret avanse. So ki nou'n fer, adres li dan plizyer fason. Nou bezwen adres nou bann problem lokal.

So mon dir be regarde, si manrmay i vini apre zot pa ganny swiv, napa person ki *monitor*, pour gete eski sa ki zot aprann pe ganny met an pratik.

Lyezou avek landrwa kot zot pe travay. Pour fer sir ki zot pe ganny en sans devlope, en sans avanse. *Is it happening?* Non. So nou'n met an plas, nou'n *revise* - ofet ti la avan mon ti vini.

Me nou'n reget sa *Mentors Committee* e nou'n met ladan, nou'n swazir ladan prensipalman Seselwa ofet, prensipalman bann ansyen *general managers* Seselwa, ouswa bann dimoun ki dan *trade*, ki annan leksperyans dan *tourism* pour swiv sa bann manrmay.

Don nou'n pran zot mete, nou'n dir zot be regarde nou annan sepa 12 sa bann *mentors*. Swazir avek ki zot le travay e *average* mon krwar i vin apepre kwa 4,5 par *mentor*.

E i sipoze swiv e nou prezan nou pour travay avek *mentor* pour fer sir ki zot progresse.

Inisyman mon krwar nou'n annan en pti pe difikilte to *set it of*. In ale, malerezman mon bezwen dir ki lentere sa bann zenn manm i pa'n a nivo ki nou ti oule.

Ozordi mon krwar, i annan apepre menm en senkantenn dan sa 50poursan ki pe aktyelman travay avek en *mentor*.

Selman sa bann menm apre zot vin dir ou, mon pa pe ganny lavansman. Nou, nou le ganny serten levidans ki nou kapab al avek. Pa ou dir mwan ou'n ganny sertifika sorti *Shannon*, mon kalifye alor mon kapab vin en *manager*.

Nou le travay avek *mentors*, Seselwa ki'n dan lendistri, ki konn bann *challenge, in and out of the industry*, ki kapab dir nou, be vwala, Mr Hoareau war son abilite, mon krwar i kapab progresse.

Nou, nou al avek sa ki nou kapab asiz avek *management*

lotel pour nou rode si sa dimoun pa pe avanse e i pa pe avans a nivo, a vites ki nou le akoz?

Be ler ou deside ou pa pour enterese avek *mentors* program, ou le al rod ou semen ou tousel, i difisil pour nou ed ou. Ou konpran mwan. So nou annan sa *challenge*.

Prezan lo *challenge* se ki *cost*. Eski nou pou kontinyen pey \$38 mil, pour en etidyan, ki apre nou napa garanti ki pour reste?

So se sa nou dir be regarde nou pour met tousala aplat pour program *ADHM, ADHM* nou pa pe arete nou, i pour kontinyen.

Me nou dir annou rod en lot mekanizm, ki petet i a pli efikas me sertenman kot mwens tout an gardan sa laspe valer pour larzan.

Donk, mon pa konnen si mon kapab dir piblikman *Shannon by now*, in ganny zot let - pa ankor - *anyway*. Ki nou le fer? Se ki nou le sispann sa korperasyon ki nou annan avek *Shannon*.

Sispann. Nou an diskisyon avek de lezot kolez enternasyonal. La ler nou pe regarde *cost* ki zot pe donn nou, pour en etidyan i lanmwatye sa ki *Shannon* pe sarz nou.

Pour nou met en etidyan avek zot pour 1 an edmi, nou pe ganny li pour \$16 mil.

E si nou al pour sa destinasyon ki nou krwar, nou pour kapab travay avek; en destinasyon ki tropik, ki kapab donn bokou plis *exposure* manrmay. Pa selman dan sa pei li menm, me an deor sa pei.

E se sa ti *handicap Shannon*, i pa ti kapab vreman anvoy manrmay dan bann lezot pei, par egzanp dan en *beach resort holiday* kot manrmay bezwen *practice* ladan.

So vwala nou pe, nou pe fer sa bann soz ki nou pour sispann regard en lot posibilite, ki nou kapab ganny valer pour larzan me nou le kontinyen avek sa program.

Mon'n dir osi mon'n demann tou dimoun pour osi reflexir lo sa zafer. Eski nou kontinyen pran bann zenn manrmay 18 an ki petet a sa laz ou pa ankor konnen kwa ki ou oule?

Mwan mon dir ou ziska konmela mon pa tro konnen kwa ki mon oule. *Let alone* en manrmay 18 an. Eski nou kontinyen pran zot, pey sa kantite larzan, anvoy zot *training* ki apre deside be la mon'n vini. Mon pa krwar sa ti soz..

Mwan mon swa personnel e mon dir eski i pa meyer les sa bann manrmay al dan lendistri. Konnen ki mannyer i ete pour leve granmaten 4er bomaten travay, ganny ensilte avek kliyan, kondisyon laba.

E *from that* nou pran bann ki pli motive, *less maybe* me ou a gannyen enn pli pti group motive ki ou konnen i pour reste dan lendistri. *It's worth investing in the.*

Mwan koumsa ki mon vwar keksoz e petet sa direksyon ki mon pe ankouraz mon tim pour nou al ver. Me program *training* pour nou ganny *managers*, nou pour kontinyen. Mersi Onorab.

MR SPEAKER

Mersi Minis. Onorab Monthy.

HON PHILIP MONTHY

Mersi Mr Speaker. Bonzour Minis, bonzour *PS* Francis. Bonzour Mr Max e tou dimoun a lekout. Ler nou pe koz lo *upgrade curriculum*, ou konnen *STA* i annan bokou pratik osi ki deroule. E i marye ansanm avek lenplimantasyon *curriculum*.

So lo nivo lenfrastruktir pour ed sa bann zenn mye aprann. Eski i alaoter oubyen zot ankor pe fer fas a bann *challenges* vizavi lenfrastruktir?

E apre lo bann *course* ki poursantaz bann *course* ki'n *validate* par *SQA*, *STA*. Eski tou *course* in ganny *validate* oubyen i annan ki ankor pe pas dan sa prosesis?

E donn nou enn pti leksplikasyon lo akredite *STA* li menm koman en lenstitisyon si sa in arive? Mersi.

MR SPEAKER

Limit kestyon pour de. Nou annan plizyer Manm ki anvi demann kestyon. Minis, ou repons.

MINISTER SYLVESTRE RADEGONDE

Mr Speaker mersi. Mersi Onorab pour kestyon. Lo kestyon enfrastruktir mon a fer enn de remark, e Direkter ki viv sa toulezour i a kapab koz plis lo la. E apre pran sa dezyenm kestyon ki ou'n demande koman *validation* bann *course*.

Regard mwan sa landrwa ki *STA* ozordi, nou konnen nou tou i pa en landrwa ki'n *design* inisyalman pour vin en *training school* pour *tourism*. Non, nou'n al la, nou'n pran sa bann fasilite ki ti la avek ansyen *Tracking Station*.

E parey souvan nou fer nou tap, tap isi tap, tap laba azout en bout, en *building* la, azout en bout laba. E prezan i

en *mismatched of everything*. Mwan si ou demann mwan mon pa dan lansennyman mwan.

Me mon pa vwar vremen sa landrwa i *conducive*. E enn dan bann diskisyon ki nou ti pe, nou ti'n fer resaman. Eski pa i meyer, ziskan ler la *it's prime property*.

Eski pa i meyer nou dir Gouvernman rebran sa zafer ek tou son bann bout, bout ki annan. Petet lwe ek en dimoun ki ava pey *prime rent*. Nou al kekpar kot nou kapab ganny en lenfrastruktir, ki vremen bon pour son *purpose*.

So kantite problem, la nou pe fer katin pour etidyan mon krwar i preski fini, i a gannyen. La nou pe fer en bout se la ou bezwen travay dapre, dapre finans ki nou gannyen. Aranz lasal manze, aranz lakwizin pour *training*.

Me ler mon regarde pour nou fini sa bann lenfrastruktir pour met li lo nivo mo krwar i devret ete. I pour plizyer lannen. I sertenman pa pour dan mon letan, sa i kler. Mon pa konnen si i pour dan ou letan osi Onorab pour dir ou fransman.

Akoz i en *long process* mannyer mon vwar. Be direkter ek son tim, i viv sa toulezour e mon apresye sa motivasyon ki bann *staff* i annan. Malgre sa

bann difikilte pour kontinyen delivre pour nou bann etidyan.

Nou pa kapab dir manmay, be ogarde ou pe *train* pour en lendistri ki vwala nivo *tourism* Sesel. Me selman ou dan en landrwa kot ler lapli i tonbe, ou bezwen met seo pour anmas delo koman en legzanp, ou pe mars lo soz, *floor* ki ou vwar pe *crack*.

Me ou dir li ou konnen ou pe al *training* laba, ou servis ki ou pe al donner dan lotel la i bezwen *top*. Kan ou lanvironnman ou *training* kot ou ete i pa *top* ditou, i mwens pour *top*. Lo, validasyon Direkter.

MR SPEAKER

Wi Direkter, nou a sey fer li bref silvouple.

DIRECTOR STA TERENCE MAX

Mersi Mr Speaker. Mersi Minister. Wi lo kote akreditasyon nou bann *course* parey mon'n dir o komansman la sa lannen nou pe - anfen SQA i servi sa term akreditasyon prezan.

Tou nou bann *course* nou pe re-*validate*, oubyen re-akredit zot, parey tou bann lezot pos-segonder. Sa nou pour fini *by December*. Nou'n fini *submit* tou e nou pe travay

ek SQA etrwatman pour nou kapab fini sa proze *this year*.

Lo kote STA akreditasyon. Wi mon byen kontan poudir ki apre plis ki 10 an, 12 an lannen pase STA koman en lenstitisyon in ganny akredite par SQA. Mersi Onorab.

MR SPEAKER

Thank you Direkter. Onorab Loze.

HON JOHAN LOZE

Mersi Mr Speaker. Minis, mon ti pe formil mon kestasyon baze lo sa ki ou ti'n dir *previously*, ki ou pa pour antre dan detay ou bann *challenge* lenfrastruktir.

Mon ti'n formil mon kestasyon baze lo la, apre mon vwar antre dan en pe detay. So mon a zis demann ou Minis. Eski zot demann Bidze 2025 i pour reflekte en pe sa bann *challenges* ki ou pe met devan nou?

En fason ki nou a kapab siport mon zanmi lekol Mr Max pour li aranz en pe son bann problem enfrastruktir ki i annan, ki zot pa tonm dan bann menm sityasyon ki *NIHSS fungus*, lakwizin brile, sepa kwa. Mersi Mr Speaker.

MR SPEAKER

Mersi. Onorab.

MINISTER SYLVESTRE RADEGONDE

Mr Speaker, mersi. Mersi Onorab pour kestyon. *Short answer* se wi. Mon krwar tou MDA ler i fer son Bidze lafen lannen, i toultan met propoz en Bidze ki krwar i pour adres – ed li adres bann *challenge* ki annan.

So nou'n fer li sa lannen, nou'n fer li lannen pase, fer li sa lannen, nou pour fer li ankor pour Bidze ki pe vini.

Me ant fer en demann, avek aktyelman ganny sa ki ou gannyen, i de keksoz. E nou konnen *challenge* ki pei i annan an zeneral, kot nou annan en po ki zis en serten groser, e sa ki dan sa po i bezwen ganny distribye e priyorite i ayer.

Konmsi nou annan priyorite dan priyorite e i fer ki parey mon dir, pour nou, nou pour bezwen esper ankor enn pti pe letan. Mersi.

MR SPEAKER

Mersi. Onorab Pillay.

HON SEBASTIEN PILLAY

Mersi Mr Speaker. Mr Speaker, mon annan devan mwan la mon pe get bann diferan *course* ki STA i ofer. Komans avek *Advance Certificate in Restaurant and Bar Services*, *Advance Certificate in*

Reception, Advance Certificate in Wellness and Spa.

E akote, sa i sorti kot SQA, akote *status* tousala i *under review*. Prenon kont en etidyan STA i fini, e i ganny en sertifika. Eski SQA pour *validate* sa sertifika si sa *course* pa *accredited*?

E lefe ki napa sa akreditasyon eski sa pa i dezavantaz nou bann *graduate STA* pa rapor a ganny louvraz dan bann gran lotel, kot bann gran lasenn lotel. Prenon kont zot sistenm enternasyonal ki Minis i konn tre byen.

I bezwen pran bann dimoun ki'n deza matrikile ki deza akredite eksetera ki zot bann kalifikasyon. Eski sa pa enpoz en dezavantaz. Alor ki ou pe fer pour met presyon, pour met plis lanfaz pour ki SQA i termin sa prosesis revi? E ki ou bann *course* ler ou bann etidyan pe *graduate* zot sertifika i kapab ganny *validate*.

E apre lo en pwen ki Minis in touse vizavi sa *site* kot STA i ete. Minis mon pa ti a kontan krwar ki Gouvernman in fini fer kek desizyon petet kekfwaw ou pa konnen. Prezan ou pe sey averti nou boner pour zot al donn STA en kelken kelkonk akoz mon vwar en kantite vizit ale vini UAE ki Prezidan pe fer.

Pa dir mwan nou pe al donn ankor laba anler Arab ankor? Konmsi, mon konsernen Mr Speaker ler mon tann sa. Mersi Mr Speaker.

MR SPEAKER

Minis.

HON SEBASTIEN PILLAY

Minis ki'n entrodwi mon pe zis rode Mr Speaker.

MR SPEAKER

Minis repons silvouple.

HON SEBASTIEN PILLAY

Mon pe rode lo non Lepep Seselwa se tou.

MINISTER SYLVESTRE RADEGONDE

Mr Speaker mersi. Onorab mersi. Mon a pran sa dernyen kestyon, apre direkter i a reponn bann lezot ki ou'n demande.

Non Mr Speaker, ler mon pe koz avek ou la napa okenn diskisyon avek okenn personn pour donn sa *site* personn. Sa ti mon lide, ti mon lide pa pour sonn Arab *or anybody*.

Ti mon nide, al kek par fer en *proper* lenstitisyon pour *accommodate* avek tou fasilite pour *accommodate* lekol e lwe sa landrwa.

Sa ti mon propozisyon me pa ti ganny aksepte e napa plan pour fer nanryen avek sa. *STA* pou reste la kot i ete. Mersi.

MR SPEAKER

Mersi ou pour pas laparol Mr Max.

DIRECTOR STA TERENCE MAX

Mersi Mr Speaker. Mersi Onorab. Pour ou kestyon konsernan validasyon bann sertifika. Nou travay tre pre avek *SQA* e *over the years* nou'n fer en kantite, nou'n devlop bann nouvo *courses* ki zot in – ki'n ganny *validate*.

Be sa lannen i en legzersis ki *SQA* pe demann tou bann lezot post segonder osi pour fer, kot zot pour re-akredite tou bann *course* ki egziste. E sa nou'n fini komanse deza, nou'n fini *submit* tou nou bann *course* ki egziste an se moman.

E nou annan en *QA STA* ki *dedicated*, pour fer sa travay. E nou anvizaze ki sa bann *course* i ganny akredite *before end of the year*.

So si ou pe koz lo bann lezot manrmay ki'n deza ganny sertifika. Non, zot pa dan okenn sirkonstans dezavantaze, *SQA* i rekonnnet zot sertifika.

E la i zis en *matter* ki nou ava re-akradite apre osi nou

annan nou bann nouvo *course* parey mon'n dir nou anvi entrodwir.

Tousala i en legzersis sa lannen, ki nou anvi *fini by December this year* Onorab. Mersi si mon'n reponn ou kestyon.

MR SPEAKER

Mersi. Mersi Direkter. Bon nou'n pran 30 minit lo sa kestyon deza. Me selman vi lentere, mon pour – donn li ankor detrwa minit. Mon pa konnen si mon pour kapab ganny tou. Kestyon bref e repons bref silvouple. Onorab Gill.

HON CHURCHILL GILL

Mersi Mr Speaker. Bonzour Minis avek delegasyon. Vi ki sa lendistri i tre enportan pour nou pei.

Eski sa dernyen 3 an Minister in kapab reponn demann lendistri pour kapab ranplas dimoun etranze, si nou santi nou satisfè sa ki nou'n kapab fer la dernyen 3 an?

Aprè mon dezyenm kestyon se ou'n nonm sa formil ozordi ki mannyer i pe kout ou Minister en kantite pour *STA* avek *Shannon*.

E petet fason ki nou pe fer, petet in ler pour nou revize aköz ler ou kont kantite etidyan ki

ale, si ou ti pour pran profeser pour ou anvoye pour zot *acquire* sa bann *skills*, apre vin pratik avek manrmay.

I ti pour kout ou bokou pli bon marse. So petet in ler pour nou reviz sa formil ki nou pe fer. Mersi.

MR SPEAKER

Mersi. Minis.

MINISTER SYLVESTRE RADEGONDE

Mr Speaker mersi. Mersi Onorab pour ou kestyon. Eski dan sa 3an nou'n kapab satisfè demann *in terms of* resours imen dan lendistri? Non. Non.

Mon pa krwar nou *anywhere near*, i annan en kantite travay pour fer, i annan en kantite kontrent ki annan. I annan ki ou menm ou konnen ki nou bezwen travay lo la.

Me nou serye pour nou kontinyen, tou sa bann diferan *course* ki Direkter in koz lo la. Par egzanp Praslin. Ou okouran ki nou'n komans sa *Foundation Course*.

Akoz nou war i annan en mank kwizinyen, pour *at least* dimoun pour travay dan lakwizin. Sesel an zeneral, me Praslin petet ti'n ganny en pe neglize, kot nou'n komanse i annan 10 dimoun lo sa program la. I en komansman.

Donk pour nou kapab satisfè menm dan lakwizin demann se pa demen osi. Me nou annan *so much* resours ki nou kapab soz. Nou servi, nou fer *maximum* avèk resours ki nou annan, nou le *achieve*.

Lo ou pwen konsènan anmèn en sèkter isi petet olye anvoy manm deor. I annan *pros and cons*. Mon krwar i byen osi ki nou bann etidyan i ganny osi *international exposure*.

Zot ganny sa sans al deor, pwiske evantyelman zot pour travay avèk touris zot. Touris prensipalman i sorti deor. So i byen ki zot ganny sa *international exposure*, e nou – i koute. Tou keksoz i koute, tou keksoz i annan en kou. Ou pa pour ganny li parfe dan tou le ka. Mersi.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Mr Speaker, eski Minis i kapab dir nou an term *staffing*, sirtou bann *lecturers*. Si zot Lakademi pe *operate* antyerman avèk *staffing* Seselwa oubyen i annan etranze? Si wi ki zot *ratio*?

E dezyenmman sa konsèrn ki Minis in met devan.

Eski a lavenir zot pe mazin *bond* sa bann etidyan pour ki zot trounen, zot vin travay pour zot pei? Mersi.

MR SPEAKER

Thank you. Minis. Mr Max wi.

DIRECTOR STA TERENCE MAX

Mersi Mr Speaker. Mersi Onorab. Wi STA an se moman nou tou nou *staff* i antyerman Seselwa. Par kont nou osi ofer langaz STA, nou fer Alman, nou fer *Madarin*, nou fer Italyen osi tou.

E la mon kapab dir nou ganny kolaborasyon avèk *CONFEGES*, Lasin. Kot zot vin *teach Mandarin*, apre osi nou annan en *lecturer part time* ki fer Alman.

Be selman tou nou *staff*, nou *full time staff* zot Seselwa antyerman.

MR SPEAKER

Mersi. Ti annan en pwen lo *bonding*, kapab reponn dan enn de mo silvouple.

MINISTER SYLVESTRE RADEGONDE

Mr Speaker. Onorab, mersi. Mon pour dir ou fransman mon napa lenformasyon lo *bonding*. (Mon annan lenformasyon ki

mon kapab rode Direkter ou pa okouran, si sa bann manrmay i ganny *bond*?)

Me pour konmela *bond* i pa, *doesn't change much*. Parske manrmay tou zot tou zot retournen Sesel. Me zis zot pa reste dan lendistri. *So sa i issue* ki nou bezwen adrese.

MR SPEAKER

Thank you. Mon bezwen termin la lo sa kestyon. Manm, Manm ki annan ankor kestyon, met an ekri nou a reganny Minis en lot ler. Mersi.

Fotespere nou a kapab ratrape avek letan, lo bann lezot kestyon. Kestyon 32 Onorab Philip Arissol.

HON PHILIP ARISSOL

Mersi Mr Speaker. Bonzour tou dimoun. Kestyon i lir koumsa:-

Eski Minis i kapab dekrir avek Lasanble ki progre son Minister lo rekiperasyon Lendistri Touris Sesel ziska la an 2023, swivan Covid-19 an 2020, e ki bann risk, *challenge* e difikilte ki Minis i war pe afekte ouswa ki kapab afekte nou Lendistri Tourizm? Mersi.

MR SPEAKER

Mersi. Minis.

MINISTER SYLVESTRE RADEGONDE

Mersi Mr Speaker. Mersi Onorab pour kestyon. Mr Speaker, mon le ed ou e sey vin osi bref ki posib.

Annandler sa bann size i - ou bezwen donn en pe *background* e mon konpran ou kontrent.

MR SPEAKER

Non *go ahead* fer sa ki ou bezwen Minis.

MINISTER SYLVESTRE RADEGONDE

Mon bezwen mon krwar tou dimoun i konnen ki depi – anfen *COVID* i pa'n en letan fasil pour personn e *more so* pour lendistri.

Mon ler mon ti vin Minis, ti vre sityasyon *COVID* ti tel ki Lendistri Touris ti preski azenou. Parske lefe i reste lefe ki Erport ti fermen, lemonn pa ti pe vwayaze, ti napa nanryen. En kantite travay ki nou'n fer apre vaksinasyon, pour kapab reouver frontyer pour viziter komans vini.

Me sa ki mon bezwen dir mon krwar en leson ki nou'n tire dan *COVID* se ki, mon bann predeser avan *i must say* ti pe fer. E mon pa kapab pran tou sa laglwar, si laglwar i ete.

Nesesite pour nou diversifye nou marse. Akoz ki nou'n war ki ler frontyer in

komans ouver, touris i komans vwayaze, ler nou, nou'n ouver laport pour touris vini. Touris ki sorti dan nou bann *source markets*, ouswa serten *source markets* pa ti kapab vini.

Ouswa si zot ti vini, pour zot reantre dan zot pei avan, bann kondisyon ti tel ki dekouraz zot konpletman pour vini. So enn bann keksoz leson ki nou'n tire ladan, se ki nou bezwen a tou pri diversifye nou marse.

Nou pa kapab kontinyen *focus* lo Lerop, *Western Europe in particular*, nou pa kapab kontinyen. Nou bezwen regard partou posibilite. En mannyer ki ler laport i fermen, ou kapab regarde si en lot i kapab ouver, en lafnet i kapab ouver.

Si ou bezwen pas anba baro *or whatever* pour nou kapab kontinyen fonksyonnen. So sa mon krwar nou pe *achieve*.

Ozordi ler mon pe koze mon krwar nou dan en sityasyon kot mon pa dir tou keksoz i parfe. Parske *challenge* i ankor annan en kantite.

Me *in terms of* pos COVID ler mon koz avek mon bann lezot koleg ki dan sa lendistri. Mon kontan ki Sesel i dan en pozisyon ki meyer, parske pour nou mon kapab dir dan Lendistri Touris *in terms of*

larive touris, depans touris ensidswit.

Nou dir COVID i preski deryer nou antyerman. So nou *recovery have been fast*, e i kontinyen *fast*. Nou'n fer en bon lannen, lannen pase plis ki nou ti pe ekspekte nou'n ganny 5poursan an plis *in terms of arrivals*.

Be osi *in terms of* depans touris. I bokou plis. Reveni ofisyel ki touris in depanse dan lekonomi Sesel, nou panse – anfen pa nou panse. Dapre statistik ki nou gannyen avek Labank Santral i R960 milyon.

Mwan mon ti'n target 1 milyar- *one billion*. 960 e se sa. 989 ou war mon – *even better*. So pli pros avek target ki mwan mon ti'n mete.

Ki nou ti le fer? E ki nou pe kontinyen fer? Se ki bann touris ki nou pe, nou pe atire. Nou dir osi nou bezwen *maximize* reveni ki nou gannyen avek bann viziter.

E dimoun annandler i mal konpran kwa ki mon pe dir par *maximize*. *Maximize* mon pa pe dir, vol touris mwan, mon pa pe dir *overcharge*. Me mon pe dir fer en keksoz, fer aktivite ki touris i kapab depanse.

I bezwen annan aktivite, plizyer aktivite lokal pour dimoun depanse ki touris i kit larzan dan lekonomi, i pa re-ale

avek son larzan dan son pos. Plis ki koze nou menm nou *tourism*, nou'n fer en kantite zefor nou menm.

Serten zot a konnen ki nou'n travay avek serten distrik anviron 8 distrik ki nou'n fer. Nou'n idantifye, nou'n al ladan, regarde ki i annan dan sa bann distrik. Ki aktivite ki annan ki nou kapab servi pour ankouraz touris al depanse, al fer sa bann aktivite.

Le bi nou le tir touris dan lotel ek lo lans, anvoy zot dan kominote, fer aktivite, ki zot depanse. I en aktivite pour zot, en bon leksperyans pour zot, ki zot pa neserman gannyen dan en destinasyon, dan en pei o bor nou.

Me i osi donn en reveni nou dimoun ki pe fer sa bann aktivite. Anplis ki sa depi lannen pase nou'n komans nou bann aktivite *Kreol Randevou*, enn pti pe parey Bazar Labrin ti ete. Me ki nou desantraliz li.

E prensipalman ozordi nou fer li Praslin e La Digue. Nou'n fer 3 La Digue - non 3 Praslin, 4 La Digue. An plis ki sa nou pe travay avek pa Departman Kiltir – Lenstiti pour nou, ler zot fer sa bann aktivite Val De Pres, nou kolabor avek zot pour nou fer sa bann aktivite.

Koman bann aktivite, pa selman pour Seselwa me pour ankouraz touris sorti e depanse. So vwala kot nou ete, e an plis ki sa i annan bann lezot linisyativ ki nou'n pran.

Par egzanp nou *Tourism Club*, nou panse ki i neser dan nou pei pour nou sanz nou mantalite vizavi viziter, vizavi touris. Sa lendistri ki tre enportan pour nou.

E nou panse ki sa i kapab mye fer, par bann zanfan e se sa dan tou lekol ozordi nou annan en *Tourism Club*, zenn pti manrmay ki donn zot boner sa kiltir servis pour li lapropte, proteksyon lanvironnman ensidswit.

E sa nou *partner* avek *Trade*. Sa bann klib i ganny *sponsor* par nou bann *partners* dan *Trade*, en lotel, restoran en biznes touris ki *sponsor* zot.

So nou pe fer en kantite. *Now*, risk. Risk Mr Chair i reste en kantite, en kantite fodre pa konmsi nou pran li alalez. Parske i bann risk ki pour riske afekte nou, ki pour riske touy sa *tourism industry*.

I annan nou bann risk eksteryer, ki nou tou nou konnen nou'n sorti dan *COVID*. Me ozordi i annan de lager, de konfli prensipal dan lemond ki pe menas nou lendistri.

Lager ant *Ukraine* avek Larisi, i ankor en problemn. I reste en problemn pour nou marse *tourism*. Ozordi mon krwar nou ti devret fer pli byen, si ti napa sa lager.

La resaman in annan sa problemn *Hamas* avek Izrael. E ler nou regarde petet reperkisyon i bokou plis lo nou, ki sa enn avan ki mon'n dir. E si ti napa e petet nou ti pour bokou pli devan.

E apre an rezilta bann lager, an rezilta bann konfli, an rezilta bann lezot sityasyon politik dan bann diferan marse, i fer ki dimoun i war li difisil pour vwayaze.

Lerop serten pei Lerop ozordi avek nivo lenflasyon, kou lavi. Dimoun ki annan son pti larzan i ase pour li viv, pour li pey son bil, napa larzan pour met akote pour li vwayaze.

E si i kapab vwayaze i vini i sa bann touris ki evantyeleman i le vwayaz zis par bis, pandan son en semenn ki la i le zis al dan *takeaway* pandan son en semenn ki i la.

Mon pa le ganny kadase avek bann dimoun ki *run takeaway*, poudir ki mon kont *takeaway*. Mon pa kont *takeaway*, mon sertenman pa kont *takeaway*.

Mon krwar *takeaway* souvan i donn en loportinite, en

viziter pour li ganny en keksoz Kreol otantik. Mon ankouraze sa.

Me selman mwan *issue*, si en touris ki vini i vin Sesel toulezour lasemenn ki i la, son landrwa manze se dan *takeaway* nou pour annan en problemn.

Pa konnen si zot war sa problemn. I bann touris ki pa pe kontribye dan lekonomi. Kan mannyer ou pour kapab annan en lendistri demen ki pa kapab pey nou bann Bidze, pour nou bann diferan Minister.

En lendistri ki pilye nou lekonomi, kot ou annan touris ki toulezour pe pran en bis, ki nou, nou *subsidize* dabor. I le vwayaz *que* par bis, i le manz zis dan *takeaway*. Se sa mon problemn mwan.

Be apard sa non. Mon krwar touris i devret ganny ankouraze al dan *takeaway*. Wi pa toulezour al dan *takeaway*, al dan bann vilaz si zot le al bwar lapire zot a bwar kalou. Mon kontan, zot ganny sa leksperyans. Osi lontan ki pa toulezour, i le bwar zis kalou, zis lapire.

Mon le osi bann dimoun ki *run* en biznes, i osi kapab ganny en pe reveni. Sa lo soz enternasyonal. Isi kot nou - mon pe konklir lo la Mr Speaker.

Nou annan nou bann *challenge* ki nou tou nou konnen, nou tou nou konnen. Mr Speaker, Onorab ozordi sekirite, touris i ankor en *issue*, i ankor en *issue*. Kot touris pa santi zot an sekirite.

Semenn pase nou'n annan sa latak lo en *trail*. Vol, vol touris i ankor pe arive lo lans, dan bann lasanm lotel, i ankor pe arive. Nou ler i arive i nou sey fer mannyer kouper parske nou pa oule sa nouvel i sorti, i al dan *market* pour efrey lezot viziter vini.

Overcharging. Overcharge. Onorab Hoareau ou konnen lo ou lans laba. *Overcharge* en koko sarz sepa konbyen. Kot Onorab Aglae osi, mon pa konnen si i mwens la. Me serten landrwa la dan distrik mon konnen. *Overcharge.* Nou dir en keksoz vann, me i bezwen en keksoz valer pour larzan.

Dimoun i konplent Sesel i ser. Sesel i pa ti pour ser, ou ganny *perceive to be* ser li, si keksoz ki ti ganny vann dimoun ti war li valer pour larzan. Me la ou a krwar i annan en, mon krwar en nespes *practice* dimoun i le tir *maximum* ki zot kapab.

Oubliy demen, nou'n ganny en touris la, nou pour tir *maximum* avek li, tanpi ki arive. Sa i bann risk ki nou bezwen

adrese. Apre i annan lezot, lisyen eran, i annan zafer salte, bann bin ki pa netway a ler ensidswit.

Dan bin mon konnen dimoun i kritik, lanvironnman i kritik *LWMA*. Me nou bezwen nou osi nou koman Seselwa, pran nou responsabilite. I annan bin, nou met keksoz dan bin. Ou pa zis pase balanse. Nou bann salte, balanse dan loto.

Tou dimoun pe swiv - anfen mwan ki ti pe *drive*, petet si mon ti annan en dimoun avek mwan mon ti pour fer mannyer aret sa dimoun. Mon pe *drive* lo *highway*, i kler ki en dimoun ki ti pe *drive*, zot pe bwar dan son loto.

I fini ek son ver plastik, i balans par lafnet devan mwan lanmenm. Balanse. Sa enn konbyen? Miltipliy par konbyen ki pe fer lo bann semen. Ou konpran!

Sa i bann *challenge* ki nou bezwen, nou bezwen adrese pour Sesel reste sa destinasyon ki reste konpetitiv. En mannyer ki dimoun ler i get Sesel i konnen pa bar li. Vwala sa ki mon le dir Mr Speaker lo la mersi.

MR SPEAKER

Mersi Minis. Onorab Arissol, ou siplemanter.

HON PHILIP ARISSOL

Mersi Mr Speaker. Minis, vi ki nou'n ariv premye kar 2024. Eski ou pe prevwar en logmantasyon dan larive touris pour lannen 2024. Mersi.

MR SPEAKER

Anh i ok – ou. Konmsi ou'n al lo en lot size la. E mon war i annan en kestyon lo sif touris en pe pli tar ki mon'n gannyen. Nou a esper sa.

Mon a bezwen sey pran enn de kestyon siplemanter lezot Manm. Onorab Cosgrow.

HON WALLACE COSGROW

Mersi Mr Speaker. Bonzour Minis. Bonzour delegasyon. Mr Speaker kle pour nou kapab rekipere dan Lendistri Touris apre sa *challenge COVID-19*, se enkli – dan mon pwennvi. Enkli mazorite posibil Seselwa dan lendistri.

COVID-19 in montre nou ki poudir, ler ti tape bokou etranze ti bezwen ale. Apre ti pran nou en pe letan pour nou relanse aköz bokou bann travayer ti an deor.

Ozordi nou annan landrwa, par egzanzp *Destination Management Companies* kot i annan etranze en Franse ki la *GOP* i ganny *renew, renew* otomatikman.

So ki zot, ki zot ki travay zot pe fer pour ki zot kapab lokaliz mazorite post. Mon konnen pa tou ki posibil, me lokaliz mazorite post dan sekter tourizm isi Sesel? Mersi.

MR SPEAKER

Mersi Minis.

MINISTER SYLVESTRE RADEGONDE

Mr Speaker, mersi. Mersi Onorab pour ou kestyon. Regard mwan sa i en kestyon mon a dir pa tonm vremen dan mon *purview*, parske *GOP* pa nou ki donner. Me i en korperasyon ki nou gannyen.

E mon bezwen dir ki Lanplwa i lyez avek nou avan ler renouvle, ouswa donn en *GOP*. En *GOP* ki sa swa lo nivo *management* ouswa dan en lot post, i pour donn en post ki napa, napa en lokal ki kapab fer li. E se sa.

I annan serten eksepsyon *though*, kot i annan serten bann lasenn lotel, be sa i aplikab pa zis Sesel. Me dan plizyer pei i annan bann lasenn lotel ki plizoumwenn ensiste ki a serten nivo dan zot *management* i zot dimoun. Zot *brand* i demande ki zot dimoun, ki zot in *train*.

Konpromi ki nou gannyen avek zot se ki *ok*, pour en serten letan wi. Me i bezwen annan en

lokal ki ganny *understudy*, *train* ki evantyelman osi i ava vin *branded pour take over*.

MR SPEAKER

Ok, Minis in terminen. Eskize mon pa ti'n realize. Nou a pran kestyon Onorab Andre.

HON CLIFFORD ANDRE

Mersi Mr Speaker. Bonzour Minis avek ou delegasyon, tou dimoun ki a lekout. Minis letan nou pe get sa kestyon e nou pe rode ki mannyer nou maksimiz reveni e ou'n koz lo la, reveni ki touris i mete.

Eski letan nou pe konsider sa nou pe osi gete ki mannyer, laspe *transfer pricing*. Akoz mon pe gete ou pe maksimiz lo touris. Me kekfwa i annan sa bann letablisman touristik li menm ki nou osi nou bezwen gete ki mannyer nou kapab ganny maksimonm avek zot.

E nou konnen i annan sa *issue* ki Minister Finans in komans travay lo la zafer *transfer pricing*. So eski nou'n ariv en zistans lo la pour nou kapab parey mon pe dir, ki Sesel i benefisyé maksimonm? Mersi.

MR SPEAKER

Mersi. Minis.

MINISTER SYLVESTRE RADEGONDE

Mersi Mr Speaker. Mersi Onorab. Mon krwar ou menm ou'n dir Minis Finans, Minister Finans i annan en travay ki i pe fer e i ava - ler in pare li fer serten lanons si i bezwen fer lanons.

E mon konnen, mon'n rekonfirman bomaten avek Minis Finans ki travay *is ongoing*.

MR SPEAKER

Mersi. Bon nou - mon krwar mon pour bezwen bouz lo bann lezot kestyon. Sansan mon pa pour fer zot zistis. I reste mwan 2 kestyon e i reste apepre 35minit. Onorab Aglae ou kestyon nimerò 33.

HON EGBERT AGLAE

Mersi Mr Speaker. Ankor enn fwa bonzour Minis ek *panel*. Kestyon konm swivan:-

Eski Minis i kapab dir ek sa Lasanble ki plan e sipòrt son Minister pou nou bann artis lokal ki perform dan bann letablisman touristik e valoriz nou kiltir. Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mr Speaker. Mersi Onorab. Mersi pour ou kestyon. Menm si kiltir ou devlopman kiltir pa tonm direktman anba mon Minister. Nou travay avek Lenstiti Lar ek Kiltir, pour adres sa issue.

Dan *tourism* nou reste angaze, e sa i en pwen ki nou fer a sak fwa. Parske nou annan en *forum* bann *general managers*, bann gran lotel. I en pwen ki nou repete a sak fwa nesesite annan en laspe kiltirel, dan zot lotel.

Ideal nou ti a kontan war fizikman lotel, ler ou antre ladan i en lotel ki donn ou sa *feel*, sa laparans Seselwa. Me bon pour plizyer rezon sa i pa neserman posib, a sak fwa.

Me nou ensiste ki an sa ki konsern *entertainment*, lanmizik, la nouritir, ensidswit annan en eleman ladan.

So ler nou, nou tyek avek bann lotel, bann gran lotel sirtou parske se zot ki donn - annan sa posibilite donn nou bann artis lokal en sans.

Mazorite pe donn nou bann artis lokal loportinite, pour *perform* dan lotel. Swa koman en benn, ouswa koman en gitaris li tousel solo ouswa avek son *keyboard*. I pe arive.

De trwa propriyete ki pa pe fer li dapre sa ki nou konpran. I bann propriyete ki lo

bann Zil Elwanye. *So it is happening*. Mwan si ou demann mwan, mon ti a voudre war bokou plis.

Mon menm dan *Foreign Affairs* i osi mon rol pour mwan promot kiltir Sesel. Mon ti a kontan ler mon fer en resepsyon, mon pe resevwar bann Anbasader, ouswa bann viziter etranze ki mon kapab demontre kiltir Sesel.

Malerezman ozordi amwen ki i annan kek Onorab ki konnen, trouv en bon benn kanmtole, napa! Ler mon ti pli zenn, nou ti pli zenn ti annan.

Dan bann lotel, gran lotel kot tanzantan petet en Vandredi, en Sanmdi ti annan bann *floor show* avek danser ensidswit. Nepli annan, ouswa i tre rar.

So mwan sa ki mon ti a voudre nou soz me i pa depan lo mwan. I pa depan *nonplus* lo bann touris. Mon demann nou bann artis lokal, osi pran bann linisyativ, al devan regarde kwa ki zot kapab fer. Parske se zot lavi sa, se zot biznes.

Pa zis reste deryer demande ki nou pe fer, ki nou pour fer? Vin devan. Nou'n ganny en diskisyon avek Lenstiti Lar, nou anfet nou'n koze depi lannen pase. Kot petet pour nou donn enn pti *push* nou bann artis lokal.

En zour petet envit bann ki enterese, nou a met zot dan en lasal. Nou a pran en lasal parey Sant Konferans, nou ava anmenn bann *GMs*, bann gran lotel.

E nou bann artis ganny posibilite demontre enn pti pe kwa, en *sample*, donn en *sample* kwa ki zot kapab prodwir e apre les sa pour zot diskite avek bann *hotel managers*. Ki mannyer zot kapab antre dan en partenarya.

Me ozordi nou - anfen bann artis ki pe *perform* dan bann lotel, mon krwar an zeneral pe mars byen. I annan serten lotel ki donn, ki sanze ki fer 3 fwa par semenn e tou le 3 fwa i 3 diferan dimoun. So vwala Onorab. Mersi.

MR SPEAKER

Mersi Minis. Ou siplemanter Onorab.

HON EGBERT AGLAE

Mersi Minis pour ou larepons. Minis dan – mon'n ganny sans rankontre enn de bann artis ki perform dan Lendistri Touris. E osi pran kont osi, bann komanter ki touris menm i fer letan zot pas zot sezour isi Sesel lo zot vakans.

E enn bann konsern ladan se zot ti a voudre vwar sirtou bann touris. Akoz i annan bann

comment i mete lo bann *online platform*. Si i annan plis bann aktivite ki relye avek kiltir Seselwa. *Ok*.

E pour sa arive, *rightly said* Minis, i pa zis ou Minister ki bezwen zwe sa rol. Me selman i annan en parti vi ki ou ki *custodian tourism* Sesel, ou Minister.

I annan artis ki krwar petet pour zot kapab asire ki sa plas ki zot annan dan sa rol, dan sa lendistri. Se i kapab vin atraver osi bann Polisi ki Minister Touris i kapab mete devan.

MR SPEAKER

Onorab, pa tro gran *speech* silvouple ariv lo kestyon.

HON EGBERT AGLAE

Al lo mon kestyon la Minis - Mr Speaker. So par egzanp, zot dir petet avek bann nouvo letablisman ki pe vini, ki pe vin anfors.

Eski atraver enn bann kondisyon *grant of license*, i fer ki zot bezwen annan bann performans tradisyonnell kiltirel, ki ava ganny fer *either weekly or* lenterval a deside?

Eski sa ou santi, i en pwen ki fezab ki bann artis pe met devan ki kapab ganny sofgard?

E dezyenmman zot osi pe demande ki menm si i pa

neseserman Minister ki bezwen *spearhead*, me selman sa komansman.

Eski zot krwar poudir Minis ou, ou krwar petet *the starting block* li menm pour kapab donn bann artis, sirtou i annan bann *performing artist* apre i annan *visual artist*, ki parfwa zot napa plasman pour zot kapab komanse.

Eski bann sipor i kapab ganny met devan pour zot kapab bouz devan zot osi e fer zot kontribisyon parey ou pe dir Minis?

MR SPEAKER

Mersi Onorab. Minis?

MINISTER SYLVESTRE RADEGONDE

Mr Speaker, mersi. Mersi Onorab pour ou kestyon. Mon pran pwen ki ou'n fer o komansman. Wi, i en bon *proposal*, ofet mon ti'n devret mansyonnen ki nou, nou pe fer proaktivman ki nou'n fer.

Parey ou konnen nou'n komans en klasifikasyon bann lotel ki nou'n komanse sa lannen. Pour bann lotel ki ozordi - bann gran lotel ki ozordi zot pe donn zot lekor bann zetwal. En zetwal, 2 zetwal, 3 zetwal.

Okenn sa bann lotel ozordi Sesel ki ou tande zot 5

zetwal, 4 zetwal, napa personn isi ki'n deza *grade* zot. So nou pe komanse sa lannen.

E enn dan bann kriter ki nou, nou'n mete pour ou ganny pwen *towards achievement* to zetwal, ou pour bezwen prouve ki ou annan eleman kiltirel dan ou lotel. La nouritir, *entertainment*, ant *autre*.

So sa i en kriter i al mon krwar apepre 10 pwen, ki nou'n mete pour sa - (Pardon) - 10poursan pardon, 10poursan *towards* ou *criteria*. So nou, nou *tourism* nou serye lo la.

Me sa i pa zis mizisyen mon bezwen dir. Avek artizanal, nou ensiste avek bann gran lotel ki omwen en fwa par semenn, zot donn sans en artizan vini, vin ekspoz zot prodwi dan lotel.

E sa i ed sirtou bann dimoun dan distrik ki pa neserman kapab, ouswa ki annan posibilite al pran en *kiosk* Beau Vallon, ouswa vin anvil.

I dan son distrik, i bezwen benefisye sa lendistri dan son distrik. So nou pe fer li. Ou lot pwen ti konsern - donn sans sirtou bann zenn, ouswa bann ki pe demare dan sa lendistri.

Wi, e sa i relye sa pwen ki mon'n fer avan. Diskisyon nou pe gannye avek Lenstiti Lar avek Kiltir. Kot *why not* nou met

tou dimoun dan en lasal mizisyen vini, vin montre.

E petet vini avek en *pen drive* osi, vin donn en *sample* kwa prodwi ki ou kapab donner.

Me an menm tan Onorab. Mon bezwen dir e mon pa konnen - *anyway* mon pa *mind* mwan, mon anmas serten kritik. Nou bann mizisyen, nou bann artis zot bezwen osi serye. Serye nou.

Ou konnen – ou pa kapab, ou konnen mon menm mwan annandler ou ganny en dimoun ki dir ou, be Minis mon pe ganny serten difikilte.

Ou pous li, pour ganny en *gig*. Be sa *gig* la, i en loportinite pour ou vann ou lekor, ki ou pa fini zis ek sa enn *gig*. I annan plizyer *gigs* ki vini apre.

Me konbyen fwa nou tou nou pa ganny, nou pa ganny konplent, nou pa ganny rapor ki, nou dir sa boug vini 7er avan dimoun i komans asiz pour dinen. 7er lanmenm ler i pe vini, lanmenm ler i pe debarke dan *pickup* ek son bann lekipman.

Lanmenm ler i pe rod kote i pour *plug* difil. Lanmenm ler ki i deside son *micro* pa pe marse, difil pa marse. Ou konpran mwan. I kas *cool* en sel kou. Dimoun pa pour ganny ou, pa pour soz.

Nou bezwen profesyonnel serye. E mon krwar si nou profesyonnel serye, i annan loportinite, i annan plas pour sakenn dimoun dan sa lendistri.

Sertenman nou dan *Tourism*, nou serye lo la pour pouse. Parske nou le ki sa lendistri mon'n toultan dir, '*own by Seychellois*'. E pour li *own by Seychellois, Seychellois* osi anmenn son kiltir. En Eropeen pa pe vini pour vin rod neserman Lerop Sesel. I pe vin Sesel, e i le war tou keksoz pour annan avek Sesel isi. Mersi.

MR SPEAKER

Mersi Minis. Nou a sey pran detrwa siplemanter lezot Manm. Onorab Loze.

HON JOHAN LOZE

Mersi Mr Speaker. Minis tre vit, ou pour rapel sa pli byen ki mwan ou. Lepok *Seychelles Hotel*, tou bann letablisman kot ou ti ale lo pwennvi lar vizyel ti dominen par bann artis Seselwa, dan tou zot bann letablisman.

Tre ikonik mon rapel *Reef Hotel* ti annan en gran tablo Leon Radegonde, zis par deryer resepsyon. Konmela ou ale ou fer ou en *weekend* dan en lotel,

sa bann lotel ki ou dir zanmen zot in ganny grade la.

Ou vwar ou enn pti portre *Bali*, ouswa en pti kannot sorti *Bali* dan lasanm. Prezan mon pe mazine Minis. Vi sa bann inovasyon ki ou ek ou departman pe aporte. Ki mannyer eski nou kapab pous zot dan direksyon pour pran tablo, lar bann artis Seselwa?

Akoz nou bann artis zot kapab fer *print* zot osi. Si ou anna 300 lasanm, ou kapab gannyen 300 *print* Nigel Henrie ouswa 100 pour Nigel, 100 pour en lot artis.

Be ki mannyer nou kapab itilize pour pous zot dan sa direksyon swa koman en kondisyon zot devlopman?

But nou pour bezwen sey pous sa revolisyon dan en direksyon. Akoz touris i kaptiv dan en lasanm li, i kaptiv dan en lotel. Be ler i war i ekspoze ek lar vizyel Seselwa, i kaptive ek sa osi. Mersi Mr Speaker.

MR SPEAKER

Mersi Onorab. Minis.

MINISTER SYLVESTRE RADEGONDE

Mr Speaker, mersi. Mersi Onorab pour ou kestyon. Ou fer en pwen tre valid, Onorab. E petet sa bann letan osi, i mon letan osi avek Onorab Churchill

Gill mon ti pe travay avek *Seychelles Hotel* sa letan.

Kot bann *managers* ki ti prensipalman Seselwa, ti prensipalman Seselwa zot, zot ti enn sa bann *engineer* deryer pour fer sir ki i Sesel. Me malerezman *over the years*, pour plizyer rezon nou'n perdi nou bann *senior management* dan lotel ki Seselwa.

La prezan nou pe sey re-anmennen ek sa program *ADHM* pour nou retournen, i pa pour ariv demen. E sa i enn bann rezon. Nou ki nou kapab fer koman *tourism*? Nou konseye, nou pa kapab fors person, nou konseye.

Regarde mwan i fer depi ler apre *COVID*, la mon krwar i apepre, mon preski 350 lotel ki mon'n vizite, prensipalman pti lotel Seselwa. Tou le Vandredi, ler mon Sesel, nou tou, nou al marse dan tou sa bwa, e bann Onorab i konnen.

Me malerezman Onorab, malerezman ki menm dan serten ka sa bann *guest house* zot menm zot, zot pe met *Bali*, zot pe met *peacock*.

E ou bezwen donn zot konsey ou dir, be pour kwa pa ti a bon, pa ti a bon la mon pe debout mon pe regard bor lanmer. Tir en portre la, fer en *print*, pa ti a bon ou met sa *view*

la, ouswa en *sunset*. Ou konpran.

So nou, nou pa kapab fors person, nou donn konsey, konsey lo dekorasyon fer li ositan ki posib donn li en lanbyans Kreol.

Me ant donn soz - apre sa dimoun si i pran konsey i pran i anvoy ou balanse. Sa i de keksoz.

MR SPEAKER

Mersi Minis. Onorab Michel Roucou.

MR SPEAKER

Mersi Minis. Onorab Michel Roucou.

HON MICHEL ROUCOU

Mersi Mr Speaker. Bonzour Minis avek ou lekip, *PS*, Mr Max. Minis, mon apresye sa travay ki zot pe fer. Me mon kestyon i en pti pe lo laliny enn de pwen ki ou'n touse. Eski i annan en travay ki petet ansanm avek kiltir ki zot kapab fer, pou konnen apepre kantite mizisyen kantite mizisyen ki pare pou donn sa servis oubyen ki deza pe donn sa servis bann lotel.

E osi mon apresye sa nide kot ou'n dir se ki petet organiz en konferans avek tou bann mizisyen ki ti ava enterese pou

zwenn ansanm avek bann *GM*. Mersi.

MR SPEAKER

Mersi Onorab. Minis?

MINISTER SYLVESTRE RADEGONDE

Mr Speaker, mersi. Mersi Onorab pou ou kestyon. Wi konsernan annan en levanter mizisyen, e kwa ki sak mizisyen ki son spesifisite. Maybe sa i en travay ki nou, nou bezwen fer, nou kapab fer.

E la mon dir avek *PS* nou a pran kontak avek Lenstiti Lar avek Kiltir. *We set that in motion* mon konnen nou lo kestyon anmenn tou dimoun dan en lasal, nou'n koz lo la. Me i en zafer prezan enplimant li. Mersi.

MR SPEAKER

Mersi. Onorab Labonte.

HON ANDY LABONTE

Mersi Mr Speaker. Bonn apre midi Minis ek ou *panel*. Mr Speaker, avan mon demann mon kestyon, permet mwan felisit Minis pou sa award ki ou'n gannyen pou meyer Minis dan letablisman.

(APPLAUSE)

HON ANDY LABONTE

So, mon kestyon i al en pe lo laliny ki Onorab Loze in demande, *in regards to* petet si dan bann kondisyon ler nou pe aprouv sa bann konstriksyon lotel Sesel. Nou kapab petet dan lespri kestyon ki'n ganny demande pou siport artis lokal, petet ankouraz zot pou enkli dekor konmsi fer li en pe pli kreolite vi ki i ganny mete dan Sesel.

Aprè *in regards* ti bann artis ki performen Minis, eski ou annan sa lenformasyon petet konbyen lotel ki annan artis Seselwa ki aktyelman pe performen lo en baz regilye oubyen lo bann levennman spesyal. E an konparezon avek bann artis etranze ki pe performen aktyelman dan Sesel? Mersi.

MR SPEAKER

Minis?

MINISTER SYLVESTRE RADEGONDE

Mersi Mr Speaker. Mersi Onorab. Onorab, mon apresye ou mo felisitasyon, mon pa pran li pou mwan. E i en award ki finalman pou Sesel, i montre ki kekpar i annan travay ki pe ganny fer. E mwan, mon zis sa figir devan ki pe fer sa travay.

Lo ou dernyen kestyon, wi nou annan, mon krwar mon ti annan. Nou annan, *ok. PS* i a ...

MR SPEAKER

Mersi. *PS*?

PS SHERIN FRANCIS

Mersi Onorab pou ou kestyon. Wi, dan sa 24 gran lotel nou annan en levanter nou konnen kantite. Anfet ladan i annan 5 ki napa anfet la napa performans, me tou larestan i annan. Nou konnen lekel band ou group ki pe perform kot sa bann lotel. Ki frekans zot pe perform osi tou.

E parey Minis in mansyonnen, avek program klasifikasyon tou sa bann gran lotel zot pou oblize ganny grade. E zot pou bezwen kapab demontre osi tou lo kote performans, lo kote performans lo kote kiltirel dan zot lotel pou zot ganny pwen osi lo la. E nou mazine osi sa i a pous bann lotel osi pou fer sir ki zot pran sa enn kriter serye.

Selman parey Minis in mansyonnen laplipar gran lotel ozordi, i annan band lokal ou artis lokal ki pe perform ozordi.

MR SPEAKER

Byen. Setou? *Ok.* Nou a bouze. I annan bout ki pa'n ganny

reponn Onorab Labonte silvouple fer li vitman.

HON ANDY LABONTE

Mersi *CEO* pou ou, *PS* pou ou repons. Minis zis petet lo kote bann kondisyon ler i pe decide pou li investir dan en lotel Sesel lo sa laliny. Mersi.

MR SPEAKER

Mersi. Minis, si ou kapab reponn sa dan en fraz *please*.

MINISTER SYLVESTRE RADEGONDE

Dan en fraz pou mwan dir nou donn konsey. Parey mon'n dir avan konsey, lekel ki pran, lekel ki pa pran. Me selman ler parey dan grading ki nou pe fer i ava *zwe towards* son *point* pou li ganny son zetwal. Mersi.

MR SPEAKER

Mersi. Bon, mon pe al en pe kourt lo letan. Me selman pou, mon a donn Onorab Pillay dernyen kestyon si ou kapab fer li en kestyon direk silvouple.

HON SEBASTIEN PILLAY

Mersi Mr Speaker. Always save the best for last. Mr Speaker, mon ti a kontan demann Minis tou sa senpleman pou sa kapab marse se ki ou bezwen annan bann *GM* Seselwa. Bann *GM* ki konpran nou kiltir par egzanz

pou war bann portre bann artis. Prezan bann *GM* ki pare pou entegre dan sosyete.

Konbyen lotel ki annan en *GM* Seselwa ozordi? Gran, akoz lamazorite bann pti pti i bann *owner operator*. Me bann gran lotel, konbyen ki annan en *GM* Seselwa? E ki mannyer pou, pou reponn sa kritik ki dan ou Minister, bann dimoun dan diferan nivo in devlop en relasyon tro konfortab avek bokou sa bann gran *GM*. E zot *enjoy* bann *perks* ek sa bann lotel.

E sa i fer ki zot pa oule take to task sa bann lotel. I en kritik, ki mannyer Minis pou reponn? Mersi.

MR SPEAKER

Ok, mersi. Minis...

HON SEBASTIEN PILLAY

Ou a donn en *award* Minis Fonseka osi non?

MINISTER SYLVESTRE RADEGONDE

Mr Speaker, mersi. Mersi Onorab pou ou kestyon. *On the top of my head*, mon pa pou kapab dir ou. Mon pa konnen si *PS* i ava annan sa larepons. Me pou napa bokou. Mon a met li koumsa.

Me lo ou komanter ki mon *staff*, se sa. Komanter ki mon

staff by extension mwan menm mwan nou tro konfortab avek bann lotel, mon a rezete sa.

Mwan mon sertennman, sertennman tou dimoun i konnen ler mon vwayaze mon al La Digue, mon toultan dan mon pti *guest house* ki mon'n al ladan depi ler mon ti ankor pe travay isi, *many years ago*.

Si en dimoun i vwar mwan dan en lotel 5 zetwal, koman en legzanp mon'n al la pou travay lazournen mon pe ale. Mon pa konnen ki dernyen fwa mon'n reste. Wi, Silhouette mon ale. Silhouette mon ale - lo mon *bill*, mon pey mwan. Mersi.

MR SPEAKER

Mersi. Bon dernyen kestyon, mon'n met letan en pe kourt pou sa kestyon. Me selman i en kestyon direk e mon krwar nou kapab *deal* avek li vitman. Onorab Aglae?

HON EGBERT AGLAE

Mersi Mr Speaker. Lot kestyon eski Minis i kapab donn en *breakdown* sa Lasanble sif *arrival* touris pou lannen 2023? Mersi.

MR SPEAKER

Minis?

MINISTER SYLVESTRE RADEGONDE

Mr Speaker, Onorab mersi. Wi, mon kapab donn ou sa rikord. Pou lannen pase 2023, nou'n fini lannen avek 350 mil 879 touris. E *breakdown* i koumsa; Lerop ti donn nou mazorite nou viziter 73 poursan nou bann touris sorti lerop.

Avek 250 mil 426 Lazi ti 5 poursan.

53mil 932 Lafrik ti 8 poursan. 26 mil 602 Lanmerik ti 4 poursan. 13 mil 189 e Loseani savedir bann zil Lostrali, *New Zealand* ensidswit dan sa parti lemonn ti 0.5 poursan ti donn nou en total 1730 viziter.

So, Onorab mon pa konnen si sa i sifizan pou ou. Mon'n reponn ou kestyon direk. Mon pou rebran kestyon ki Onorab ti demande pli boner.

Depi komansman sa lannen nou'n fer tre byen, tre byen menm. Nou'n sirpas nou lekspektasyon, nou pe apros pou sa premye 3 mwan lannen 75 mil touris. E sa i fer apepre 14 poursan nou arrival lo lannen pase.

So, sa lannen i *promises 11 percent pardon touch wood* si napa naryen *disaster*. Mon krwar sa lannen i pou ankor en tre bon lannen pou nou. Mersi.

MR SPEAKER

Mersi. Siplemanter Onorab Aglae.

HON EGBERT AGLAE

Mersi Mr Speaker. Mersi Minis. pou ou larepons. Minis, zis an pasan anv i ki lannen pase kot i konsern reveni ki touris i anmennen dan pei ti *down* apepre 8 pousan. Petet ki zot *forecast* pou lannen 2024? La ki ou'n donn premye kar poudir nou pe fer byen. Petet ki zot *forecast* pou sa lannen an term reveni touris e lakantite?

E dezyenman Minis, eski sa bann sif ki ou'n donner sa 350 mil touris i bann touris ki vin lo vakans? Ouswa i annan en seleksyon ki vini, petet i annan ki vin lo travay ouswa i annan ki... zis touris ki nou pe koz touris vakansye la? Mersi.

MR SPEAKER

Thank you. Minis.

MINISTER SYLVESTRE RADEGONDE

Mersi Onorab. Mersi Mr Speaker. Mon ti'n devret fer sa pwen, refer konpran tou dimoun, bann Onorab e sirtou dimoun deor. Enn ki mon Minister pa responsab pou *collect* sa bann sif.

Pa nou ki anmase sa bann sif, nou ganny donner sa bann

sif Biro Statistik Nasyonal. Sa mon oule fer kler. Nou, nou servi lenformasyon ki zot donn nou, e se sa ki nou baz nou bann estimasyon, nou bann travay ki nou fer lo la.

E lo la mon dir ki i annan serten norm enternasyonal kwa ki devret ganny enkli dan statistik. Pou ou dir be sa, sa ou *arrival* viziter pou en peryod. Ki pa enkli ladan dimoun ki vin lo *GOP*, i pa enkli. *Cruise ship* ki vini, i pa enkli.

Si ou tann mansyon *cruise ship* dan statistik, e sa malerezman, malerezman mwan mon pa konfortab avek mon ti a voudre ou tire. Me i en lizaz enternasyonal, i bann ki *fly and cruise*.

Bann ki vini pou vin pran bato, zot ganny konsidere koman dan sif. Me selman sa lannen si nou tir zot menm lannen pase, i *insignificant*. Si mon donn ou en legzanp;

2009, 2019 ki ti nou lannen, rikord ziska konmela *in terms of visitor arrival*. Ti annan plis ki 12 mil sa bann *fly and cruise*. Me pa ti en problem dan sa letan. I pa devret en problem la. Nou'n *consistent over the years*, swiv menm zafer.

Me mon redir, *cruise ship*. *GOPs* pa dan nou statistik. Nou kont bann touris ki pe vini,

touris dimoun ki pe al reste dan en akomodasyon. Mersi.

MR SPEAKER

Mersi. Onorab Cosgrow. Ou pa ankò pran ou siplemantèr?

HON EGBERT AGLAE

(Off-mic)

MR SPEAKER

Ou kapab adrese Minis?

MINISTER SYLVESTRE

RADEGONDE

Nou ankò pe aziste nou bann *figures*. E nou oule ki nou depas sa lannen. Nou depas sa \$1 bilyon *in terms of* reveni. Mon oule ki nou kapab depase sa 1 bilyon, mon krwar i posib. Mersi.

MR SPEAKER

Mersi. Onorab Cosgrow ou kestyon.

HON WALLACE COSGROW

Mersi Mr Speaker. Mr Speaker, nou pe koz lo statistik *arrival* touris en. I annan en *threat* ozordi ki malerezman - dayer taler ou'n elabor lo serten bann *threats* an sa ki konsèrn *arrival* touris. Par egzanp vole, atak dimoun lo *trail* i bann *threats* ki kapab afekte nou statistik *arrival* touris isi Sesel.

Me Minis, ki ou pwennvi eski ou krwar ou pa krwar poudir par egzanp, ki mannyer en Gouvernman i *handle* sityasyon sekirite Sesel. La nou'n tann kot Minis in sot *roadblock*, fizi pe ganny tire. Ou pa krwar i a kapab afekte lafason ki touris i war nou koman en destinasyon? Mersi bokou.

MR SPEAKER

Mersi Onorab. Mon sipoze ou pa kapab mank en loportinite pou sey fer en lakizasyon. I dan norm sa dan politik. Minis, silvouple nou a reponn kestyon ki'n ganny mete lo sekirite, si Gouvernman pe *handle* sekirite byen.

MINISTER SYLVESTRE

RADEGONDE

Mr Speaker, mersi. Onorab, mersi pou ou kestyon. Mon a donn ou lasirans, si lasirans ki ou oule. Mon'n fek sorti pli gran marse touristik Lalmany semenn pase, 2 semenn pase. Mon pa konnen konbyen bann gran lazans ki vann Sesel deor. Mon'n ganny *meeting* ek tou bann airline ki pe vann Sesel.

Mon'n fek, semenn pase mon ti Latirki diskisyon pou zot ogmant zot vol pou vin Sesel. Mon kapab dir ou se ki sa bann zafer Minis in sot sepa kwa la,

is not an issue, is not an issue at all. I annan en pozitivite enkrwayab dan marse Sesel.

(APPLAUSE)

MINISTER SYLVESTRE RADEGONDE

E mon a dir ou ek bann konpanyy parey *Condor* ki nou ep demann zot pou ogmant zot vol. *Turkish* mon'n dir, mon pe demann zot pou ogmant zot *frequency*.

Me plis ki sa mon ti a kontan zot vin vol toulezour, olye mont 4 vol par semenn se sa ki nou'n *target by November this year*. 5 vol par semenn, mou oule ki zot vin vol toulezour, tou dilon lannen. I annan en pozitivite enkrwayab e tou dimoun i felisit nou pou travay ki nou pe fer.

(APPLAUSE)

MINISTER SYLVESTRE RADEGONDE

Onorab, mon kapab garanti ou. Mersi.

MR SPEAKER

Mersi. Onorab Pillay ou kestyon.

HON SEBASTIEN PILLAY

Mersi Mr Speaker. Dan lespri sa pozitivite enkrwayab, tou taler

ou ti pe reponn en kestyon *regarding* bann santer dan lotel. E plizyer zot in anvoy bann mesaz, bann *MNAs* mon prezimen lo lot kote osi. E zot pe koz lo bann lotel pa oule pran zot baze lo bann *GM*. E sa pa pe ofer bann touris...

MR SPEAKER

Onorab, nou lo sif touris la. Size, kestyon i lo sif touris. Si ou napa kestyon, nou a *move on*. Nou a sey pran en lot.

HON SEBASTIEN PILLAY

Nou pe vin lo la Mr Speaker. Mon pe vin lo la.

MR SPEAKER

Be vin lo la direk.

HON SEBASTIEN PILLAY

Mersi Mr Speaker. *Ok*, prenon kont tousala. E taler mon'n demann ou si ou annan *GM Seselwa* pou *provide* sa *authentic experience* pou en touris pou li depans plis pou nou ganny plis touris. Pou nou ganny plis touris, konmsi pou ankouraz plis touris pou vini aköz nou pe ofer zot en keksoz otantik.

Akoz resaman ti annan en video ki ti pe konpar *Maldiv* ek Sesel. E sa dimoun i ti pe dir poudir Sesel lavantaz ki ou annan se ki ou kapab marse lo

sa gran zil, fer letour. Me *Maldiv* ou al lo en *resort*, ou reste laba ou bezwen pey transportasyon pou anmenn ou partou. So, i annan bann keksoz ki nou ofer, pou nou ofer bann keksoz otantik.

So, ki ou Minister pe fer pou ki nou ankouraz pou ofer en *authentic experience* en touris ki vin Sesel e non pa sa lapros al dan en gran *resort* lo en zil, reste lo en zil pa partisip dan kominote, pa anmenn sa larzan dan kominote. E mon ti a kontan ou klarifye *figure* ki ou pe donn nou.

An 2023, lafen lannen an sa ki konsern tourism dapre *figure* ki Minister Finans i donnen ti R855 milyon. Si mon azout tourism *marketing task*, i pou vin 943.2. R943 milyon apepre, *ok? Now*, kote ki ou, ou ganny sa sif R1 bilyon? E kote ou'n ganny sa sif \$1 bilyon ki ou fek dir nou la Mr Speaker? Mersi.

MR SPEAKER

Mersi. Minis?

MINISTER SYLVESTRE RADEGONDE

Mon a vin lo sif, *PS*. Lo tou vakans otantik. Nou dan nou promosyon Sesel, dan nou promosyon destinasyon, parske nou pa promot okenn lotel nou.

Nou promot destinasyon, e petet ti a byen bann Onorab annan de ler ti kapab vin lo *join* nou dan nou bann *trade fairs*. War par egzanp dekorasyon nou *stand* e nou pe montre Sesel otantik.

Ou pou trouv en gran pano an kouler moutya, kot deor i annan dife ki'n alimen kot dimoun pe kri manze lo la koman en legzanp. Napa en aktivite ki nou fer ki nou pa met nou kiltir Sesel o sant, *wherever possible*. Mon sertennman mon pa kapab koz avan mwan, me sa i lenstriksyon ki kler ki nou tou nou fer nou kontinyen mete.

Lefe ki mon bann bann vizit i focus lo bann pti letablisman touristik Seselwa 350 ki mon'n vizite so far. I sir ki nou oule anmenn sa lotantisite dan bann vizit. Mon pa kapab mwan koman Minis Touris, dir be ou konnen ou pe vin Sesel pa ale la, al plito la. Mon pa kapab fer sa mwan. Me par mon aksyon i vizib dimoun i konnen i devret konpran ki vwala mon *focus* kot i ete.

E dan mon bann deklarasyon piblik mon'n toultan dir sa lendistri i bezwen *own by* Seselwa e *by being owned by* Seselwa i bezwen osi ladan annan otantisite Seselwa.

Pou lezot mon pa kapab responsab vreman. Lo *figure*, ou konnen sa bann zafer sif la Onorab nou pou tou dimoun i annan en pwennvi lo sif. PS oule fer komanter? Bann sif ki *Central Bank* i donn nou.

PS SHERIN FRANCIS

Wi, sa Onorab sa \$989 milyon Ameriken i sif ki nou'n gannyen avek Labank Santral Sesel. E in pibliye osi dan ...

MR SPEAKER

Eskiz mwan, *PS* mon pa pe tann ou byen. Apros mikro silvouple.

PS SHERIN FRANCIS

Sa sif \$989 Ameriken, i sif ki nou'n gannyen avek Labank Santral Sesel. I zot ki pibliye, e mon mazine Governor tou le *quarter* i fer en konferans press *conference*, pou eksplik detay sa sif osi tou. Ki tonm an mwayenn si mon kapab zis dir i tonm an mwayenn pou lannen pase \$2819 Ameriken par latet viziter.

MR SPEAKER

Tre byen, mersi. Nou'n ariv a lafen nou sesyon kestyon. Mon remersye Minis ek son bann zofisyé pou zot partisipasyon. Mon remersi bann Manm pou zot kestyon. Minis ek ou bann zofisyé, mon swet zot bon depar

e bon kouraz. E nou a war zot laprosenn fwa. Lasanble i a pran poz la, e nou a rebran 2er apre midi. Mersi.

(BREAK)

MR SPEAKER

Bonn apre midi tou Manm, zofisyé Lasanble, tou dimoun. Nou rebran kestyon, e mon a demann madanm *Hansard* raporter pou apel Minis ki pe atann.

Bon, bonn apre midi Minis pou Lagrikiltir, Sanzman Klima e Lanvironnman Flavien Joubert. E bonzour egalman Mr Kevin Nancy Sekreter Prensipal pou Lagrikiltir, Madanm Linetta Joubert. *CEO* Departman Lagrikiltir Mr Randy Stravens *Biosecurity Officer* dan sa departman ki avek nou pou komans sesyon kestyon. Byenveni zot tou.

E mersi pou partisipasyon davans. Minis, nou annan en *full* lalis kestyon pou zot. Nou a komans avek limero 35 dan non Onorab Egbert Aglae.

HON EGBERT AGLAE

Mersi Mr Speaker. Bonn apre midi Minis avek ou *whole panel*. Kestyon i lir *comme suivant*; eski Minis i kapab dir ek sa Lasanble ki bann sipor son

Minister in donn bann fermye dan rezyon Port Glaud, ki'n ganny afekte ek linondasyon pandan sa letan gro lapli ki ti arive Desanm 2023?

MR SPEAKER

Mersi. Minis, ou repons silvouple.

MINISTER FLAVIEN JOUBERT

Mersi Mr Speaker. Bonn apre midi Mr Speaker. Bann Manm Lasanble osi tou bann dimoun ki pe ekoute ozordi apre midi. E mersi Onorab pou ou kestyon.

Mr Speaker, apre sa levennman gro lapli ki ti arive Desanm 2023 ki'n afekte fermye Port Glaud. Departman an kolaborasyon avek departman sanzman klima anba menm Minister ti fe ren travay avek kontrakter pou deblok sa *channel* ki baliz avek *ex lotel Mahe Beach*, e sa se pou amelyor sirkilasyon delo.

Zofisye Lagrikiltir ti osi fer vizit kot 2 laferm ki ti ganny inonde pandan sa gro lapli, pou evalye domaz. Me osi pou vwar sityasyon otour bann laferm ki merit ganny amelyore, pou evite ki problemn i releve dan lefitir.

Rapor lo domaz in konplete, e departman in apre pou asiste sa 2 fermye sirtou avek bann materyo lagrikiltir lo

store pou zot kapab rekiper en pe zot bann pert.

Sa mezir parey mon'n dir i konsern 2 laferm Port Glaud ki ti ganny konpletman inonde. I osi annan en fermye pli o, ki son semen in ganny afekte. Departman pe konsider ed li, re sirfas semen anba bann proze ki nou annan pou met koltar dan bann diferan landrwa kot bann dimoun pe fer prodiksyon lagrikiltir.

An sa ki konsern sa drenaz dan plato *Des Arpents* dernyen travay netwayaz lo sa drenaz ti ganny fer an 2021. Enn bann defi ki egziste dan sa rezyon se blokaz anba pon *Lotel Mahe Beach*.

Minister in an kontak avek propriyeter sa landrwa, pou propoze ki dan zot plan devlopman lo sa site zot entegre en pli bon sistenm drenaz, enn ki pli larz pou amelyor sirkilasyon e osi enstalasyon en *floodgate* ki pou anpese ki delo sale i antre.

Nou konnen toudmenm ki ziska konmela en plan devlopman pa ankor ganny depoze. Alor Zefor ki departman pe fer, se pou asire ki blokaz ki napa blokaz dan sa louvertir lanmar.

Nou pe osi rekomande ki i annan en travay amelyorasyon *culvert* anba semen. E sa i

ganny enkli dan bann proze dan bann lannen ki pe vini, pou asire ki delo i sirkil pli byen ant sa 2 kote semen pou limit linondasyon dan sa landrwa. Mersi bokou. Mersi Mr Speaker.

MR SPEAKER

Mersi Minis. Onorab Aglae, ou siplemanter.

HON EGBERT AGLAE

Mersi Minis pou ou larepons. Minis, dan ou larepons, ou'n dir poudir i annan en rapor ki preski pare or pe al pare lo sa size. Si ou ti kapab petet donn mwan en detay, kwa ki sa bann ferme i ekspekte koman en lasistans, pou zot kapab carry on avek zot prodiksyon apre zot pert.

E dezyenmman Minis, lo size lenfrastriktir li menm, eski dan sa plan mon konnen poudir, eski zot annan en larzan la pou kapab mitigate sa bann sityasyon ki menm si nou pe ganny bann tandans move tan, i pa neserman nou pou war sa gro linondasyon ankor avek travay ki zot anvizaze pe fer? Mersi.

MR SPEAKER

Mersi Onorab. Minis?

**MINISTER
JOUBERT**

FLAVIEN

Mersi Onorab pou o 2 pwen siplemanter. Mr Speaker, kot i konsern materyo siport ki nou bann ferme, sipor i prensipalman bann sipor materyel.

Parey mon dir i kot *store* kot nou permet sa bann dimoun ganny materyo a en pri redwir, ouswa menm serten materyo zot gannyen. Zot ganny asiste avek pou zot kapab re demar zot prodiksyon.

Apre kot i konsern lenfrastriktir se *desilting*, nou annan finansman pou *desilting* ki nou pe fer demars pou retourn ankor en kou dan sa landrwa, pou nou fer sir bann louvertir i reste byen lib pou ki nou pa ganny okenn blokaz.

Me nou kolabor avek bann lezot lorganizasyon bann lezot lazans pou bann lezot travay parey mon'n dir, anba semen ki nou bezwen aranz *culvert* e tir bann blokaz pou fer ki i annan pli bon sirkilasyon delo. Sa nou fer avek bann lezot lorganizasyon parey *SLTA*, ek Lazans Lenfrastriktir. Mersi.

MR SPEAKER

Se sa Minis, mersi. Bon nou napa lot, *ok* nou sa pran siplemanter Onorab Cosgrow.

HON WALLACE COSGROW

Mersi Mr Speaker. Mr Speaker, anvi ki napa lezot siplemanter. Mon ti a kontan demann Minis en kestyon an sa ki konsern zot plan or ki mekanizm zot annan pou *deal* avek par egzantp bann zafer *desilting*, ouswa ouver bann lanmar, bann larivyer ki bord avek bann laferm dan bann diferan rezyon.

Akoz i paret mwan ki nou reaktif, konmsi nou reakte. Eski i annan en plan, en sistenm ki an plas ki tou le par egzantp tou le trwa mwan, tou le 6 mwan nou fer en louvraz sistematik kot nou *avoid* bann sityasyon parey linondasyon parey Onorab Aglae in dir. Mersi.

MR SPEAKER

Bon mersi. Nou pe *extend*, nou al en pe pli zeneral. Minis si ou apre avek en repons nou a kapab ...

MINISTER **FLAVIEN**
JOUBERT

Mersi Mr Speaker. Avek ou permisyon mon a pas laparol avek Sekreter prensipal Mr Nancy.

MR SPEAKER

Mr Nancy ou annan laparol.

PS **FOR** **AGRICULTURE**
KEVIN NANCY

Mersi Mr Speaker. Mersi Onorab, pou ou kestyon. Wi, Departman Lagrikiltir nou annan en plan akoz nou annan en Bidze, pou drenaz avek firgasyon. E dan nou plan dan nou bann *meeting* ki nou fer komansman lannen, nou annan nou plan anyel pou bann diferan sistenm.

E vwala ou vwar ki nou ti kapab netway sa bout *Mahe Beach*. Selman par kont nou'n dir akoz sa *culvert* ki parey *bottleneck* i fer ki i elimin en pe ou bann travay ki ou pe fer. Nou annan en plan pou Mahe, Praslin e sanmenm sa bann travay ki nou annan. Mersi.

MR SPEAKER

Mersi. Wi, Onorab Aglae, mon a permet ou.

HON EGBERT AGLAE

Minis, zis en klarifikasyon. Baze lo ou larepons ki ou'n donn mwan, eski zot pou kontakte sa bann ferme baze lo sa ki ou'n dir mwan? Ouswa bann ferme in ensiste pou vin kot zot pou annan sa bann diskisyon lo sa bann sipor?

MR SPEAKER

Tre byen. Minis?

MINISTER **FLAVIEN**
JOUBERT

Zis pou klarifye, mersi Mr Speaker. Mersi Onorab. Mr Speaker, zis pou klarifye letan i ariv bann lensidan parey nou annan bann zofisye ki reakte, ki al lo *site*. Parey letan i annan gro lapli, nou toultan pe gard nou lizye lo bann levennman ki pe arive. Nou annan en group, Gouvernman i annan en group ki toultan pe lesanz lenformasyon ki pe arive.

E lagrikiltir osi i form parti sa group, e gannyen lenformasyon. E meteo letan i *issue* bann alert e notifie nou bann problem ki pe arive, nou osi resevwar sa bann notifikasyon.

E nou bann zofisye *extension* zot al lo *site*, lo *scene* moman ki sa bann problem pe arive. E deswit apre nou fer bann swivi pou nou asire ki bann dimoun i dan en bon leta pou zot kontinyen. Mersi.

MR SPEAKER

Nou ava al lo prosen kestyon 36, dan non Onorab Waven William. Me se Onorab Naddy Zialor ki pou poz son kestyon. Onorab?

HON NADDY ZIALOR

Mersi Mr Speaker. Bonn apre midi Minis e tou dimoun ki lo *panel*. Bonn apre midi tou bann

ki a lekout. Kestyon Onorab William i lir swivan;

Eski Minis pou Lagrikiltir i kapab eksplik nou Lasanble ki bann travay son Minister pe fer fa avek ver lasirans sekirite alimanter, e osi bann direksyon ki zot pe pran pou zwenn zot bann diferan target prodiktivite? Mersi Mr Speaker.

MR SPEAKER

Mersi Onorab. Minis, repons silvouple.

MINISTER FLAVIEN JOUBERT

Mersi Mr Speaker. Mersi Onorab, pou sa kestyon lo lapar Onorab William. Mr Speaker, pou Sesel sekirite alimanter i konsern prodiksyon lokal en si ki lenportasyon. Kot i konsern lenportasyon *STC* avek Gouvernman, Gouvernman atraver *STC* i annan manda pou asire ki i annan ase stok komodite debaz pou en peryod spesifik.

Resaman *STC* pe redouble zefor pou anmenn bann prodwir ki pli abordab dan pei. E nou swete ki sa bann zefor i anmenn rezilta ki ava ganny santi par la popilasyon an antye.

STC pe osi investir dan valer azoute pou lavyann ki zot in inform nou pou pare milye

lannen 2024. E pe osi asiste departman dan zot zefor pou anmenn manze zannimo dan pei, pou asire ki prodikter i pey en pri ki pli abordab.

Nou pe kontinyen pou nou ansanm trouv bann marse kot prodwir i pli rezonnab. Me dan long term nou ti a osi anvi ki lezot prive i antre dan sa marse. An sa ki konsern prodiksyon lokal, i annan plizyer mezir ki an mars, pou ede anmenn nou ver en nivo prodiksyon ki sifizan pou demann. Kot fermye i ganny en profi e osi pou zot annan akse avek marse.

Prezidan e Minis Finans in zot langazman pou siport prodiksyon lokal atraver diferan lebra Gouvernman, se sa ki nou pe fer. Nou pe ozordi investir dan bann lenfrastriktir tel ki, baraz e rezervwar delo, semen pou aske lo bann laferm, labatwar nasyonal, fasilite pou valer azoute, *warehouse* pou manze zannimo e osi drenaz.

Pou asire ki fermye i osi ganny akse avek inputs lagrikiltir, departman pe eksplor bann nouvo founniser potansyel, pou redwir kou e asir kalite sa bann prodwir.

E osi letan ki i pran pou ariv dan pei koup lo letan ki i pran pou ariv dan pei. Nou'n arive stabiliz fonksyonman store, e aprezan nou pe get dan

fason pou nou kapab founni serten lekipman pou laferm.

Sipor pou lenvestisman lagrikiltir in ogmante avek en sonm pres R60 milyon ki aprezan disponib pou prete anba fon devlopman lagrikiltir ant 2.5 a 5 pousan.

E avek *DBS* nou pe elarzi bann kalite loan ki fermye i kapab pran ozordi. Departman pe osi ankouraz Sekter Prive pou investir dan lenfrastriktir tel ki labatwar, valer azoute, *hatchery*, *warehouse*, bann *outlets*, osi bann lenportasyon bann *inputs*.

Departman an kolaborasyon avek son bann partener pe ede entrodwir bann nouvo teknolozi lagrikiltir, pou fer fas avek sirtou bann sityasyon ki annan pou fer avek sanzman klima.

Mr Speaker, mon ti'n deza oparavan dir ki nou pe revwar nou relasyon avek *FAO*. Mon kontan pou enform Lasanble ki nou pe prepar, nou pe prepare e sa lannen nou pou lans dan en proze *medium size* anba *Global Environment Facilities*, avek sa lorganizasyon; ki nou ekspekte i ava en nouvo depar dan lafason ki nou fer bann entervansyon avek *FAO* isi Sesel.

E nou swete ki i ava pli efikas.

I ava anmenn pli bon rannman dan sa relasyon ki nou annan depi en bon pe letan avek sa lorganizasyon.

Nou osi dan demars avek bann partener bilateral pou nou relev 2 landrwa kle dan lagrikiltir. E sa se *livestock development*, e osi *crop research*. I annan plizyer posibilite kot i konsern zannimo ek plant, e nou Sesel nou bezwen annan sa kapasite, pou nou anmenn sa bann solisyon pou nou bann ferme lokal.

Kot i konsern kapasite lokal, nou Minister pe travay avek Minister Ledikasyon pou redinamiz Lekol Lagrikiltir SIA avek bann nouvo fasilite, tel ki nouvo teknolozi, valer azoute ek irigasyon pou atrakte plis zenn dan sa sekter.

E parey zot in vwar dan medya pou osi ouver laport pou letid avanse dan plizyer size. Komite ferme pou osi benefisyer avek sa bann nouvo demars.

Akse avek marse i enportan, departman pe met lanfaz lo konstriksyon bazar dan distrik pou fasilite lavant bann prodwir laferm ki osi lo standar ki merit aplike. La mon osi oule salye zefor SFA pou met ferme dan tou son bann proze bazar ki i fer dan Sesel.

Nou osi krwar ki akse avek marse i merit ganny fer atraver

bann laboutik, e osi bann lotel. Bann group ferme parey group ferme Anse La Mouche pe demontre sa.

E nou pou fer plis pou ed bann ferme etabli, arive etabli bann tel sistenm fonksyonman. Dezyenm parti kestyon Mr Speaker, i konsern lenformasyon lo prodiksyon ki pou ed nou attend nou bann target.

Parey nou'n deza anonse dan Lasanble, sa lannen departman pou enplimant en resansman Lagrikiltir pou etabli sityasyon prodiksyon lokal, pou permet departman annan bon lenformasyon bann lenformasyon azour pou pran desizyon.

Sa resansman ki pe osi ganny fer an kolaborasyon avek Biro Statistik, proze SANROY in dega ganny inisye, in ekspekte ki i pou konplete ver lafen sa lannen. Antretan, nou pe osi amelyor kalite lenformasyon ki seksyon *extension service* pe anmase lo teren. E nou pe enkli sa dan nou program pou anmenn en pli bon sistenm rikord kot Departman Lagrikiltir. E en fason ki sa i ed nou pou nou fer pli bon desizyon ki baze lo bann fe e non pa zis lo bann lopinyon nou bann dimoun dan sa departman. Mersi Mr Speaker.

MR SPEAKER

Mersi Minis. Siplemanter Onorab Zialor.

HON NADDY ZIALOR

Mersi Mr Speaker. Mersi Minis pou ou en levantay byen detaye. Minis, ou'n koz bokou lo kolaborasyon. Pete ou departman letan ou pe koz kolaborasyon, nou annan diferan lasosyasyon bann ferme ki'n ganny kree otour Praslin, Mahe mon mazine osi La Digue. Ki mannyer zot lasante i ete an sa ki konsern sa bann diferan lasosyasyon avek ou Minister pou fer sir ki ou *attend* sa bann target?

Dezyenmman sa bann kolaborasyon avek bann diferan Minister, la mon pe mazin sirtou Minister Entern kot ou annan bokou ferme ki dir ou zot fer prodiksyon, me selman ou annan sa laspe sekirite an term par egzanp vol, bann dimoun ki pe bann reseler ki toultan bann dimoun i vin vole zot pe pran rekolt zot pe revann.

So, ki mannyer zot koman en Minister, zot pou travay an kolaborasyon avek bann diferan lezot Minister, pou fer sir ki vreman tou dimoun i lo menm paz an sa ki konsern

sekirite lo bann laferm sirtou? Mersi.

MR SPEAKER

Mersi Onorab. Minis?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, kot i konsern relasyon avek bann lasosyasyon, mon pou dir ki ozordi nou relasyon i bokou amelyore konpare avek letan non ti antre. Nou relasyon avek bann lasosyasyon in avanse, in evolye. E nou ase satisfte avek sa kalite konversasyon ki nou kapab annan avek bann lasosyasyon ozordi.

Me selman byensir i enportan nou note ki nou relasyon avek ferme i reste lo baz ferme anrezistre. Akoz bokou ferme pa form parti okenn lasosyasyon. Nou dwa tou ferme en lodyans e nou drwa tou ferme en lasistans menm si zot pa form parti en lasosyasyon.

Alor, nou relasyon i mars byen, me selman lezot ferme osi ki pa form parti lasosyasyon nou bezwen donn zot egalman en latansyon.

Kot i konsern bann lezot lorganizasyon parey bann Minister ek bann lazans dan pei, byensir i annan 2 moman

kot nou bezwen zot sipor, parey letan i annan bann vol, letan i annan bann diferan levennman ki afekte bann laferm.

Me laplipar ditan nou ganny bann bon kolaborasyon. E laplipar ditan nou kapab travay avek zot dan en fason solid.

Resaman mon a donn ou legzanp se ki nou relasyon avek Lazans Lenfrastriktir pe mars tre byen. Nou pe kapab redemar bann proze ki ti'n ralanti aköz bann size *subsidy*, napa larzan eksetera. E nou vwar ki sa relasyon i pe amelyore dezour an zour. E nou fason travay pe vin bokou pli byen. E pareyman avek serten lezot lorganizasyon.

Sa size lapolis ek vol mon krwar ki i en keksoz ki konsern nou tou nasyonalmann. I annan bann demars ki nou, nou kapab fer. Me osi i annan bann demars ki Lotorite Lapolis i bezwen fer pou ed nou ek sa bann ka kot i annan dimoun ki parfwa i ganny atrape.

Me letan nou demande oli ka? Ouswa eski aksyon sever in ganny pran, parfwa i pa fasil pou pran aksyon sever. E sa i met nou a en dezavantaz.

Alor mon pou dir an gro relasyon i mars byen. An gro relasyon dan Gouvernman ek bann lazans i mars byen. Parfwa i annan bann konfli

byensir ek bann lentere dan pei. Bann lentere lekonomi par egzantp later eksetera, me nou sey rod en fason pou nou travay ek zot. Mersi.

MR SPEAKER

Mersi Minis. Siplemanter bann lezot Manm Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. E *welcome panel*. Kestyon orizinal Mr Speaker, i dir osi bann direksyon ki zot pe pran pou zwenn zot bann diferan target prodiktivite.

So, mon ti a kontan asi Minis i kapab rapel nou ki bann target ki son Minister pe annan an term prodiktivite lokal ki swa an term lavyann poul, pork bann keksoz koumsa? Mon premye kestyon.

E dezyennman, pou kapab reisi dan sekirite alimanter, fodre nou ganny plis later pou bann fermye kapab prodwir. Eski i pe annan en legzersis pou idantifye ankör plis later lagrikiltir, partikilyerman dan bann distrik kot lagrikiltir pa vreman en keksoz prononse. Mersi.

MR SPEAKER

Mersi Onorab. Minis?

MINISTER **FLAVIEN**
JOUBERT

Mersi Mr Speaker. Mersi Onorab pou a 2 pwen. Onorab ko ti konsern target prodiktivite an premye nou annan target prodiktivite kot i konsern later li menm. Nou pe aktyelman pran en bon pe aksyon avek en bon pe fermye ki pa pe meet nou bann target prodiktivite. I annan lenformasyon nou pe anmase lo en kantite.

E nou konnen ki poudir parfwa i refoule i ariv kot bann *MNA* osi, letan nou pran aksyon ek bann dimoun. E sa i en keksoz ki nou bezwen fer sir ki dimoun i konpran se ki letan ou pran later lagrikiltir ou bezwen prodwir a en serten nivo lo la.

Kot i konsern nou bann target pou lavyann par egzansp, nou annan nou bann target pou nou ariv annan mon krwar 50 poursan fodre mon a ganny byen bann *figures* pou lavyann.

E legim nou pe koz plis ki 3kar legim ki nou manze, nou pe koz nou bezwen prodwir li lokalman. Nou pran mezir pou nou arive lo sa bann target, an metan fasilite pou bann fermye.

Me selman nou bezwen osi konpran se pa departman ki bezwen fer sa prodiksyon. Departman i bezwen met tou sa bann fasilite an plas. E nou bezwen asire ki tou bann faktè

ki pou siport prodiksyon i la. E an esperan ki bann fermye i ava met an plas sa bann mezir.

Me i annan serten keksoz osi ki met nou retar lo bann target, nou'n koz *animal feed*. Nou'n koz bann size later ki pe dormi ki nou pa kapab retir tou. Nou ti'n deza *factoring* enterdiksyon proze lo bann zil ki nou pa pe war li dan sa lavites ki nou ti ava ekspekte.

Alor tousala i pou met en fren lo *achievement* sa bann target prodiktivite. Me selman mon krwar ki si nou met tou bann faktè an plas parey i annan en kestyon an sa ki konsern La Digue, e nou pe devlop nouvo laferm.

Mon krwar ki si nou met tou bann faktè an plas e donn tou fasilite bann dimoun pou zot kapab debourye, nou merit avanse dan lakantite ki nou pe prodwir lokalman pou ki vremen nou kapab ariv pros. Me selman petet pa lo sa target, me selman pros avek sa target ki nou pe set. Mersi.

MR SPEAKER

Mersi Minis.

MINISTER **FLAVIEN**
JOUBERT

Ti annan en kestyon konsernan idantifikasyon late. Onorab, mon oule reasir ou ki nou'n

aktyelman fer en resansman, pa en resansman me en revi tou bann later ki nou annan pou lagrikiltir.

Ozordi nou annan en *database* kot nou annan tou sa bann rikord, i annan en *GIS layer* ki montre tou sa bann later ki aktyelman *allocate* avek Departman Lagrikiltir.

I annan serten lezot kare later ki'n ganny lease dan lepase. Me selman ki pa'n ganny transfer son administrasyon avek Departman Lagrikiltir. I annan ferme ki par egzanp ki fer kontak avek li poudir ou i avek *MLUH*, i pa avek sa departman. E sa i kre en pti pe problem.

Me tou sa bann later nou konnen egzaktman kot i ete. Bann ki anba Departman Lagrikiltir, e lot keksoz ki nou pe fer se nou pe travay avek Minister Later pou nou idantifye bann sit ki nou krwar i pli ideal pou lagrikiltir.

Me i annan serten landrwa osi kot nou war ki petet i pa tro ideal, nou kapab les ale en bout e nou ganny en lot bor. Me selman tou an prenon kont ki nou total lespas ki nou annan pou lagrikiltir i pa redwir.

Alor i annan en travay ki nou ep fer avek Minister Later, pou nou kontinyelman aranz nou lo kote later, ki nou kapab

servi pou lagrikiltir dan pei. Mersi.

MR SPEAKER

Mersi Minis. Onorab Romain.

HON GEORGES ROMAIN

Mersi Mr Speaker. Bonn apre midi Minis ek ou panel. Mon osi mon al en pti pe dan menm laliny avek mon koleg Onorab Zialor. Ler nou pe koz lo target prodiktivite, byensir nou konnen parey si ou plante ou bezwen delo. E mon'n okouran ki ti'n annan en problem ek nou bann ferme ki laponp delo pa ti pe marse La Gogue.

E sa ti en gro problem, *PS* ou konnen nou'n koze lo la. *PS* in *confirm* ki i pe marse, mon ti a voudre konnen ki si Minis i kapab dir ki si sa in vreman rektifye sa problem.

E ki mezir ou kapab donn nou bann ferme. Akoz sa i afekte zot en kantite, ki problem ki si sa i ariv ankor dan lepase prosennman i ava ganny rezourd.

Apre mon dezyenm kestyon Mr Speaker, atraver ou Mr Speaker, an vi ki nou ti annan en laponp ki ankor nou pe koz lo delo, en pli gro laponp pou enstale. Mon ti ava voudre konnen ki zistans nou ete lo la? Akoz nou bann ferme osi i

ankor pe demande lo sa enn.
Mersi Mr Speaker.

MR SPEAKER

Mersi. Minis?

**MINISTER FLAVIEN
JOUBERT**

Mr Speaker, avek ou permisyon
mon a pas avek *PS Nancy*.

MR SPEAKER

Mersi. *PS*?

**PS FOR AGRICULTURE
KEVEN NANCY**

Mersi Mr Speaker. Mersi
Onorab pou ou kestyon. An
relasyon laponp La Gogue, e
PUC in travay lo la ansanm avel
lagrikiltir. E in fini aranze, son
switch board ki ti'n brile. E sa i
arive, e in fini aranze i pe
marse.

E pou anpes tel sityasyon
arive oubyen pou minimize
sityasyon arive, se ki dan pou
lease dan ler ou pe rod delo
lagrikiltir i annan sa bout ki
mete fodre ki sak laferm i
annan en *night storage tank*
pou *at least 3 days*.

Me en bon pe ferme napa
sa. Aprezan koman ou war i
annan en problemm avek delo,
zot napa delo ditou. Alors fodre
sa bout i ganny onore tou pou
ki i *solve* en pe i minimiz en pe
sityasyon. Selman annou fer

tou nou mye pou ki tou bann
lenfrastruktir i marse.

Apre ou'n koz lo, wi
enstalasyon sa proze
enstalasyon nouvo laponp.
Parey ou okouran La Gogue, i
annan serten problemm delo e i
annan bann vizit ki'n ganny fer
ansanm avek nou seksyon
irigasyon ek drenaz.

Ansanm avek bann
fermye, avek distrik tou e nou'n
vwar poudir i annan sa bout
anba savedir sa dekoulman La
Gogue ki nou kapab fer sa
premye basen anba.

Delo i anvoy dan sa
dezyenm anler kot in brile. E
nou anvoy dan sa 3enm anler o
bor kot Stephen ki i desann par
gravite anba. Sa i dan
programm, e nou pe get dan
bann posibilite pou nou fer li
marse. Mersi.

MR SPEAKER

Mersi *PS*. Onorab Pillay,
kestyon.

HON SEBASTIEN PILLAY

Mersi Mr Speaker. Bonn apre
midi Minis avek ou delegasyon.
Mr Speaker, mon ti a kontan
retourn lo sa pwen bann target.

Eski Minis i kapab dir nou
baze lo sa ki ti prezant nou dan
son Bidze, pou Bidze 2024 son
target pou konsonpsyon *local
broiler as a share of total*

consumption i devret 39 poursan, konsonpsyon pork 49poursan, konsonpsyon *locally produce crops as a share to the consumption* i 60 poursan, *ok?*

Be prenon kont tou sa bann difikilte ki nou pe tande la, i pa paret poudir zot pou meet sa bann target lafen lannen. So, kot *as we speak* la, nou pe al apros *almost first quarter* lannen la. Ki bann lenformasyon ki ou kapab donn Lasanble Nasyonal lo kote ou ete lo bann target prodiksyon an sa ki konsern *broiler, pork* ek *crops*? Mersi Mr Speaker.

MR SPEAKER

Mersi. Minis?

MINISTER FLAVIEN JOUBERT

Mr Speaker, mersi Onorab pou sa 2 pwen. Mr Speaker, parey mon'n dir lenformasyon nou pe al dan detay. Lenformasyon sa lannen la nou pe komans fer nou bann resansman pli detaye.

Me kot nou ete ozordi broiler ozordi i dan en difikilte. *Broiler* i pa neserman pe fer byen, me selman i annan posibilite pou *broiler* releve an metan bann sipor pou *feed* parey nou e fer la aktyelman.

Nou pe fer nouvo *supplier* antre. Kot i konsern pti poul, i annan posibilite pou nou ganny pti poul ki bokou pli rezonnab. E osi lo bann lezot sipor ki bann dimoun *broiler producers*, i kapab gannye i annan bann posibilite pou kapab releve.

Alor, menm si ozordi bann *broiler producers* i annan problem, me selman posibilite pou zot releve i la e *market* i reste.

Akoz i ankor annan demann pou *market* pou *broiler* lokal. Kot i konsern *crops*, bokou bann ferme la pou le moman zot dan sa peryod, kot zot pa pe tro prodwir bokou legim aköz bann zafer gro lapli.

Me nou annan materyo lo *store*, e nou ekspekte ki letan sa peryod maksimonm prodiksyon dan bann legim i monte. E letan nou pe koz vann swet ziska pou komansman dezyenm kar lannen ziska lafen lannen.

Nou ekspekte ki pou napa okenn mankman lo kote materyo. E nou ekspekte ki legim son prodiksyon pou monte.

E osi avek bann nouvo lespas ki nou pe *allocate*, parey serten landrwa lo Mahe, lo Praslin, lo La Digue nou ekspekte ki prodiksyon legim pou monte avek sa bann fakter. Kot i konsern prodiksyon *pork*,

pork in ase stab, me selman nou'n okouran poudir i annan bann problemm avek lavant pork aktyelman. I annan bann problemm pa avek prodiksyon, me avek debousman pou *pork*.

E enn bann keksoz Onorab ki nou'n deza koz lo la avan, se ki nou kalite ki nou pe prodwir sorti labatwar ozordi i penetre zis en porsyon marse.

Se enn bann rezon ki nou pe pou nou annan sa nouvo labatwar Providence, pou ki nou kapab prodwir en lavyann ki kapab *compete* avek sa ki'n enporte sorti aletranze.

Akoz ozordi, malerezman sa ki nou pe prodwir sorti labatwar pa tou dimoun ki pe aksepte. E zis en porsyon market ki pe akse li. So, menm si nou pou pouse nou pou dir aste plis *pork* lokal, pa tou dimoun ki pou aste li akoz sirtou bann lotel pa pe aste akoz kalite ki nou pe prodwir.

Alor nou bezwen fer sir nou prodwir i lo en nivoki sa lavyann, li menm i ganny aksepte par tou dimoun. E i kapab ganny vann parey nou ti a voudre an konpetisyon avek sa ki sorti aletranze.

Alor nou dezavantaz me nou bezwen kontinyen met zefor, e fer sa bann keksoz ki nou'n koz lo la arive, pou ki nou

kapab war en sipor pou bann fermye lokal. Mersi.

MR SPEAKER

Mersi. Mon a pran kestyon Onorab Uranie, vitman silvouple.

HON ROCKY URANIE

Mersi Mr Speaker. Annefe, Minis ou'n pas en pe lo mon kestyon. Mon kestyon i en pti pe vize parey pou Onorab Sebastien Pillay.

Mon ti oule zis konnen ki petet zot, zot ofer bann sipor pou ed bann fermye dokimant zot bann prodiksyon, pou zot kapab pli byen petet asiste fermye pou vwar kwa ki pe ganny prodwir a serten letan?

Kwa ki manke oubyen kwa ki annekse pou petet pou zis asire ki i annan sa prodiksyon pou anmenn sa sekirite alimanter. Eski zot sonn fermye sa bann sipor, pou montre zot ki mannyer petet ed zot dokimant sa ki pe deroule lo zot laferm? Mersi.

MR SPEAKER

Mersi. Minis, ou a sey fer sa bref silvouple.

MINISTER FLAVIEN JOUBERT

Mersi Mr speaker. Mr Speaker, i annan 2 kote. Enn se

extension service parey mon dir nou pe travay pou amelyor kalite lenformasyon ki zot anmase. E zot kalite enteraksyon ki zot annan avek fermye, zot pe travay bokou pou zot kapab anmenn sa bann fason fer avek bann fermye.

Me selman i annan osi bann pratik ki mon krwar bokou bann fermye pe met dan zot laferm.

E mon pou dir laverite se ki i annan serten fermye i fer byen, me pa tou fermye ki fer li byen. I annan ki pa tro enterese avek sa zafer papye. E pa tro enterese avek bann keksoz ki annan pou fer avek ekrire.

E i kre en pe problem letan nou pe koz lenformasyon, i pa ki Gouvernman i anmas lenformasyon lo zot. Me ki zot, zot bezwen kapab konpran ki pe arive avek zot prop laferm. E konpran kote zot kapab fer bann sanzman pou zot *improve* zot efikasite. Lafason ki zot servi zot bann resours.

Me i annan travay ki nou'n komans travay lo la. I annan sesyon ki'n deza ganny fer. I annan diskisyon ki'n ganny fer par egzans lo kote letan nou pe koz ou konnen nou ti annan diskisyon nou ti fer lo kote taks ek bann fermye, ki tou dimoun ti pe dir nou pa vini, pa bezwen fer.

Akoz? Nou pe vin gete ki fermye i prodwir pou kapab fer zot repey taks. I pa zis sa, nou pe ed fermye konpran son striktir son biznes pou li kapab vremen met en lord dan son prop biznes, e konpran kote i kapab benefisye oubyen non.

Me i annan tout sort kalite diskisyon ki'n arive. Me nou, nou ti a voudre ki dan nou bann zefor amelyor konesans dan sekter parey mon'n koz lo Lekol Lagrikiltir.

Nou osi annan bann posibilite pou fermye aprann bann pratik *bookkeeping* ek *management* zot biznes pou zot kapab fer pli byen. E non pa zis get prodiksyon, koman en keksoz ki ou fer dan lapratik san ki ou bezwen konsider son laspe finansyel ouswa son biznes. Mersi.

MR SPEAKER

Mersi. Nou a bouz lo prosen kekyon. Limero 37, dan non Onorab Audrey Vidot.

HON AUDREY VIDOT

Mersi Mr Speaker. Mr Speaker, avan ler mon demann mon kekyon mon ti oule averti ou bomaten mon ti demann ou en *point of order* anba 97(1). Zis pou alert ou ki bomaten zis pou dir ou poudir bomaten...

(Interruption)

MR SPEAKER

Sorry, sorry Onorab. Mon'n dir ou prezant mwan ou *point of order* an ekrir an prive, nou a konsidere e nou a ganny le moman apropriye, lemoman apropriye pou ou prezant sa. Annou bouz lo kestyon la silvouple.

HON AUDREY VIDOT

Mr Speaker, *Standing order* pa dir sa. Sanmenm sa ki mon ti pe averti ou.

MR SPEAKER

Kestyon.

HON AUDREY VIDOT

Akoz ou bezwen anmenn en Mosyon avan ler ou...

MR SPEAKER

Kestyon Onorab.

HON AUDREY VIDOT

Ou les en Minis vin fer en statement. Mr Speaker, mon kestyon; eski Minis i kapab vin eksplik sa Lasanble, ki desizyon final son Ladministrasyon in pran lo re alokasyon bazar Roche Caiman ki o bor miray Lekol Plaisance Primer? Mersi.

MR SPEAKER

Mersi. Minis?

MINISTER

FLAVIEN

JOUBERT

Mersi Mr Speaker. Mersi Onorab pou ou kestyon. Mr Speaker, pou le moman bann fermye ek lezot vander i ankor pe servi sa lokasyon Roche Caiman pou vann zot bann prodwir.

Me selman lespas pou nouvo bazar ki ti'n deza anonse i reste. I deza annan en plan pou devlopman sa landrwa, ansanm avek sa lespas zarden ki nou apel Zarden COI.

E sa i pou enkli en separasyon fizik avek en fitir bazar ki pou fer dan sa landrwa, parey en miray sirtou. Fodre note ki aktyelman napa finansman pou komans en nouvo bazar deswit la Roche Caiman. Alors sa proze i bezwen ganny konsidere dan lot *round* planifikasyon Bidze.

Me bann zefor pe deza ganny pran pou aranz landrwa aktyel. E sa i enplik met koltar, pou fer li vin pli prop. E osi pran bann mezir pou amelyor sirkilasyon trafik dan sa landrwa.

Osi avek konstriksyon en miray separasyon, sa problemn *disturbance* ki ti pe ganny eksperyanse avek lekou in bokou redwir. E keksoz in aranz en pe dan sa landrwa. E alor

nou pou kontinyen avek sa bazar kot i ete, ziska ler nou kapab lans dan nou proze pou fer nouvo bazar dan en landrwa pli akote. Mersi.

MR SPEAKER

Siplemanter Onorab.

HON AUDREY VIDOT

Yes Mr Speaker. Minis, dan ou repons ou'n dir poudir i deza annan en plan. Konbyen fwa ki sa bann plan in sanze? E eski zabitan Roche Caiman enkli bann bazardye i okouran lo sa bann plan?

E ou'n dir poudir i annan, in redwir bann problem ki ti annan dan sa landrwa. Mon pe prezimen ou pe dir zis pou lekol, akoz i ankor annan bann lezot konsern ki bann zabitan enkli bann paran letan zot anmenn zot zanfan lekol pe eksperyanse.

So, donn nou en pe lenformasyon, vin en pti pe pli kler kwa ki desizyon final lo sa size Bazar. Mersi.

MR SPEAKER

Mersi. Minis?

MINISTER FLAVIEN JOUBERT

Ok, mersi Mr Speaker. Mersi Onorab pou ou 2 pwen. Onorab, kot i konsern plan, i

annan 2 plan bazar. I annan en plan ki ti'n deza ganny prepare avan, kot bazar aktyel i ete la, ozordi mon krwar in deza war sa plan, mon pa konnen si ou'n deza war li. E sa ti la pou en pe letan.

Resaman ouswa pandan sa bann lannen ki'n pase la 2021/22, Lotorite Plan in fer desin en lot nouvo propozisyon, e sa i dan sa bout kot sa zarden i ete.

Savedir i annan 2 plan bazar, 2 propozisyon ki'n deza ganny konsidere e nou kapab partaz sa avek ou biro. Nou kapab partaz avek distrik nenport ki ler.

Me selman parey nou'n dir, letan mon'n koz avek *CEO Planning*, zot in dir mwan ki zo tin evalye avek bann lezot lazans.

Zot vwar ki dan sa landrwa egzistan, dan *long term* i pa pou konseyab pou kontinyen annan tou sa bann aktivite la, akoz son lenpak ki i annan lo kominote, lo trafik, lo lapropte eksetera.

Alor sa dezyenm plan kot sa zarden i pli apropiye e i pli fasil pou kapab annan plis lord ek lapropte. E ou kapab met lezot fasilite parey *toilette* eksetera, ki ki i napa la aktyelman.

Alor, dan *long term* nou pe anvizaze ki i pou bezwen annan en lot bazar akote. I pou bezwen annan nouvo fasilite.

Me dan letan en dele kourt nou pou bezwen anvi ki nou napa Bidze, fer en keksoz pou amelyor lapropte dan sa landrwa ko ti ete.

Me mon dakor avek ou ki i annan lezot konsern dan sa landrwa. E enn parmi i enkli lapropte e osi i annan pou fer avek fasilite *toilette* bann keksoz parey ki nou bezwen amelyore an mezir ki nou avanse.

Me parey mon'n dir nou napa Bidze la pou le moman pou nou lans dan sa proze. Akoz laplipar bann larzan ki Departman Lagrikiltir i annan anba Minister, i pe ganny deza servi dan bann lezot proze dan diferan landrwa. Mersi.

MR SPEAKER

Mersi. En klarifikasyon?

HON AUDREY VIDOT

Minis, letan zo tin dir i annan 2 plan ki zot in deza drafte. Ou pa'n reponn, kan ki zot pou vin, konmsi kwa ki pe anpes Gouvernman vin eksplik zabitan Roche Caiman, avek sa bann bazardye vreman bann detay devlopman ki zot pe

sizere? Kwa ki pe anpes zot fer sa?

MR SPEAKER

Mersi. Minis, dan en fraz silvouple?

MINISTER FLAVIEN JOUBERT

Mr Speaker, napa naryen ki pe anpes Gouvernman prezant sa 2 plan. Mon a fer Onorab ganny kopi sa 2 plan, e nou a fer distribye sa 2 plan, zot ava vwar egzaktaman son bann detay. E si ou bezwen leksplikasyon nou ava fer mannyer ki i ganny leksplikasyon i ganny donnen avek distrik. Mersi.

MR SPEAKER

Mersi. Onorab Pillay, kestyon.

HON SEBASTIEN PILLAY

Mersi Mr Speaker. Ou'n koz lo en sit alternativ. Eski ou kapab dir nou egzaktaman lokasyon presiz kot zot annan plan fer sa nouvo bazar ki ou pe dir nou zot pe al fer la.

E kan eski zot annan, zot in mete dan plan 2 an, 3 an, 4 an, 5 an. Donn nou en sif ki kot nou a kapab sey konpran.

Aprè Mr Speaker, *you were wrong this morning not to follow the Standing Order* pou ou pa demann en Mosyon pou *suspend the Standing Order*. Me

ou konnen *that's the way it was done...*

MR SPEAKER

Ou ava adres mwan sa an prive silvouple. Mersi. Minis?

MINISTER **FLAVIEN**
JOUBERT

Mersi Mr Speaker. Onorab in demann 2 klarifikasyon. Premye se sa sif alternativ, sa sit alternativ i en bout en porsyon sa zarden ki deza egziste son porsyon ki vir avek Plaisance, i annan en triyang. E i annan en lespas ki sipoze ganny pran pou okip, pou en bazar okip sa bout.

E fodre ou al lo plan egzaktaman kote son bann demarkasyon i pase. E lot keksoz se kan eski pou ganny fer parey mon'n dir nou napa larzan la. Nou ava konsider li dan lot *cycle* Bidze.

Me selman nou bezwen gete ki bann priyorite ki monte dan sa lot *cycle* Bidze. Akoz i annan plizyer demann e plizyer landrwa ki nou bezwen osi pe travay lo la an menm tan. Mersi.

MR SPEAKER

Mersi. Nou a pran dernyen kestyon lo sa size, Onorab Michel Roucou.

HON MICHEL ROUCOU

Mersi Mr Speaker. Bonn apre midi Mr Speaker. Bonn apre midi a tous Minis ek ou lekip. Minis, mersi pou sa travay ki ou avek ou lekip zot pe fer.

Minis, mon kestyon i se ki an menm tan ki nou pe esper bann devlopman ganny fer si ou Minister ouswa bann lezot lotorite, i kapab travay ansanm ek zot, pou ede ki bann dimoun ki pe deservi sa landrwa la, zot pa kit okenn keksoz apre ki zot in fini servi li ki sa i kapab afekte lekol ki zis lanmenm la pre o bor. Ouswa bann lakour ki la avek bann keksoz parey vermin li menm li. Mersi.

MR SPEAKER

Mersi. Minis?

MINISTER **FLAVIEN**
JOUBERT

Mersi Mr Speaker. Mersi Onorab. Mr Speaker, mon krwar i en sizesyon ki tou dimoun pe demande. Mon krwar ki i reflekte byen sa ki nou osi nou ti a kontan vwar dan sa landrwa.

An prensip personn pa merit kit okenn naryen. Akoz sa i pa en landrwa ki annan okenn striktir permanan.

E i kapab ganny netwaye apre ki lavant i fini ganny fer. E ki ou napa okenn landrwa ki

okenn vermin i kapab reste. Alor nou ava redouble zefor avek bann lotorite, pou nou fer sir ki keksoz i ganny anmase e i ganny netwaye.

E sirtou la si nou pe al met en sirfas ki pou fer li pli prop. Nou bezwen fer sir ki napa naryen ki reste la. San kwa nou pou war nou dan bann sityasyon parey nou war dan bann lezot landrwa, kot i annan stokaz ek bann vermin ki komans kre problem pou bann zabitan. Mersi.

MR SPEAKER

Mersi. Bon, nou a bouz lo prosen kestyon limero 38, Onorab Rocky Uranie.

HON ROCKY URANIE

Mersi Mr Speaker. Mon kestyon i al koumsa. Eski Minis i kapab dir ek sa Lasanble si bann fermye ki ti ganny donn later dan rezyon Grand Anse, La Digue in ganny donner en dele letan pou komans prodiksyon? Mersi.

MR SPEAKER

Mersi. Minis, repons?

MINISTER FLAVIEN JOUBERT

Mersi Mr Speaker. Mersi Onorab pou ou kestyon. Mr Speaker, departman in fer en

alokasyon later avek 5 fermye. E fasilite delo, elektrisite i deza an plas, e i reste ankor en pe travay pou fer lo semen pou ariv dan sa landrwa kot sa bann laferm pe ganny devlope.

Tou sa bann fermye in deza ganny let ofisyel pou zot kapab devlop zot later. E zot in ganny montre bann taso. Dapre zot let alokasyon sa bann fermye i annan en dele 6 mwan pou komans zot aktivite.

I annan en fermye ki son laferm in ariv 85 poursan prodiksyon. E en lot ki'n fini netway later, e resaman in ariv en nivo prodiksyon 60 poursan.

E en 3enm fermye in soumet plan pou en striktir kot lotorite. Me i annan serten lazisteman ki bezwen ganny fer avan ki sa plan i ganny aprouve, e sa pe koz en pe retar.

En lot aplikan ki fer elevaz bef in deza ganny donner landrwa, in vizite i dan demars pou bouz son aktivite Grand Anse.

Dernyen aplikan pe al fer prensipalman elevaz mous dimyel ek fri e i dan prosedir pou li bouz son aktivite lo sa morso later. I pe fer prosedir pou en *loan* e pe deza komans investir dan konstrikasyon bann *case* mous dimyel, pou ki i kapab okip sa landrwa ase vit letan tou keksoz in apre.

Enn fwa ki tou sa bann laferm ki an prodiksyon, nou ekspekte prodwir agrikol lo La Digue i ava ogmante dan en fason signifikan. E sa i ava osi akote Linyon *Estate* ki nou pe ekspekte ki li osi i a kapab ogmant son prodiksyon.

Sa osi i zistifye proze konstriksyon en ekstansyon avek bazar pou ferme e osi en mini *store* lagrikiltir ki departman in ekspekte komanse sa lannen. Mersi.

MR SPEAKER

Onorab siplemanter?

HON ROCKY URANIE

Mersi Minis, pou sa lenformasyon. Annefe wi Minis, mon'n pas laba mon'n war en ferme ki pe debourye ek ki'n komans en pti gin. Me zot annan i annan ki annan en pe konsern konmsi lo kote finansman.

Mon pa konnen si ou'n ganny sa konversasyon avek zot, kot dapre lenformasyon ou ti pase ou ti fer en vizit pou ed zot ganny akse ek finansman. Akoz zot pe war li difisil pou ganny aske ek finansman.

Aprè sityasyon delo dan sa landrwa, zot pou gete si zot pou ganny asiste, pou kapab fer fason pou retir en pe delo dan sa landrwa ki reste. Kantmenm

ouver en lot labousri pou tir delo ki zot pa ganny sa problem delo. Mersi.

MR SPEAKER

Mersi Onorab. Minis?

MINISTER

FLAVIEN

JOUBERT

Mersi Mr Speaker. Mersi Onorab pou ou 2 pwen. Mr Speaker, kot i konsern finansman nou'n an kontak avek tou sa bann ferme ki'n ganny *allocate* landrwa.

E nou pe swiv zot ka de pre, me selman nou bezwen fer kler ki parfwa finansman i reflekte sityasyon sa enn ferme an partikilye. E i pa toultan, pa tou keksoz ki nou kapab diskite dan Lasanble byensir.

E i konsern serten ferme an partikilye, sakenn i annan son sityasyon. Akoz i annan bann verifikasyon ki ganny fer dan sistenm. E prezan nou bezwen *deal* avek son ka an detay.

Me selman nou okouran, e nou an kontak avek bann ferme pou nou fer sir ki zot bann *case* i bouz devan. Kot i konsern deli parey *PS* in eksplike nou annan en program kot pou nou fer nou bann sistenm irigasyon.

E La Digue i enn bann landrwa anba en plan ki nou ti

pe fer avek sipor Gouvernman Lenn, pou nou enstal en sistenm *solar pumping* pou nou lev delo pou met dan sistenm distribisyon.

E osi kot i konsern tir delo lo plato, nou pou met en fwa ki tou keksoz i fini etabli sa landrwa dan nou plan drenaz ek *desilting* pou ki i osi benefisyè anba nou Bidze ki nou annan pou *desilting* dan bann landrwa pou asire ki bann landrwa pa inonde. Mersi.

MR SPEAKER

Mersi Minis. Onorab Pillay, ou kestyon.

HON SEBASTIEN PILLAY

Wi Mr Speaker, mon ti pe vin lo sa pwen *regarding* ponp delo ki ti annan en lagreman, pa lagreman me diskisyon ki ti ganny fer avek Gouvernman Lenn pou servi *solar power* akòz sete lesansyel pou fer La Digue vin en *green island basically*. *Now*, be ki zistans ou ete avek sa? Ou pe dir nou a pou ganny fer, sa lot pou ganny fer, sa lot pou ganny fer.

Antretan ou annan 5 ferme ki'n ganny *allocate* later. Ki *deadline* ki ou'n set ou lekor koman en Minister? Akòz ou nepli en Lazans Lagrikiltir, se ou ki antyerman responsab avek sa.

Ki *deadline* ou pe donn ou lekor ki *by that period* sa letan sa bann ferme zot nivo prodiksyon pou'n ogmante. Akòz si nou kontinyen fer keksoz parey in ganny fer lepase nou pa pou ganny rezilta.

Me pareyman napa sanzman nou pe *still go with the same approach*. Nou pe fer sa, nou pe fer sa, nou pe fer sa. *Is there a deadline*, en dele letan ki tou bann ferme *will be producing* e ki nou pou war en nivo prodiksyon?

Akòz ant mwan ek ou, ou konn tre byen Linyon *Estate* pa pe marse. I pa pe marse. *So*, annou pa servi sa leskiz. Mersi.

MR SPEAKER

Minis?

MINISTER

FLAVIEN

JOUBERT

Mersi Mr Speaker. Mersi Onorab. Mr Speaker, pou le moman i annan delo dan plato dan sa landrwa. Alor i annan posibilite pou bann dimoun, bann ferme ponpe e servi delo.

Nou konnen letan sek nou pou annan difikilte, e nou, nou ti a voudre avan letan sek nou'n kapab met en sistenm an plas swa an servan laponp elektrik. Akòz fasilite elektrik in fini arive deza.

Swa an servan en sistenm kot nou pe ponp konsernan solar. E sa i pou depan lo lasistans ki nou gannyen avek Gouvernman Lenn nou an kontak avek zot lorganizasyon ki zot *lead International Solar Alliance*. Nou'n an kontak avek Lanbasad Lenn isi, e nou'n menm zwenn avek O Komiser Lenn. Me nou napa en garanti egzakteman ki dat ki nou pou ganny sa sipor.

E alor nou, nou pou gete ki mannyer sityasyon i ete nou pou bouz devan ek nou bann solisyon ki nou annan deza dan nou laporte. Alor pou nou i pa enposib pou nou kapab met an plas nou sistenm sa lannen, pou ki sa bann laferm i kontinyen prodwir, menm dan letan ki mank en pe delo dan sa landrwa.

Me selman zis pou reasir ou Onorab, i annan en pe delo dan sa landrwa. E bann dimoun i kapab ponp delo dan plato pou zot servi. Mersi Mr Speaker.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Mr Speaker, Minis in dir poudir normalman zot donn en dele letan 6 mwan avan sa dimoun i komans

devlop sa later. E dan ka sa bann fermye, eski zot in pas sa letan 6 mwan?

E dan lapratik Minis, eski i annan sa fleksibilite kot ou Minister? Ki sa 6 mwan i pase, e parey sa 5 fermye La Digue pe rankontre bann difikilte, ki zot *extend* sa letan. E letan zot *extend*, zot a *extend* li pou en dirasyon ki kantite letan? Mersi.

MR SPEAKER

Mersi. Minis.

MINISTER

FLAVIEN

JOUBERT

Mersi Mr Speaker. Petet ti a bon nou kalifye sa 6 mwan. Sa 6 mwan, se 6 mwan pou inisye akoz nou konnen poudir pa toultan ki en dimoun i kapab fer met en laferm debout dan 6 mwan.

Me selman dan 6 mwan ou bezwen inisye en keksoz. Ou pa kapab zis pran later, kit li la pa fer naryen. 6 mwan ou kapab montre mwan poudir mon prosedir *loan* in komanse. Ouswa mon'n fini ganny kotasyon, ouswa mon'n koman eklersi serten landrwa pou mwan etabli mon bann pozisyonman fasilite eksetera.

Me i annan leka kot dimoun i ganny later pou 6 mwan i pa tous ditou. I annan

dimoun 5 an i pa'n tous later ditou, i pa'n ni menm vin la pye dibwa i pouse. Be sa i montre ou poudir sa dimoun pa enterese.

Me i annan bokou ka kot dimoun in komanse, me selman apre i ganny retar. Me selman nou war ki poudir dousman, dousman i pe fer progre, i pe avanse.

E dan bann ka parey nou kontinyen akonpanyi zot, e nou fer sir ki zot arive fer zot proze evantuelman. Me nou konnen ki pa dan tou ka ki en dimoun i kapab etabli en laferm dan 6 mwan, sirtou dan sityasyon ki egziste Sesel. Mersi.

MR SPEAKER

Mersi. Mon a pran en dernyen kestyon lo sa size. Onorab Norbert Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon. Mr Speaker, mon'n tann en laspe finansman ki Onorab Uranie in demande, pou asiste ek finansman. Souvandfwa i annan dimoun ki anvii fer en biznes parey lagrikiltir par egzantp nou pe koz lo la. Ler i ganny later, i napa en sou li me selman i oule fer sa biznes.

Eski dan zot kriter, aprezan Gouvernman ki bezwen donn li larzan pou komans sa biznes. Eski ki kriter ki zot servi pou en dimoun kapab gannyen Later Lagrikiltir? Eski sa dimoun i bezwen prouve ki i annan en mwayen finansman pou li komans son proze? Ouswa ou vini *nu* konmdir Franse e ou ganny en later apre ou asiz lo la.

MR SPEAKER

Mersi. Minis?

MINISTER

FLAVIEN

JOUBERT

Mersi Mr Speaker. Mersi Onorab pou sa kestyon vreman enteresan. Nou sey fer mannyer pou nou pa diskrimin kont dimoun ki vin devan ki montre lentere pou fer proze lagrikiltir.

Akoz, problem se ki i kapab annan dimoun ki annan bon lentansyon, e ki annan bon lide me selman ki napa en mwayen pou komanse. E nou bezwen donn li en lipye pou li komans debout lo la.

Alor nou sey fer mannyer pou nou travay avek li pou li kapab fer en keksoz ki dapre son mwayen ki li i annan. I annan bann *ptipti loan unsecured up to* sa 50 mil par egzantp kot en dimoun i kapab pran en *loan*, san ki i bezwen

annan okenn kou lateral bann keksoz koumsa.

So, nou pou ankouraz en dimoun ki napa naryen me selman ki annan en bon lentansyon ek en bon proze pou li komans avek en *loan* ki li i kapab siporte, repeye.

E apre sa, letan in ganny lipye la i kapab demare e bouz devan. E byensir i annan bokou ki vin devan parey ou'n dir, ki zot pa pran kont lefe ki zot bezwen annan serten keksoz.

Ouswa petet dan lepase zot in negligan dan lafason ki zot in *deal* avek *loan*. E parfwa i annan de fwa ou dekouver ki sa bann dimoun i deza annan en kantite bann *liabilities somewhere* dan sistenm avek en labank, avek en lenstitisyon ki zot pa pe dir ou letan zot vini. Apre ou dekouver ki i annan en lot azanda.

Me dan sa bann ka, nou bezwen entervenir nou bezwen met kler devan sa dimoun poudir *look*, ou pa kapab *access* sa *facilities*, aköz deza ou pe anmenn problem dan sistenm kot nou konnen ou pa pou repeye.

Me nou sey fer mannyer pou nou rod en keksoz pou tou dimoun. Me selman parfwa i pa neserman fasil parey ou'n dir. I kapab annan dimoun ki anmenn bann ki vin avek bann

lezot azanda pou zot sey ganny en benefis tou a konesans ki zot annan en problem lo kote finansman. Mersi.

MR SPEAKER

Mersi Minis. Bon, an se moman ki nou annan delegasyon zofisye Minister Lagrikiltir, Departman Lagrikiltir i la e nou annan en kestyon ki relye avek zot *Without Notice*, mon pou pran Kestyon *Without Notice* Onorab Uranie. Avan zot fer zot depar. Onorab Uranie, *sorry* mon pe dir Uranie, Labonte.

Non mon pe... rezon aköz mon'n dir Onorab Uranie aköz se li ki prosen kestyon. Onorab Labonte ou *Question Without Notice*.

HON ANDY LABONTE

Mersi Mr Speaker.

MR SPEAKER

Sorry. Ki arive Onorab Cosgrow?

HON WALLACE COSGROW

Mr Speaker mersi. Mon ti pe zis gete si nou pou annan siplemanter lo bann Kestyon *Without Notice* silvouple?

MR SPEAKER

Lo bann kestyon siplemanter, *ok* mon pou gete konbyen letan nou pran. Petet mon a donn en

kestyon siplemanter, akoz letan ki esansyel la. Onorab Labonte.

HON ANDY LABONTE

Mersi Mr Speaker. Kestyon i lir koumsa; etandonnen ki depi Novanm 2023 en lespes makabe fey (*leaf beetle*) in aparet e pe rapidman e kontinyelman afekte pye frisiter lo Mahe, eski Minis i kapab dir Lasanble ki bann mezir ki son Minister in pran, ou pe mazin pran pou ede kontrol propagasyon e osi elimin sa lespes makabe? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab pou ou kestyon. Mr Speaker, Departman Lagrikiltir, depi ki Departman Lagrikiltir ti resevwar premye konplent konsernan prezans sa *Golden Apple leaf beetle* dan distrik Bel Air. Imedyatman departman ti anvoy teknisyen avek lasistans Minister Lasante pou fer *fogging* dan sa landrwa, pou sey kontrol sa nouvo lespes.

Sa aksyon ti ganny fer par Departman Lagrikiltir e i anliny avek plan dirzans biosekirite ki'n ganny devlope anba

Seksyon 6 Lalwa Biosekirite 2014.

An kolaborasyon avek nou bann partener enternasyonal, e santiyon sa pes ti ganny anvoye kot *Cirad La Réunion* pou konfirm idantifikasyon sa zensek. Sa lenformasyon in enportan pou konpran sa pes pli byen. E osi determin metod kontrol pli efikas.

Dan plan dirzans anba Lalwa Biosekirite, diferan faktor ti ganny met an plas tel ki kominikasyon, loperasyon e lezot sipor lozistik pou fasilite enplimantasyon sa program. *Fogging* i mezir kontrol prensipal ki pe ganny enplimante kot bann lakour lekol e bann diferan landrwa piblik.

Akoz i mezir ki pli efikas dan sa ka. Pandan bann vizit zofisye Lagrikiltir in osi ankouraz piblik pou enplimant serten lezot metod pratik.

Sirtou kot lakour pou ede redwir lenfestasyon e propagasyon sa pes. Nou pe osi anmas rikord bann lenformasyon enportan ki pou ed nou pli byen konpran sa pes dan lanvironnman Sesel.

E sa i son devlopman, son fason propaze, bann plant ki sa pes i enfeste eksetera, pou nou ede amelyor lefikasite sistenm kontrol.

I annan plizyer *fogging* ki'n ganny fer depi lentrodiksyon sa pes. Me anvi sezon gro lapli an Desanm 2023, e komansman sa lannen loperasyon kontrol in ganny retarde.

Sa in fer ki *fogging* pa'n kapab ganny fer dapre plan e dan serten lenstans in afekte lefikasite metod kontrol. Depi Novanm 2023 ziska 15 mars 2024 Departman Lagrikiltir in resevwar en total 594 rapor sorti dan 20 distrik atraver Mahe.

Departman pa ankor ganny okenn rapor prezans sa pes lo okenn lezot zil. Mr Speaker, i enportan note ki nou pa pe ankouraz manm piblik pou kontrol sa pes zot menm an servan pestisid kot lakour.

E i annan serten pestisid lo marse ki bann *license pesticide operators* i kapab servi pou kontrol sa pes. E dan bann ka parey nou demann bann piblik pou fer kontak avek sa bann lazans.

E zot kapab ganny lenformasyon kot Departman li menm. Tou mezir nesese in osi pran pou restrikte mouvman okenn plant e prodwir laplant lo bann zil elwanye Praslin, La Digue ek bann Zil Pros.

E la mon ti a kontan osi fer rapel piblik ki i pa zis bann

plant ki kapab propaz sa pes. Me i kapab osi bann lobze par egzantp ou annan materyo konstriksyon ki'n ganny stoke serten landrwa.

Akoz sa zensek i sorti dan pye frisiter e i anvole partou i marse. E i bon ki nou verifeye bann materyo ki nou pe transporte ant bann zil. Departman Lagrikiltir pe travay tre pros avek bann partener kle pou met sa pes anba kontrol.

Sa in demare avek en seri konsiltasyon, pou partaz e fer lesanz lenformasyon. E osi travay ansanm pou idantifye lezot metod kontrol ki kapab menm pli efikas. Dan nou plan kominikasyon nou pe kontinyen donn lenformasyon lo sa pes atraver bann diferan form medya.

Nou pe osi etabli kontak avek serten lorganizasyon enternasyonal dan bann pei kot sa pes in raporte, pou lesanz lenformasyon e osi aprann par zot leksperyans ki mannyer nou kapab pli byen konbat sa pes.

Mr Speaker, fodre nou note ki Departman Lagrikiltir pe kontinyen travay pou kontrol popilasyon sa pes, avek bi pou esey elimin sa *leaf beetle* dan pei.

Pou le moman nou pa pe koz eliminasyon, me *at least* nou pe koz met anba kontrol lo

en nivo ki i pa vin en danze pou pei. Mersi.

MR SPEAKER

Mersi. Wi Onorab Uranie, ou siplemanter.

HON ANDY LABONTE

Labonte.

MR SPEAKER

Sorry. Onorab Labonte.

HON ANDY LABONTE

Bon. Minis, mon a dir ou mersi pou ou larepons. I ki dan ou larepons ou'n fer sorti apepre 594 ka ki'n ganny raporte, e nou war ki i vreman alarman i pe *spread* ase vitman.

So, nou pou ankouraz bann lakour nou menm nou pou pran sa, pran kontrol plizoumwen avek departman konsernen. Eski i annan en hotline ki'n ganny kree ki zabitan i kapab zis *call* direkteman, e zot kapab ganny lasistans.

E konbyen letan ki nou pou kapab ganny response ki sa aksyon i ganny pran.

Aprè dezyenmman, vi ki ou'n dir osi Minis ki i ganny transporte osi par dizon materyo konstriksyon. Eski ou kapab donn petet en leksplikasyon oubyen pou lenformasyon piblik, ki bann

rezyon vreman ki pe plizoumwen ganny afekte avek sa lespes li menm li? Mersi.

MR SPEAKER

Mersi Onorab. Minis?

MINISTER

FLAVIEN

JOUBERT

Mersi Mr Speaker. Mr Speaker, mon pou pas avek ou permisyon laparol avek Mr Stravens, ki *oversee* biro Biosekirite ki ava kapab donn lenformasyon lo sa size *hotline* ek kote pou ganny lenformasyon. E osi lo sa size rezyon ki'n ganny afekte. Mersi.

MR SPEAKER

Mersi. Mr Stravens?

CHIEF

BIOSECURITY

OFFICER RANDY STRAVENS

Mersi Mr Speaker. Bonn apre Midi tou *MNA*, dimoun ki kot lakour. Konsernan *hotline* wi, i dan nou plan la wi pou etabli li. E *very soon* nou pou *share* sa limero.

Me antre kont nou annan bann lezot limero ki piblik i kapab ganny kontakte. Mon krwar laplipar piblik in familye zot ek sa bann limero.

E osi konsernan plis lenformasyon lo sa pes i deza annan bokou lenformasyon lo *website* Minister. Mon krwar in

fini ganny etabli lo la. E ou lot keston konsernan ki rezon ki pe ganny plis afekte? Sa i definitivman dan nor, nou pe ganny bokou rapor sorti dan Nor e sirtou dan santral. Santral letan nou pe koze i dan lavil en pe dan Bel Air, e osi en pti git Mont Fleuri koumsa. mersi.

MR SPEAKER

Mersi. Bon, mon annan plizyer Manm ki'n lev lanmen. Mon pa pou kapab pran tou. Mon pa pou kapab pran tou, mon pou pran 2 keston. Mon annan... *un instant*. Ok, ale demann ou klarifikasyon Onorab Uranie vitman.

HON ANDY LABONTE

Mersi Mr Stravens pou ou larepons. Mr Stravens, petet parey ou'n dir poudir zot pa ankor etabli en *hotline*, me dimoun i konn limero. Me English River nou vremen pe ganny afekte avek sa lespes.

Eski i annan en limero ki ou kapab donnen *right now*, ki piblik i konnen i kapab *call* sa limero e zot ganny asiste? E ki dele letan ki i pran petet pou zot war poudir i annan lasistans *fogging* lo teren pou anpes li propaze? Mersi.

CHIEF BIOSECURITY OFFICER RANDY STRAVENS

Mersi Onorab pou ou keston. Letan mon ti pe refer avek ou keston, en *hotline* spesifik. Konmsi en limero spesifik parey Lanvironnman i servi, sa byensir nou pou met li an plas.

Me i annan lezot limero ki mon kapab *share* avek zot ek piblik an zeneral pou kontakte seksyon *pest and disease* kot resers i annan 2822907 oubyen 2822908 e en trwazyenm se 2822912. E i deza annan bann *advert* osi, e menm lo nou *website* Minister e menm bann *leaflet* ki pe ganny distribye. Mersi.

MR SPEAKER

Eski ou pou dir li konbyen dele letan pou respond?

CHIEF BIOSECURITY OFFICER RANDY STRAVENS

Ok. Letan nou bann zofisye i resevwar serten *call*, zot *get back* ek sa dimoun ki'n met sa rapor pou zot organiz en vizit. E la zot fer sa vizit avan, etabli serten sityasyon. Akoz i annan serten lenformasyon ki nou koman sa bann teknisyen nou bezwen kolekte on site. E letan nou vin sa vizit, apre nou *advise* sa dimoun kan nou pou vini pou fer sa *fogging*.

Akoz parey ou konnen 549, 84 ka i deza en pe bokou. Nou ep sey fer nou mye pou nou kapab *tackle* tou an menm tan. Akoz parey in eksplike Minis, in eksplike i annan serten delay pou 2 mwan ki'n afekte bokou nou loperasyon ek sityasyon lapli. Alor, nou pe sey nou mye pou *tackle* bann ki ankor lo nou lalis. Mersi.

MR SPEAKER

Mersi. Bon, mon pou pran kestyon Onorab Larue. E Onorab Uranie. Onorab Larue, ou kestyon.

HON FLORY LARUE

Mersi Mr Speaker. Bonn apre midi Minis ek ou delegasyon. An relasyon avek sa ki Minis in dir lo propazasyon sa lespes lo bann lezot zil. Eski Minis i kapab dir nou lefe ki nou'n ganny *white fly*, *senir plim* e la sa enn lately. Ki bann *patch* pe ganny pran pou protez nou *border* pou anpese ki sa bann keksoz i antre dan pei.

E lo konsekans *fogging*, i pou annan en lefe lo lezot lespes tel ki mous dimyel ki annan dimoun ki servi koman biznes. E i osi soutenir polinizasyon bann plant. Ki zot pe fer pou protez bann lezot lespes osi? Mersi.

MR SPEAKER

Mersi. Minis?

MINISTER

FLAVIEN

JOUBERT

Mersi Onorab. Mr Speaker, avek ou permisyon mon a pas avek Mr Stravens.

MR SPEAKER

Mersi. Wi, Mr Stravens.

CHIEF

BIOSECURITY

OFFICER RANDY STRAVENS

Mersi Onorab, pou ou kestyon. Vreman enteresan. Onorab, parey ou konnen Sesel dan komers nou enport bokou. Laplipar sa ki nou manze ozordi 80 poursan i vin dan lenportasyon.

Savedir risk i touzour la, me selman nou kot biro sekirite nou met bokou lanfaz lo sa ki nou apel an Angle nou *pre-border action*.

Kot touzour nou fer bann risk, bann *risk analysis* pou vwar okenn alert ki ganny devlope dan okenn pei oubyen okenn pei ki nou fer komers avek. E nou, nou sey pran bann mezir prekosyon pou anpese ki sa i arive.

Me par kont i pou arive ki i pou annan serten pes ki pou ganny en tradwir. Parey nou get ozordi, avek bato bokou *container* i vini. I annan bann

container ki vini sal, e sa i en problem pou nou. E sa i kapab anmenn en risk, entrodwir en nouvo pes dan pei.

E letan ou get tousala, travay i bokou. E i ap vedir ki nou frenm nou lizye lo la. Bokou travay nou fer konsernan osi lo nou *border*, ki nou'n entansifye nou bann lenspeksyon ki nou fer kot nou *border* menm kot lapos.

Nou 2 *border* prensipal i *airport* avek *seaport*. E osi nou entansifye nou bann travay sirveyans ki nou fer in land.

Parey bann zofisye *Extension*, nou bann zofisye *pest and disease*, kot i al vizit lo kot bann fermye oubyen kot lakour. Me i enportan pou note ki Onorab nou pa pe enporte frisiter. E sa enn i en pti pe pou nou i en pti pe drol ki mannyer in antre.

E letan nou fer nou risk analysis i annan 2 posibilite. *Either* en dimoun in *smuggling* en plant enfeste dan pei, in rod son fason in kasyet. Oubyen *either* in vin par parey mon'n mansyonnen *dirty container* ki enn nou bann *challenge*.

MR SPEAKER

Mersi.

CHIEF BIOSECURITY OFFICER RANDY STRAVENS

Ou lot pwen lo servi *fogging*, ok. Parey Minis ti mansyonnen sa sistenm ki nou'n antre ladan i apel en *Emergency Respond Plan*. E sa i pou ale pou en serten letan, i zis en *quick knock down* pou nou anpes en pe sa popilasyon.

Me parey nou'n dir i annan lezot metod kontrol ki nou pe sey eksplere ki pli tar nou pou entrodwir pou nou anpese ki nou kontinyen avek sa sityasyon *fogging*.

Akoz nou osi nou vreman konsernen ek lanvironnman. Me selman par kont i annan bann lezot *spraying operators* ki nou pe travay ek zot pou nou kapab *come up* avek lezot solisyon pou ede konbat sa sityasyon. Mersi.

MR SPEAKER

Mersi. Onorab Rocky Uranie, ou kapab demann ou kestyon.

HON ROCKY URANIE

Mersi Mr Speaker. Mon kestyon, annefe mon'n fer letour ler mon ti tann nonm sa lo medya. Mon ti fer letour La Digue pou get nou bann pye frisiter.

Ziske prezan mon war nou pye frisiter i ankor *very healthy*, e nou bezwen prezerve. Ou'n koz lo materyo konstriksyon, ki kapab ganny anmennen lo zil

petet i kapab transfer sa *leaf beetle*.

So, ki egzakteman zot pe fer lo Por zot oubyen kot sa bann lakonpannyen konstriksyon? Zot annan konversasyon parey dibwa, eski zot pe *fog* laba? Oubyen zot pe les keksoz pase? Akoz parey nou'n war *whiteflies*, senir plim, al nou war *leaf beetle*.

E i annan dimoun ki pe krwar poudir sa bann zensek i pa vreman zot ki pe fer sa travay. I enn ki vini ki detri sa lot i ale koumsa parey en sig.

E sa *leaf beetle* osi ou a krwar i annan en lot i pou trankil apre pou annan en lot ki pou vin detri li. Mersi.

MR SPEAKER

Ok. Permet li reponn silvouple. Minis, lekel ki pou pran?

MINISTER FLAVIEN JOUBERT

Mersi Mr Speaker. Mersi Onorab. Petet Mr Speaker, mon ti a zis klarifye. Mon pa pe dir ki materyo konstriksyon ki anmenn sa bann pes.

Me selman mon pe dir ki sa bann pes i pa zis ganny anmennen lo fey ouswa lo fri frisiter. I posib ki bann lezot fason anmennen i anmenn sa pes dan en landrwa.

Parey Mr Stravens in fer sorti i posib ki *container* ki sal ouswa container ki'n ganny stoke dan en landrwa ki zensek in antre ladan ki kapab kre problem. E se sa bann senaryo ki nou pe anvizaze osi. I posib ki par egzant lo Mahe, en dimoun i kapab stok keksoz en landrwa, swa en transpor, swa en materyo nenport kwa.

E sa bann zensek i sirkile e zot antre ladan. E letan i ganny transporte la i ganny transmet lo en lot zil. Me alor keksoz ki biosekirite i bezwen fer, mon ava les avek Mr Stravens. Me i vizilans lo por, vizilans lo son bann pwen kot ou pe transport materyo ek tou bann mouvman pe arive, pou ki vreman ou vwar e ou kapab entervenir vitman si ou remark okenn siny lenfestasyon. Mersi.

MR SPEAKER

Mersi. Ou annan keksoz pou azoute Mr Stravens?

CHIEF BIOSECURITY OFFICER RANDY STRAVENS

Minis in mansyonn zis *ok*, vitman pou konsernan fason avan ler ki entrodwir lo bann lezot zil. Zis mazin en ki Biosekirite pa zis responsabilite en lenstitisyon oubyen en lorganizasyon. I responsabilite nou tou, alor mon krwar nou'n

fer bokou program medya lo la.

Mon krwar nou tou nou bezwen pran en responsabilite, menm bann lazans bato, bann lakonpanyen ki pe anvoy *goods* lo Praslin.

Zot osi zot bezwen pran zot responsabilite. Me nou lo nou kote, kot i konsern domestik *surveyance* nou annan nou bann zofisye ki ale *from time to time randomly* i fer bann *check*. Mersi.

MR SPEAKER

Mersi. Bon, an se moman nou pou fer en sanzman zofisye, pou nou kontinyen. Mon a dir mersi bann zofisye ki pe kit nou, e mon a swet zot bon depar. Lkel ki pe kit nou la? Mon krwar Mr Stravens, Mr Nancy e Ms Joubert. Madanm raporter, an menm tan nou ava apel lot zofisye silvouple.

Alor, bonn apre midi e byenveni Mr Shane Emilie *CEO Land Waste Management Agency*. E Ms Christina Dora *Manager pou Land Waste Management Agency*. Mersi pou vin avek nou pou sa 2 kestyon. Nou pou sey pran 2 kestyon dan peryod avan *break*.

Kestyon swivan i ase spesifik, e mon pou demann kestyon e mon pou limit siplemanter lo la. Kestyon

limero 39 dan non Onorab Rocky Uranie silvouple.

HON ROCKY URANIE

Mersi Mr Speaker. Mon kestyon; eski Minis i kapab enform sa Lasanble si i annan nouvo kontra netwayaz oubyen kontra an mwens, ki pou donner sa lannen e konbyen larzan sa i espekte kout Gouvernman? Mersi.

MR SPEAKER

Mersi. Onorab, prezan ki mon pe remark en keksoz, eski ou pe limit ou kestyon pou La Digue oubyen antye an zeneral? *Ok*, Minis nou a sey pran sa kestyon.

MINISTER FLAVIEN JOUBERT

Mersi Mr Speaker. Mersi Onorab pou ou kestyon. Mr Speaker, an rezilta sa dernyen revi ki lazans in fer lo lefikasite kontra netwayaz ek lanbelisman.

Rekomandasyon ki'n sorti se pou redwir lakantite kontra par azout ansanm bann diferan travay ki kapab ganny fer par en kontrakter dan plas plizyer kontrakter dan en sel lokasyon.

Sa linisyativ pou ede amelyor efikasite, e asir alokasyon resours finansyel anliny avek kapasite kontrakter

pou delivre en servis ki lo standar. Lafason ki sa servis in ganny antreprann, bann landrwa ki pa ti tonm anba kontra in osi ganny konsidere dan nouvo kontra.

An se moman lazans pe zer 414 kontra an tou ki enkli 58 kontra pou lanbelisman lo Mahe ek Praslin. 345 kontra pou netwayaz semen, lanmar, lans ek bin lo tou le trwa zil prensipal.

Anba nouvo alokasyon kontra, pou annan 186 kontra an mwens. Fodre note en total 228 kontra pe ganny propoze pou tou le 3 zil prensipal, ki reprezant 19 kontra lo La Digue, 55 kontra lo Praslin e 154 kontra lo Mahe.

Sa bann kontra pou ganny partaze dan 2 kategori, konpare avek 3 kategori an se moman. Sa bann kategori i konm swivan;

- Kategori 1: i kouver netwayaz semen ek *bus shelter*, lans, larivyer ek lanmar e serten toilette piblik.
- Kategori 3: i kouver lanbelisman.

Mr Speaker, mon oule reasir Lasanble ki sa nouvo sanzman pou anmenn plizyer benefis pou Sesel. E osi pou bann kontrakter netwayaz ek

lanbelisman. Sa bann benefis pou *comme suivant*;

- Akonplir en standar pli o nivo ki zwenn bezwen kominote. E rezourd problemn ki nou ep fer fas avek an se moman.
- Tou kontrakter pou pli byen plase pou zer zot kontra finansyerman e evite rod peyman avan ki ler lemwan in fini.
- Pou annan sifizaman travay pou en kontrakter fer pandan fer lemwan e kre lanplwa lo en baz kontinyel pou Seselwa.
- Bann lobligasyon fon pansyon ek taks i ava pli byen ganny respekte.

Bidze ki'n ganny aprouve pou kontra netwayaz ek lanbelisman i reste parey lannen oparavan. E sa i *comme suivant*;

- En sonm R142 milyon 844 mil pou netwayaz semen, bin, *bin site*, lans, larivyer, ek lanmar.
- E en Bidze en sonm R30 milyon 366 mil pou lanbelisman.

Lazans pe travay an kolaborasyon avek Minister Finans, pou fer en seri program sansibilizasyon lo sa nouvo fason *tender* kontra netwayaz ki'n komanse depi yer le 18 e sa

pou ale ziska le 22 Mars pou tou le trwa zil prensipal.

I osi annan lezot partener ki pe partisip dan sa program sansibilizasyon tel ki Fon Pansyon, SRC, e osi Departman Lanplwa. Mersi.

MR SPEAKER

Mersi. Onorab, *yes* ou siplemanter Onorab Uranie.

HON ROCKY URANIE

Mersi Minis. Mon'n tann ou dir ki pou annan kontra an mwens akoz ou pou met ansanm bann serten kontra, ki petet donn en dimoun 2 kontra ansanm fer vin en sel. Me mon oule konnen, bann landrwa kot pa ti pe ganny netwaye avan eski i pou antre prezan la parmi kontra?

E anvi ki zot in dir ki bann kontra pou ganny fer *bidding* pou bann kontra pou ganny fer an Mars. Nou an Mars, eski sa i pou kontinyen an Mars parey ti'n ganny dir? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Avek ou permisyon mon pas laparol avek CEO LWMA pou donn plis detay lo sa proses li menm.

MR SPEAKER

CEO ou annan laparol.

CEO LWMA SHANE EMILIE

Mersi Mr Speaker. Mersi Onorab pou ou kestyon. Parey mon ti donn lenformasyon lannen pase, tou bann lokasyon ki ti anba *one-off*. E bann osi ki ti annan *after care*, in fini fer provizyon anba sa bann nouvo kontra.

E nou'n osi annan diskisyon avek TSS, *Technical Support Section* ki bann kontrakter ki zot kontra in ganny *extended* ziska Mars, pou ganny sa lot *extension* ziska ler nouvo kontra i ganny *rollout* pou 2024, avek bann lannen ki swiv pli tar. Mersi.

MR SPEAKER

Mersi. Mon pou pran 2 siplemanter. Onorab Gill.

HON CHURCHILL GILL

Mersi Mr Speaker. Bonn apre midi Minis. Mon kestyon se dan sa process natirelman i annan bann dimoun ki pa pou gannyen kontra, bann ki deza lo kontra.

Eski sa bann dimoun pou annan okenn lezot peyman an term konpansasyon ki sa bann dimoun pou gannyen, vi ki toultan bann kontra in ganny *extended*, i pa'n re bid. Eski i

annan okenn keksoz dan sa direksyon pou sa bann ki perdi kontra? Mersi.

MR SPEAKER

Mersi. Minis.

**MINISTER FLAVIEN
JOUBERT**

Mersi Mr Speaker. Onorab, mon krwar sa kestyon i konsern i pa konsern perdi kontra, me i konsern kontra ariv lo son lafen. E i ganny terminen parey tou kontra i fini.

Si i annan okenn ka kot en kontra in ganny kase, kot en dimoun i annan en kontra e sa kontra in ganny arete. Byensir la i pou bezwen annan en negosyasyon ant li ek Gouvernman ki ti annan sa kontra avek li.

Me laplipar ka, i pou bann ka kot bann dimoun zot kontra in aktyelman ariv lo son lafen. E letan en kontra i ariv a lafen, nou konnen ki arive sa dimoun i pou bezwen tonm dakor lo komansman kwa ki pou arive a lafen. Letan i ariv a lafen ou bezwen pran bann mezir parey ou ti'n met dan ou dokiman kontra lo komansman.

Alor, si i annan okenn ka kot kontra i ganny kase, sa i en lot ka. Me selman laplipar ditan nou ekspekte ki i pou bann kontra ki'n ariv a lafen son

letan. E alor i napa okenn relasyon ki reste ant sa kontrakter ek sa kliyan. Mersi.

MR SPEAKER

Mersi. Onorab Monthy. Mersi Mr Speaker. Bonn apre midi Minis. Minis, mon'n tann ou koz lo lenplikasyon Fon Pansyon, SRC, avek *Employment* dan sa bann nouvo kontra. Eski sa i nouvo? Oubyen zot ti annan en rol pou zwe dan bann ansyen kontra? Ki mon sipoze si ti annan pa'n tro mars byen.

Akoz i annan kontrakter ki ou pe war i annan zis en travayer e i pa pe kapab delivre. E mwan mon'n koz toultan fortman lo la.

E ki garanti ki ou annan ki lenplikasyon sa 3 lazans pou ede fer ki sa bann kontrakter i mentenir en serten kantite travayer, e donk delivre dapre zot kontra e dapre zot manda dan distrik pou kit distrik prop? Mersi.

MR SPEAKER

Mersi.

**MINISTER FLAVIEN
JOUBERT**

Mersi Mr Speaker. Mon pou zis reponn en pti bout, apre mon pou pas avek Ms Dora lo mon gos. Mr Speaker, mon krwar i

enportan dan tou sa bann ka ki nou kontinyen reste bann dimoun ki pe anploy dimoun ouswa ki pe fer travay kontra zot reste a zour avek tou bann mezir.

Akoz plizyer fwa ou war ki bann kontrakter zot ganny sirpriz letan zot ganny aprozé par tel ou tel lazans. Par egzanz lo kote peyman *Pension Fund* eksetera. E sa i enn bann rezon ki sa bann lorganizasyon pe ganny anmennen boner, pou fer sir ki zot annan tou lenformasyon lo tou bann lenplikasyon ki annan lo zot koman en anplwayer ouswa koman en kontrakter.

E mon a les Ms Dora al en pe plis dan detay kwa egzaktéman ki sak lazans pe fer. E ki nou lekspektasyon lo zot bann sa bann kontra, letan i pran lefe. Mersi.

MR SPEAKER

Mersi.

MANAGER LWMA CHRISTINA DORA

Mersi Mr Speaker. Onorab, pou reponn ou kestyon, wi, sa bann lazans pe travay an partener avek ansanm avek Minister Finans, pou ed tou bann antite ki pe partisip dan sa *coordinated cleaning tender*.

E i annan en seri *meeting* sansibilizasyon ki'n komanse depi yer. Kot nou pe edik bann dimoun ki enterese pou partisip dan *tender* lo bann preparasyon ki zot bezwen fer pou zot kapab sekiriz en kontra.

E *SRC, Pension Fund* i deza on board kot zot osi zot pe vin eksplike. I annan Departman Lanplwa osi, kot zot pe eksplik bann kontrakter ki anvi en kontra pou zot kapab prepar zot.

E zot pe ganny lenformasyon osi lo bann fason ki zot pou fer pou zot kapab anplove. Ouswa si zot travayer i lo *casual*, ki mannyer zot pou pey bann benefis zot bann travayer.

So, zot deza okouran e i pou mandatwar an kontra ki sa bann dimoun i oblize pe onor bann komitman parey dan zot kontra ki pe vini. Mersi.

MR SPEAKER

Klarifikasyon Onorab? Wi.

HON PHILIP MONTHY

Vitman Mr Speaker. Mon vremen apresye sa ki'n ganny dir. Me *issue* se *monitoring* apre, pou fer sir ki sa standar i ganny mentenir. Ki garanti ki pou annan sa *monitoring*, ki sa bann kontrakter pe respekte sa

standar ki ganny met devan zot depi komansman? Mersi.

MR SPEAKER

Mersi.

MINISTER FLAVIEN JOUBERT

Mersi Onorab. Mon a pas avek CEO.

MR SPEAKER

CEO?

CEO LWMA SHANE EMILIE

Mersi pou ou kestyon Onorab. Pou mwan fer resorti ki wi, i annan serten defayans an term *monitoring*, lenspekasyon baze lo bann diferan konplent ki nou'n gannyen pou sa bann letan ki'n pase.

E ki nou'n fer nou lazans, nou'n fer en legzersis kot nou'n vwar ki nou bezwen revwar nou striktir, nou program *inspection*.

Pou le moman nou annan nou apepre 2 lenspekter par rezyon. E par sak rezyon, i annan about 5 a 6 distrik. So, ou kapab mazine pou tou sa bann program en ta travay. So, la deza mon pe travay lo en nouvo striktir kot mon pou annan en *proposal* pou met devan Gouvernman, pou nou anploy en pe plis lenspekter.

Pou nou kapab ranforsi en pe lenspekasyon enn.

An menm tan, dan moman imedya sa program ki nou pe revwar, se ki i pou annan en sistenm kot nou pou travay konzwentman avek enn de nou bann partener parey *Local Government*, ki nou deza komans inisye konversasyon avek zot ki zot pou ed nou osi pou ranforsi en pe lenspekasyon e menm get standar travay dan distrik.

E dan sa nouvo sistenm kontra ler nou pou *rollout*, i pou annan en sistenm *demerit point system* ki pou nepli parey avan ko tou pe war. *First letter*, *second letter* apre i vin son final letter, *ok*.

E la baze lo sa *demerit point system* nou pou kapab annan kriter pou nou evalye performans kontrakter.

E le moman ki nou war i annan *noncompliance and non-performance*, baze lo sa kriter i pou annan bann pwen ki pou ganny *deduct* lo zot total pwen ki zot deza annan orizinalman ler kontra in ganny donner.

E ler pou ariv en serten *average*, la nou pou al dan sa *performance improvement* avek sa kontrakter, pou nou travay avek li avek sipor nou bann *stakeholders* pou donn li sa sipor.

E si i kontinyelman deteryore *overtime*, la son pwen pou redwir e apre la nou kapab pran aksyon kont li finalman. Mersi.

MR SPEAKER

Mersi. Mon pa pou kapab pran 2 kestyon avan *break*. Alor mon a termin avek en dernyen kestyon siplemanter Manm Onorab Esparon.

HON REGINA ESPARON

Mersi Mr Speaker. Mr Speaker, dabor mon oule remerisi *CEO* pou sa bon korperasyon travay ki i annan ek distrik. E parey ou'n dir i annan sa *demerit point system* ki zot pou al en tradwir.

Mon ti a kontan demann li a ki moman ki zot reviz *scope* sa travay sa kontrakter, sirtou ler zot in konstata ki kontrakter in rankontre serten difikilte diran son letan kontra sirtou ki pa son lafot? Mersi.

MR SPEAKER

Mersi. Minis?

MINISTER FLAVIEN JOUBERT

Mr Speaker, mon a pas avek *CEO*. Mersi.

MR SPEAKER

CEO?

CEO LWMA SHANE EMILIE

Mr Speaker, mersi. Onorab mersi pou ou kestyon. Onorab, pandan sa bann letan nou'n war ki wi, i annan pa mal problemm avek sa bann *scope*. Menm ler kontrakter ti ganny zot kontra, e *the fact* ki zot ti ganny sa *lowest value* ki apre nou pe war kontrakter apre i pa'n kapab delivre at some point.

So, la pou le moman la nou'n revwar sa bann *scope* pou nou adres sa bann problemm baze lo *lessons learned*. Baze lo bann leson ki nou'n aprann, pou regarde pou nou kapab aziste ki dan sa *next tender* la, ler nou pou *rollout* bann nouvo kontra tou sa bann problemm ki'n akimile pandan sa bann letan.

Nou pe fer le nesese pou nou adrese ki *at the end of the day* par egzantp i annan aktivite kot son *frequency* ki pe *increase*. Ler mon dir *increase* par egzantp, ler pou anmas salte o bor semen.

Ti annan son frekans kot i ti vreman anba en fwa par zour, kot nou pe war nesese ki dan bann landrwa piblik ki vreman enportan pou gard li prop. Kot frekans pe *improve* bomaten son milye apre midi avek son pli tar dan apre midi.

E osi bann lezot aktivite, par egzant kot nou'n war i bezwen en pe plis leklersisman pou kontrakter konnen ki standar ki nou pe mete, ki materyo ki bezwen ki son grander ki bezwen respekte ek tou bann lezot letap ki annan pou li delivre ladan. Mersi.

MR SPEAKER

Bon, mersi. Nou a pran en poz la e... en pti leklersisman, wi, Onorab?

HON REGINA ESPARON

Zis en pti leklersisman. Mersi CEO pou larepons. Mon ti pe rod en pti larepons. CEO si par egzant sa kontra la parey ou dir, en *housing estate* ti annan li en bin site, prezan in ogmante in met en lot *bin site*.

Eski i annan en lazisteman dan sa, dan menm son *scope* travay? Definitivman i pou ogmante parey ou'n eksplike. Me dan son peyman li menm li eski zot annan en letan ki zot ki revize malgre in siny sa kontra?

MR SPEAKER

Mersi. CEO, ou pou reponn? Onorab Pillay, pa pou ki pe reponn keston silvouple. CEO?

MINISTER **FLAVIEN**
JOUBERT

Mersi Mr Speaker. Mon a pas laparol avek CEO pou donn sa klarifikasyon.

MR SPEAKER

CEO, repons silvouple bref.

CEO LWMA SHANE EMILIE

Mr Speaker, mersi. Onorab mersi pou ou keston. Wi, nou fer provizyon pou nou vwar tousala e regarde ki mannyer nou kapab fer lazistaz.

Me selman la pou mwan fer resorti, kantmenm kontra i an mwens, mon anvii refer resorti ankor ki nou'n fini fer provizyon pou tou bann problem ki'n akimile pandan tou sa bann letan, pou nou fer sir ki bann lokasyon kalite aktivite son frekans i ganny accommodate.

Wi, i pou annan letan kot par egzant si dan distrik i annan bann devlopman kot ou pe met bann nouvo *bin site*, *it's unforeseen* aköz i depan bann devlopman ki arive dan distrik. Nou fer provizyon, e ler nou fer provizyon nou fer bann kalkilasyon.

E nou bezwen met li dan kontra pou nou fer sir ki bin i ganny *emptied* ki nou bezwen fer sir ki bin osi i ganny netwaye, e son zalantour osi i ganny netwaye. I bann keksoz

ki ou napa kontrol lo la sa. Me selman nou'n fini pran kont.

Parey mon'n dir bann leson, parey lazans la i annan son bann *historical data*, i annan son bann pratik. E nou deza annan bann lalis bann diferan letan kot nou bezwen fer provizyon adisyonnèl dan *scope*. Pou okenn bann *eventualities*, bann keksoz ki nou pa'n ganny *communicate* davans pou fer sa provizyon anba la. Mersi.

MR SPEAKER

Mersi. Bon, nou a pran poz la. Nou a rebran kestyon 4er. Mersi. E mersi bann zofisye ki pe fer zot depar. E mon swet zot bonn kontinyasyon.

(BREAK)

MR SPEAKER

Bon, nou a rebran. Nou delegasyon in renouvle. Nou annan Mr Denis Matatiken, Sekreter Prensipal pour Lanvironnman e pour en kestyon. E apre pour lezot kestyon Mr Justin Prosper, Direkter Zeneral pour Climate Change. E Mr Jean-Claude Labrosse, *Principal Climate Adaptation Officer* dan *Climate Change Department*.

Nou pe al kestyon 40 ki dan non Onorab Waven

William. I a ganny demande par Onorab Naddy Zialor.

HON NADDY ZIALOR

Bonn apre midi Mr Speaker. Mersi Mr Speaker. Bonn apre midi Minis e tou dimoun lo *panel*. Kestyon nimerò 40 pour Onorab Waven William i lir koumsa;

Eski Minis pour Lagrikiltir, Lanvironnman, Sanzman Klima e Lenerzi, i kapab eksplik sa Lasanble, si on Minister i an asosyasyon avek lezot pei pou swivre sa 2 fenomenn *geo-engineering* e *ecocide*, pou asire pep Seselwa i azour ek sa bann devlopman? Mersi Mr Speaker.

MR SPEAKER

Mersi Onorab. Bann Manm a note ki nou annan 15 minit apepre pour sak kestyon. Minis, ou repons lo sa enn?

MINISTER

FLAVIEN

JOUBERT

Mersi Mr Speaker. Mersi Onorab pour sa kestyon. Mr Speaker, Minister pe swiv de pre sa bann diskisyon ki pe arive lo nivo enternasyonal lo sa 2 size.

Geo-engineering i en term ki ganny servi globalman pou dekrir bann lentervansyon lo en gran lesel dan sistenm natirel.

Par egzanp pou ranvers bann lefe sanzman klima.

Bann tel entervansyon i enkli teknolozi eksperimantal, parey lamenzman radyasyon soler. Ann Angle i apel *solar radiation management*. Par egzanp fertilizasyon an servan fer – iron, pou retir karbonn dyoksid – dyoksid karbonn dan lanmer.

Me i osi annan bann teknolozi ki konmans egziste ozordi. E ki nou vwar pe konman ganny aplike dan plizyer pei parey *carbon capture and storage (CCS)*.

Mr Speaker, Sesel an se moman pe pran en lapros prekasyon e pe angaz li dan bann – e pa pe angaz li dan bann tel diskisyon aköz bann lenpak advers ki sa bann lentervansyon i kapab annan lo klima, lo biodiversite, lo prodiksyon manze, lo sekirite alimanter. Ensi ki lo bann servis ki ekosistem i met a nou dispozisyon.

Dan 6enm Lasanble Nasyon-z Ini pour Lanvironnman (*UNEA-6*), ki ti ganny fer resaman *Nairobi, La Suisse* ti soumet en *draft* rezolisyon pou met an plas en group diskisyon lo *solar radiation modification*.

Sa rezolisyon pa ti ganny aprouve par plizyer pei, enkli ki

bann pei Lafrik ki ti sizere ki en *precautionary approach* i ganny servi. E aktyelman nou pa merit antre dan sa bann diskisyon e ankouraz aplikasyon sa bann teknolozi.

Dan nou lentervansyon nasyonal, Sesel ti fer kler ki nou pa siport *geo-engineering*. Bokou bann eksper in eksplike ki *geo-engineering* i en distraksyon dan en letan kot lemond i bezwen met an plas mezir serye pou redwir lemision, dyoksid karbonn e lezot gas dan latmosfer.

Sesel i plito siport dekarbonizasyon dan lekonomi. Savedir rediksyon bann sours lenerzi ki servi karbonn avek lenvestisman dan lenerzi renouvlab e sipor adekwa pou permet bann pei an devlopman e bann Pti Leta Zil pou fer progre lo bann zot zefor kot i konsern dekarbonizasyon.

Nou krwar ki plis pei ki pare i merit pare pou zwenn zefor mondyal pou adres emision metann, an vi ki sa i en gas ki annan plis potansyel resofman klima. E ki bann mezir i kapab ganny adrese avek teknolozi aktyel, sirtou dan Lendistri Petrol.

Nou osi promot plis mezir pou protez bann labita, espesyalman lo gran lesel, pour ki zot ed nou adapte avek lefe

sanzman klima. Sesel in deza fer bokou. E nou osi servi sa konman bann fason pou montre bann pei ki annan plis ki pli gran ki nou, ki savedir lanbisyon lo sa bann size.

Pou retourn lo size, si nou okouran bann devlopman? Bann zofisy e i reste azour avek lenformasyon sorti kot bann antite, sirtou Nasyon-z Ini. E nou annan kontak regilye avek bann Anbasader ki swiv bann diskisyon ek bann meeting dan bann diferan parti lemonn. E la nou pe koz par egzamp; *New York, Addis Ababa* e osi *Bruxelles*.

Lo sa size *ecocide*, sa i en term ki ganny servi pou dekrir destriksyon lanatir lo en gran lesel, koze konsyaman par aksyon imen. Bann tel aksyon i enkli destriksyon bann lespes, polisyon lanmer ouswa lezot landrwa. E lezot ankor ki annan lenpak direk e lonterm lo biodiversite lo lanvironnman. Me osi lo lasante imen.

In annan plizyer travay akademik lo sa size. Me ozordi i annan en group apele *Stop Ecocide Foundation*, ki pe travay pou fer *ecocide* ganny rekonnèt konman en krim lo nivo enternasyonal.

Lentansyon se pou fer li vin en senkyenm krim anba ziridiksyon *Rome Statute of the*

International Criminal Court (ICC), ki sa Trete ki etabli sa Lakour e osi en Tribinal Enternasyonal ki annan ziridiksyon pou prosekut bann endividi ki'n komet bann krim, tel parey zenosid, krim lager e krim kont limanite. Sesel nou a rapel i deza en manm sa Trete.

Mr Speaker, *ecocide* i en size ki merit lentere Sesel, aköz i osi annan pou fer avek bann demann ki nou konman en pei nou pe kontinyelman demande pou annan plis lazistis dan bann relasyon mondyal otour size parey klima.

Zil *Vanuatu*, en Pti Leta Zil parey Sesel, in deza donn son sipor sa mouvman. E resaman, Sesel in parmi 132 pei ki'n siport en demann par *Vanuatu* pour en lopinyon konsiltativ. Ann Angle i apel en *advisory opinion* par *International Court of Justice*. Ouswa Lakour Enternasyonal pour Lazistis, lo responsabilite bann leta konsernan sanzman klima.

Lopinyon ki *ICJ* pou donner, byensir pou finalman enfliyans sa deba lo *ecocide*, e lafason ki serten *Act* i ganny vwar lo nivo enternasyonal. Soumisyon par Sesel e par bann lezot Manm ki'n siport sa desizyon, pou ganny fer le 22 Mars.

E Gouvernman atraver Minister Zafer Etranzer pou kontinyen gard li azour lo bann deroulman otour sa size. Mersi Mr Speaker.

MR SPEAKER

Mersi Minis. Onorab Zialor, siplemanter?

HON NADDY ZIALOR

Mersi Mr Speaker. Mersi Minis pour leklersisman e pozisyon si ou le an sa ki konsern sa 2 topik ki ou'n koze an sa ki konsern Sesel.

Ou'n dir ki Sesel pa neserman pe ankouraz *geo-engineering*. Me sepandan nou pe plizoumwen *focus* lo dekarbonizasyon.

Alors, ki bann keksoz konkret ki ou santi baze lo sa bann diferan partnership ou'n koze avek EU avek Nasyon-z Ini, ki pe benefisye Sesel pour nou *attend* sa bi ver dekarbonizasyon?

Dezyenmman, ler ou'n koz lo *ecocide*. Ou konnen, lanvironnman – destriksyon lanvironnman i ganny koze par imen. Sa ou'n fer li resorti byen kler. E Sesel nou annan bann legzanp kot si oule, nou'n vwar bann lenstans kot nou lanvironnman in ganny afekte.

La mon mazin – mon mazin polisyon La Misère. Mon

mazin polisyon lo Praslin. Alors, ou konnan Minister ki responsab, ki bann keksoz ki ou santi konnan en pei, nou manke pou edik nou dimoun vizavi *ecocide*? Mersi.

MR SPEAKER

Mersi. Minis?

MINISTER

FLAVIEN

JOUBERT

Mersi Mr Speaker. Mersi Onorab pour sa 2 pwen. Mon krwar pou konmanse, ou'n demann lo bann benefis ki nou pe kapab gannyen.

Ouswa bann sipor nou kapab gannyen avek bann lorganizasyon ki nou pe asosye avek. Pou dekarbonizasyon nou lekonomi.

Mon a donn ou zis 2. Par egzanp; nou annan sipor ki nou pe gannyen pour lenerzi renouvlab. I annan bann plan ki'n – bann analiz ki'n ganny fer avek sipor bann lorganizasyon parey *International Renewable Agency*.

I annan bann demars ki nou pe fer pou atir lenvestisman dan lenerzi renouvlab Sesel, pour nou kapab annan sorti 5poursan kot nou ete ozordi, pou al 15. E apre 30poursan. Sa i enn.

E i annan en lot proze ki annan pou fer avek *immobility*

ki nou pe fer avek *UNEP*. Ki pou ed nou osi anmenn plis elektrifikasyon parey nou dir, dan nou servis – dan nou bann transportasyon dan pei, pour ki nou annan mwens transpor ki servi *fuel* lo semen.

Me osi mwens – pa zis mwens litalizasyon *fuel*. Me osi mwens polisyon atraver bann emisyon gas ki sorti dan bann transpor ki servi bennzin ouswa dyezel.

Alor nou vwar ki i annan sipor an deor pei. E nou bezwen kontinyen asosye avek sa bann lorganizasyon, pour nou trouv bann sours potansyel sipor pour nou kapab fer ki nou pei i osi avanse.

Me, ti a bon fer remarke Onorab ki nou pei son emisyon i vremen pti, pti en. Nou pa en pei ki emit bokou, me selman kapital nou emisyon i ase eleve aköz nou lo en zil, e nou bezwen kontinyen devlope ekonomikman.

Me selman an total dan son globalite, nou emisyon i vremen, vremen pti, pti. E nou kapab dir insignificant lo nivo mondyal. Me selman, nou koman en pei nou bezwen kontinyen montre legzanp e montre poudir tou pei i bezwen pe fer en zefor dan sa demars.

Kot i konsern *ecocide*, byensir nou bezwen kontinyen

amelyor nou performans lo kote lanvironnman Sesel. I annan en kantite keksoz ki'n arive aköz nou'n devlope. E pa tou ki nou ti annan tou bann lareg pour nou met an plas.

E en keksoz par egzanp Onorab ki enteres bokou dimoun resaman, se sa *ruling* ki'n arive devan Lakour dan sa ka La Misère. Me ti a bon fer rapel ki sa terminoloji ki Lakour in sanze in fer li – in sorti vin “*may*” in fer li vin “*shall*”. Kot i annan en responsabilite Konstitisyonnèl dan Lalwa. I ti ganny entrodwi sa an 2016.

E se bann dimoun ki pe asiz otour latab la, bann dimoun dan Minister ki nou ti fer revè Lalwa ki nou ti entrodwir sa dan Lalwa an 2016 ler nou ti fer revè. I pa en keksoz ki ti la depi lontan.

Alor nou bezwen kontinyen evolye nou Lalwa, evolye nou bann framework ziridik. E fer ki tou bann nouvo previzyon, bann nouvo konsiderasyon i ganny anmenn dan nou bann lareg.

E i annan bokou ki ankor manke Sesel ki nou bezwen fer entrodwir. Ki evantyelman nou kapab servi la, aplik li koman en mezir ki kapab fer ki tou dimoun i *comply* avek bann norm lanvironmantal. Me i pou

pran letan. E fodre nou pa per pour nou evolye.

E parfw sa evolisyon i enplik al devan Lakour osi pour nou ganny bann diferan *ruling*, pour nou fer keksoz avanse. Mersi.

MR SPEAKER

Mersi Minis. Onorab Loze?

HON JOHAN LOZE

Mersi Mr Speaker. Minis, ou'n pran ou en pozisyon kler e for lo sa size *geo-engineering* ouswa parey i osi ganny *connu, climate engineering* oubyen *weather engineering*.

Mon annan en sizesyon; eski i ti pou posib pour ou pozisyon ganny kominike atraver medya klerman ki Sesel i annan li en pozisyon for lo sa size? Akoz Minis, sa size la, i *right up there* ek vaksen li. Mon pa konnen akoz manm lo ou kote in al debous sa bin mwan?

Be selman lo kestyon enzekte souf dan latmosfer, *whitening of ocean clouds, aerosol spraying par jet planes*, bann size *tin foil hat* sa. So, I suggest ki ou pozisyon i ganny kominike klerman. *Thank you, Mr Speaker.*

MR SPEAKER

Mersi. Minis, mon asire ou'n note sa rekomandasyon.

Permet mon a pran en dernyen kestyon avan nou perdi letan. Onorab Pillay?

HON SEBASTIEN PILLAY

Mersi Mr Speaker. So mon'n ekout Minis atantivman e pozisyon son Gouvernman lo sa size, sirtou *ecocide*. E mon ti a kontan klarifye prezan si egzaktaman sa i son pozisyon.

So premye pwen ki mon le fer par egzanz; *regarding the Aldabra Group* kot Asonpsyon i tonbe, i annan *Zone 1*. E anba *MSP, Zone 1* i en landrwa ki sipoze anba proteksyon preski pli signifikan – pli enportan.

Me nou'n vwar resaman, en plan pou devlop Asonpsyon pou fer en nespes *resort 8* zetwal - si ou kapab apel sa. E i pou annan sepa kantite aktivite imen laba. Me selman la ou dan Lasanble ou vin dir nou poudir ou Gouvernman pe pran sa o serye.

So mon kestyon pour ou se; ki mannyer ou met an plas bann mezir, pour ki sa ki ou koman Minister Lanvironnman, nou war pe arive?

Me par kont, dan lot kote, en devloper li i annan drwa fer sa ki i anvi e menm ganny *green-light State House* pou li fer sa.

Lot pwen ki mon le ranforsi sa Mr Speaker, avek ou

permisyon; Lasanble fek pas Trete lo *BBNJ, right?* Nou war en *meeting* arive ant Moris ek Sesel. *Leader* Zafer Gouvernman i pronons son lekor fortman lo *deep sea mining*, e dir pou dir li son pozisyon ki i kont *deep sea mining*. Ki Sesel pa pe pran sa pozisyon.

Me ki nou war *as one-month takeaways from sa meeting?* En *takeaway* sa *meeting*, la mon pou lir sa dan sa lartik Mr Speaker;

“After sea cucumber harvesting, Victoria in Port Louis could consider deep sea mining or petroleum exploration”.

So Mr Speaker, mon bezwen demann Minis; eski Minis i serye ler i vin dir Lasanble, poudir pozisyon ki son Gouvernman pe pran lo *ecocide* i en pozisyon ki i zis li ki pe pran, oubyen i en pozisyon kolektiv Gouvernman?

Akoz zot aksyon pa montre poudir i en pozisyon kolektiv Gouvernman. Mersi Mr Speaker.

MR SPEAKER

Bon, nou a permet Minis reponn. Yes, Minis?

MINISTER **FLAVIEN**
JOUBERT

Mersi Mr Speaker. Mersi Onorab pour sa 2 pwen ki ou'n fer fortman. Mr Speaker, fer en devlopman dan *Zone 1* otour – dan rezyon Aldabra lo zil Asonpsyon, i pa en form *ecocide*. Mon pa pou konsider li konman en form *ecocide* akoz *ecocide* i annan en definisyon ki ase kler.

E fer en devlopman dan ou pei, tou fason tou pei i fer serten keksoz lo son teritwar pour li kapab ed son pep. Malgre i kapab annan serten lenpak, me selman i bezwen fer sir ki tou bann prekosyon i ganny pran.

Alor, nou pa pou kapab melanz sa size *ecocide* avek en devlopman lo zil Asonpsyon. I en desizyon ki'n ganny pran par Leta. E Leta ki'n komit pour li protez sa landrwa anba *Zone 2*. E Leta ki pe fer amenazman son teritwar dan sa landrwa.

E Leta i kapab pronons avek lemond; la, la ki mon'n fer avek sa lespas ki mon ti dir mon proteze. E mon krwar pa si Leta pou retourn an aryer lo en desizyon ki'n fer pou dir be prezan i nepli proteze. Non.

I ava eksplike ki kalite prekosyon in pran, pour li fer sir ki sa bann keksoz ki ti pe prevwar pou arive i osi arive e ki sa proteksyon i kontinyen ganny arive.

Kot i konsern okenn deklarasyon Mr Speaker, sorti lo *Joint Management Area*, mon pa kapab pronons mon lekor lo la akoz i en keksoz ki konzwent. I annan en Komisyon Konzwent ki'n ganny etabli par Sesel ek Moris, e alor mon pa pou kapab – mon napa en ziridiksyon lo sa Komisyon konzwent.

Me, mon pa konnen osi lekel ki'n fer sa deklarasyon. E mon pa kapab fer okenn diskisyon ouswa debat lo sa size. Akoz pa tou bann detay konsernan sa Komisyon Konzwent ki ganny anmennen kot a mon latansyon. Mersi.

MR SPEAKER

Mersi. Nou a bouz lo prosen kestyon, mersi. Onorab Rachel Spiro, kestyon nimer 41?

HON RACHEL SPIRO

Mersi Mr Speaker. Bonn apre midi Minis avek ou delegasyon. Kestyon i koumsa; Swivan sitasyon dezas ki pe kontinyelman frap nou pei, eski Minis i kapab enform sa Lasanble, si Divizyon *DRMD* ek son Minister, pe anvizaze annan en plan mitigasyon pou evite ki sa bann sityasyon i repete e afekte bann zabitan dan sa bann landrwa ki a o risk? Mersi.

MR SPEAKER

Mersi Onorab. Minis?

MINISTER

FLAVIEN

JOUBERT

Mersi Mr Speaker. Mersi Onorab pour ou kestyon. Mr Speaker, Departman *DRMD* – dan kestyon in met *DRDM*. Mon krwar i apel *DRMD*.

MR SPEAKER

DRMD. In korize ler in demann kestyon.

MINISTER

FLAVIEN

JOUBERT

...*DRMD*, i tonm anba Minister Zafer Entern. Alor lenformasyon ki nou pou donner i konsern sa ki nou Minister pe fer. Me mon pa pou kapab koz lo zot par. E mon ti ava petet swete ki letan zot vini zot kapab reponn plis lo zot manda.

Mr Speaker, bann letid ouswa aktivite pou enplimant bann mezir mitigasyon dan labitasyon pou redwir risk bann dezas dan landrwa ki vilnerab, i en travay ki Departman Sanzman Klima ek Lenerzi i fer an kolaborasyon avek *DRMD* e osi lezot antite ki fer letid. E osi ki enplike dan lenplimantasyon.

Lo kote Minister, pli prezizeman Departman

Sanzman Klima ek Lenerzi, i annan bann proze ki'n ganny planifye baze lo bann levennman oubyen bann sityasyon ki'n arive.

E zot asiste lezot antite pou enplimant bann proze pou redwir risk dezans letan lapli i tonbe. E osi degradasyon lakot koze par gro laroul.

I annan en bon pe proze ki sa departman in enplimante e i annan ankor pou enplimante byento lo Mahe, Praslin e La Digue. E nou bann *staff* isi i annan lalis bann proze ki nou pe travay lo la. Ki swa dan bann lanmar, dan bann larivyè e osi lo lakot.

Minister pe osi travay avek lezot antite parey Lotorite Plan, pou ranforsi Lalwa e regilariz bann aktivite lo Mahe, Praslin ek La Digue, pou redwir risk dezans. E ti a bon fer remarke Mr Speaker, ki en bon pe fwa, dezans i annan pou fer avek lafason ki nou planifye nou bann devlopman.

E sa i enportan ki nou met plis lanfaz lo la pour ki nou evite ki en senp lensidan ou swa levennman lapli i pa vin en katastrof dan pei. E ki nou pe planifye pli byen pour nou asire ki bann fasilite, par egzans drenaz ek bann lezot, i vreman kapab *accommodate* sa kantite...ki nou pe annan.

Alor, se sa nou repons. Me mon ti ava swete ki letan bann dimoun *DRMD* i vin isi kot Lasanble, nou a kapab demann zot plis lenformasyon lo zot plan detaye. E osi lo zot bann proze ki zot pe travay lo la dan sa size. Mersi.

MR SPEAKER

Mesi. Siplemanter Onorab Spiro?

HON RACHEL SPIRO

Minis in fer resorti ki serten fwa sa bann sityasyon i arive, baze lo bann devlopman ki ganny fer. Eski Minis letan sa bann sityasyon i arive, eski ou departman i antre pou fer sir ki sa ki nou pe koz mitigasyon, i ganny pran an kont?

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab pour ou pwen siplemanter. Wi Mr Speaker, i annan en kantite lesan ki nou bezwen aprann letan bann lensidan i arive.

E labitid letan i annan bann lensidan parey, mon krwar Onorab in deza travay koman en *DA*, i konn byen. Tou bann Lazans i ralye. E zot fer

manner pour zot adres an premye; lensidan letan in arive li menm ek bann dezas – bann dega ki'n arive.

E apre sa osi nou bezwen travay pou retourn an aryer pour nou vwar lakoz. E fer sir ki nou pa annan en repetisyon bann lensidan. Alor i annan sa nesesite. E nou bann zofisye i bann dimoun ki enplike dan sa bann group.

Zot toultan pe enterakte avek bann diferan Lazans. E zot toultan pe travay lo bann diferan proze pou trouv bann solisyon, pou fer sir ki nou pa annan repetisyon bann lensidan letan i arive. Mersi.

MR SPEAKER

Mersi. Kestyon Onorab Cosgrow?

HON WALLACE COSGROW

Mersi Mr Speaker. Mr Speaker, mon en pti pe dezapwente apre midi. Pa avek Minis son larepons. Me avek lefe ki kestyon i adres lo 2 antite.

E mon ti ava ekspekte ki omwen Direkter Zeneral *DRMD* ti ava la e donn Minis koudmen reponn sa kestyon. Semenn pase Minis *Local Government* i dir mwan Direkter Zeneral *DRMD* i ankor vivan, i byen, i la. Be la nou pa nou pa ni war li.

Be ki manner nou kapab ganny en leklersisman lo sa kestyon, nimerò 41, si en bout sa ki sipoze vin donn larepons, i *nowhere to be found*, i pa la? Me ki manner nou pou kapab ganny larepons?

MR SPEAKER

Be si ou annan en kestyon ou a poz li silvouple.

HON WALLACE COSGROW

Wi, be i dezapwentan akòz mon kestyon ti pou relye avek *DRMD*.

MR SPEAKER

Ok.

HON WALLACE COSGROW

Be selman mon ava sey demann Minis. Petet Minis a kapab reponn mwan. Si i pa kapab reponn mwan, mon pa konnen kan ki nou pou ganny en larepons avek *DRMD*.

Ok, Minis eskize, i pa ou lafot. Me, ou bezwen reponn sa kestyon ki pou vin ver ou Minis, en.

So Minis, ou'n eksplik nou, ki bann demars ki ou pe fer pou *mitigate* bann sityasyon sirtou avek bann lenpak dezas ki nou annan.

Be sa bann demars ki ou pe fer, eski i tonm dan plan *DRMD* pour bann demars

mitigasyon ki annan pou fer avek bann sityasyon dezas?

So, eski i marye avek kwa ki *DRMD* pe fer an term mitigation of bann lenpak dezas letan i annan par egzanz movetan? Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab. Mr Speaker, laplipar bann travay ki nou pe fer nou koman en departman, i annan pou fer ek bann travay ki ti'n prevwar davans.

Par egzanz pou annan bann travay lo lakot, bann landrwa lanmar ek larivyer ki ganny idantifye, bann louvertir ki bezwen ganny *deal* avek. E apre osi i annan bann travay ki vini dapre bann lensidan ki arive ki detanzantan nou bezwen entervenir.

Lazans *LWMA*, Departman Sanzman Klima ek lezot partner zot bezwen pe entervenir toultan, par egzanz pou deblok bann louvertir lanmar pou fer sir delo i pase. E Gouvernman Lokal pe zwe en gran rol dan sa laliny.

Me eski i tonm anliny avek sa ki *DRMD* i sipoze pe fer. *DRMD* son manda i ase *vast* me

i kouver osi bann mitigasyon avek *partners*. E mon krwar sa travay i tonm dan laliny travay ek *partners* pou adres bann problem nasyonal, bann problem imedyat, irzan e osi adres bann problem long term.

Alors mon pa trouv en kontradiksyon ant bann travay ki pe ganny fer ozordi avek Departman Dezas. Me selman parey mon'n dir, ti a byen ki zot ti kapab elabor en pe plis lo bann detay plan travay ki zot annan pou demontre sa *alignment* ki annan ant sa de kote.

Me parey ou'n vwar dan bann ka kot in ariv bann dezas, nou pa'n ganny okenn mankman an term kordinasyon e i pa'n ariv okenn konfli ant bann lazans.

Alor i annan en fason travay ki fer keksoz marse e laplipar bann antite, laplipar bann endividi konpran kwa egzaktaman kwa ki nou sipoze fer pou asire ki bann sityasyon i pa kontinyen arive. Mersi.

MR SPEAKER

Mersi, eski i annan lot kestyon pou *DRMD*? Anvoy kestyon an ekrire.

Onorab Loizeau?

HON NORBERT LOIZEAU

Mersi Mr Speaker. Mr Speaker, petet Minis i a kapab reponn sa kestyon vi ki mannyer mon get sityasyon pe ale, *DRMD* pa la.

Minis, vi ki tou sa bann kalamite ki'n arive, bann dezans in arive plizyer fwa oparavan. La i fer mwan mazin *Felleng* ki ti tape, Anse Aux Pins ti inonde e ziska ozordi nou pa ankor kapab rezourd problem Anse Au Pins.

La Misère mon rapel dan bann lannen 90s an montan kot ti annan deroulman later, kot semenn ti monte. Corgat Estate, *lately* e la dernyerer dan rezyon nor.

Vi ki nou pe koz lo en plan mitigasyon, eski Minis ou kapab dir nou ek Lasanble, ler ou ti antre dan lofis...

MR SPEAKER

Posed lo kestyon silvouple.

HON NORBERT LOIZEAU

Wi, mon bezwen eksplik li pou mwan posed lo kestyon.

MR SPEAKER

Non, be posede. Ou'n pas en kantite letan.

HON NORBERT LOIZEAU

Sirtou *DRMD* petet, si ou kapab reponn. Eski ti annan en plan mitigasyon ki ou ti zwenn la, vi ki ti annan lezot dezans ki'n arive

letan pase letan ou pa ti ankor Minis pou Lanvironnman.

Eski ti annan en plan, eski ou'n zwenn en plan mitigasyon ki petet i a ed ou, ou Minister pou fer enn pli byen pou nou kapab *mitigate* sa bann levennman parey, parey Onorab Spiro pe demande? Mersi.

MR SPEAKER

Mersi Onorab. Minis.

MINISTER

FLAVIEN

JOUBERT

Mersi Mr Speaker. Mersi Onorab pou sa kestyon. Zis pou mwan *être* vreman kler lo sa pwen Mr Speaker. i annan serten plan ki ti la, me selman i annan serten plan ki pa'n la.

Mwan sel keksoz ki mwan mon okouran i la lo mon latab e ki mon ti'n ganny kopi. I annan en plan pou lakot ki ti'n idantifye serten sit pou lakot lo kote lerozyon.

Me i pa pe adres tou bann landrwa ki pe ganny afekte ozordi. Par egzanp Au Cap ki mon konnen Onorab pe demand nou kestyon. I pa ti ladan. Port Glaud i pa ti ladan.

Plizyer landrwa kot i annan bann problem lakot pa ti ladan. E apre osi i annan en lot plan ki depi en pe letan pase, mon krwar dan letan

Felleng, ti'n deza ganny prepare pou adres drenaz dan serten drenaz, apre bann tanpet.

Ti apel..., mon'n bliye mannyer ti apele. Selman ti en plan *flood*, kont *flooding*. Me selman i ase limite dan son lespas e i ti kouver plito sant ek les Mahe. Me i pa ti kouv er tou bann keksoz.

Alors pa tou sa bann landrwa ki'n ganny kouver e byensir i nesese ou met an plas nouvo mezir, nouvo plan pou fer sir ki napa dezas ki kontinyen dan pei. Mersi.

MR SPEAKER

Mersi Minis. Onorab Larue.

HON FLORY LARUE

Mersi Mr Speaker. Mr Speaker, lefe ki dan sa keston Minis in, letan in reponn in koz lo bann devlopman ki pei pe pas atraver anmezir nou bouz devan.

Eski letan bann devlopman i ganny fer, ki apre letan i annan en dezas kot i koz en lenpak lo en lanvironnman. Eski dan plan mitigasyon, Minis i retourn, swa son Minister i retourn kot sa bann dimoun ki'n fer bann miray ek bann lezot konstriksyon pou donn zot en *fine*. Lefe ki zot annan en lefe direk pou koz sa dezas, oubyen pou ede koz sa dezas. Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mr Speaker, en fini i pou difisil. Pa toultan ki ou kapab zis enpoz en penalti lo en dimoun baze lo sa ki ou'n obzerve. I kapab plizyer fakter ki'n fer problem arive. I kapab menm delo ki sorti lo en lot propriyete ki afekte sa enn.

Me selman mon pou dakor avek ou Onorab, ki i nesese pou pran plis mezir pli direk e plis mezir korektiv, ou swa koreksyon dan bann ka kot nou vwar problem in leve akoz serten devlopman ki'n arive.

Ozordi, par egzantp, nou annan en kantite bann ka kot dimoun i fer bann miray, par egzantp dan bann landrwa kot drenaz i sipoze pase. Zot fer li pandan plizyer lannen kot letan i reste sek.

Me letan gro lapli i tonbe e sa bann delo i sey retrouv son landrwa pase, in fini annan devlopman dan son larout e apre la i koz problem.

Mon krwar i devret annan plis mezir pou korize, e menm nou bezwen aksepte ki dan serten ka nou'n bezwen kas e tire serten keksoz dan bann ka parey.

Me selman pou retourn lo ou pwen, kot en *fine*. Nou bezwen fer sir ki lafason ki nou deal avek. Akoz pa toultan ki ou kapab zis senpleman *rule* poudir sa dimoun in fer en for e ou bezwen, me i bezwen sibir kantmenm konsekans bann lenterferans ki in fer dan lanvironnman avek son devlopman ki in fer san okenn konsiltasyon, laplipar ditan. Ouswa san okenn konsey. Mersi.

MR SPEAKER

Mersi. Nou pou avans lo prosen kestyon. Nimero 42, Onorab Egbert Aglae.

HON EGBERT AGLAE

Mersi Mr Speaker. Ankor enn fwa bonn apre midi Minis ek ou *panel*. Kestyon i konm swivan:-

Eski Minis - (*sorry computer* problemn la, enn pti moman).

Eski Minis i kapab dir ek sa Lasanble si sa lannen 2024 proze mitigasyon delo sale lo semen fas a Vilaz Prezidan pou demare? Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab pour ou kestyon. Mr Speaker, sa proze mitigasyon pou anpes delo sale lo semen fas avek Vilaz Prezidan pour demare boner sa lannen 2024 avek en premye faz.

Ki pour konpri ogmantasyon oter sa *existing parapet wall* avek en *bull nose* devan pour ede deflekte ouswa reflekte laroul ki tap ek sa miray.

Plan in fini ganny aprouve e a nenport ki moman prosedir *tender* pour deklanse.

Dezyenm faz i konpri proteksyon an servan ros avek lipye sa miray, sa miray semen. E osi en striktir dan lanmer pour anpes gro laroul ariv ater.

Sa de travay pour annan en lenfliyans lo dinamik sa lakot e alor nou pe fer e evalyasyon pli detaye an servan bann eksper. Enn parmi en eksper etranze.

Nou ekspekte toudmenm ki pli tar sa lannen nou pour dan en pozisyon pour lans dan faz 2 sa proze.

Savedir travay pour protez lipye sa miray. E osi met en striktir pour ralanti laroul ki vin tonm ater ki tap ek semen. Mersi.

MR SPEAKER

Siplemanter Onorab.

HON EGBERT AGLAE

Mersi Minis pour ou larepons. Minis premyerman lo kote finansman anvi ki i annan sa *parapet wall* ki bezwen ganny *elevate*.

Eski finansman pour sorti anba vot *Department Climate Change*, anvi ki annan sa konponan kot *SLTA* pe bezwen tou antre avek sa travay?

E konbyen larzan? Anvi ki dan Bidze i annan 1.58 milyon ki'n ganny mete pour anba ou departman pour sa proze.

E dezyenmman eski osi zot pe konsider anvi ki i annan sa *bend*, ki sa delo i pli *prone* pour li antre akoz i enn pti pe pli *narrow*.

Eski letan zot pe fer sa dezyenm faz kot i konsern lipye sa miray, zot annan lentansyon pour fer sa pti ekstansyon pour retir en pe sa, konmsi ki tro pre ek lakot pour anvoy li enn pti pe pli an deor.

Eski i dan zot plan pour konsider sa ki fer ki semen i ava pli drwat, ki i ava anpese ki i annan sa *bend* ki sa delo i antre? Mersi.

MR SPEAKER

Mersi. Minis?

MINISTER **FLAVIEN**
JOUBERT

Mersi Mr Speaker. Mersi Onorab. Nou kapab konfirman ki i annan finansman anba proze Departman Sanzman Klima 1.3 milyon.

E sa pour ganny servi pour sa proze menm si travay pour ganny sipervize par *SLTA*.

Eski nou pou – nou kapab aranz sa semen li menm ki mannyer i ete pour fer li vin pli drwat. Sa i en keksoz ki letan nou pour fer *design*, letan nou pour get *costing* nou ava gete si i kapab ganny mete dan proze.

Pour lemoman konsiderasyon se pour nou protez sa miray parey i ete. E osi pour protez kont laroul e nou pa konnen ki kantite larzan nou pour bezwen pour fer sa striktir dan lanmer. Mersi.

MR SPEAKER

Wi klarifikasyon silvouple.

HON EGBERT AGLAE

Ok. Minis, mersi. Minis, si ou kapab zis dir ek nou si dan sa totalite sa plan ki pe al komanse in fini ganny *approval Planning* akoz ti annan serten *issue* lannen pase.

Eski *Planning* in tonm dakor lo sa plan ki zot in soumet dan son totalite la mon pe koz ou? Mersi.

MR SPEAKER

Mersi Minis. Briyevman silvouple.

MINISTER FLAVIEN JOUBERT

Mersi Mr Speaker. Avek ou permisyon mon pas ek Mr Prosper ki pe *oversee* bann proze.

MR SPEAKER

Yes Mr Prosper.

DIRECTOR GENERAL FOR CLIMATE CHANGE JUSTIN PROSPER

Bonn apre midi tou dimoun. Mersi Mr Speaker. Mersi Minister e Onorab. Pour sa proze son premye bout, nou – i annan son *approval* ki in vini. E osi son bout ki pour regard son parey Minister pe dir son lipye. Nou ankore pe regard sa opsyon, so sa nou pa'n *submit* akòz nou ankore pe regard ki *the best option*.

E nou pa zis pe fer sa bout la osi, nou pe regard osi bann lezot opsyon, kot osi *offshore* ki pa zis neserman pli pre avek sa bout lo lakot – avek sa miray. Mersi.

MR SPEAKER

Mersi. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mon kestyon pour Minis se an Me 2017, an Me 2017.

Swivan en vizit par Prezidan Faure Port Glaud, sa menm Onorab ki'n anmenn kestyon ti dir ki distrik pour bezwen antreprann en proze pour fer en *water barrier* la dan sa landrwa kot delo ti pe monte.

7an pli tar i anmenn en kestyon. Eski Minis ek *panel* i kapab konfirman, poudir ni Onorab, ni Gouvernman avan pa'n fer nanryen nek apre 2020 ki nouvo Ladministrasyon pe *tackle* sa problem? Mersi.

(APPLAUSE)

MR SPEAKER

Minis. Minis si ou annan en repons. Minis. Si ou annan en repons pour sa kestyon. Si napa pa reponn.

MINISTER FLAVIEN JOUBERT

Mersi Mr Speaker. Mr Speaker sa demars aktyelman i pe ganny – parey nou dir i pe ganny evalye la konmela i pe ganny fer la. E mon pa konnen ki deklarasyon Onorab in fer dan lepase.

Me selman la, la, la ki nou pe travay lo bann demars lo bann detay e bann propozisyon

in fek ganny soumet ek *Planning*. E evalyasyon aktyelman pour fer evalyasyon en pe syantifik e teknik. Aktyelman nou pe al lans li la aktyelman Port Glaud. Mersi.

MR SPEAKER

Mersi. Mersi. Onorab – Onorab Aglae, mon a pran ou pwen apre. Onorab, Onorab Pillay ou annan en kestyon? *Silvouple order!*

HON SEBASTIEN PILLAY

Order! Mersi Mr Speaker. Mr Speaker, ki Minis in donn nou e i annan bann larepons *subsequent* ki pe vini i kler ki sa i bezwen form parti en *mitigation plan* pli larz.

E mon konnen i bezwen *involve CAMS*, me i pa kapab *involve* zis *CAMS* i bezwen *involve DRMD*. So kestyon ki mon annan pour Minis, se eski ou'n annan konsiltasyon ek *DRMD* avan ki ou vin donn larepons pour sa kestyon?

Akoz ler – akoz dapre Minis Rose-Marie Hoareau...

MR SPEAKER

Atann mwan enn pti moman ou pe demann lo mitigasyon lo kestyon avan kwa?

HON SEBASTIEN PILLAY

Yes, lo kestyon Port Glaud. Wi. Lo kestyon Port Glaud...

MR SPEAKER

Lo semen Port Glaud.

HON SEBASTIEN PILLAY

Yes.

MR SPEAKER

Ok.

HON SEBASTIEN PILLAY

Akoz baze – *if* i may baze lo sa ki Minis Rose-Marie Hoareau ti dir nou. *First call of point* ler i ariv en problem dan en distrik se atraver Lotorite Distrik.

Ki li i kontakte *DRDM* ki vin fer *assessment* and then *DRDM* i *coordinate* avek lazans spesifik *which is* Lanvironnman pour li fer. Sa i leka.

E *DRDM* i konpletman *AWOL* partou. Mon pa vwar li. Mon pa konnen kot i ete li. So kestyon ki mwan mon annan pour Minis pour mwan klarifye. Se eski sa i form par en *wider mitigation plan* pour bann lakot?

Annou koz spesifikman Port Glaud, mon pa pour al koz pour bann kestyon ki pe vini. Eski sa i annan - i form parti en travay ki *DRDM* osi in fer. Ki annan bann vizit ki zot in fer, bann konsiltasyon ki *DRMD* osi in kapab fer pour nou kapab

konnen si i en zefor kolektiv, pour anmenn en solisyon pour sa?

E mon le zis dir an pasan ki Mr Speaker ki Port Glaud pour reste US ankor 2025. Mersi.

MR SPEAKER

Minis, ou a adres kestyon silvouple.

MINISTER FLAVIEN JOUBERT

Mersi Mr Speaker. Mr Speaker, parey mon ti eksplike lo komansman mon bann plan ki mon ti zwenn se en *Coastal Management Plan* avek en lot ki annan pou fer avek *flooding*.

Sa travay la i en ekstansyon *Coastal Management Plan* ki ti'n deza, ki'n ariv son ler pour li ganny revize e son ler pour li ganny *updated*. Pour met tou bann nouvo, bann nouvo landrwa ki nou pe koz lo la ozordi ki annan *issue*.

Nou pe koz lo Ile Au Cerf, nou pe koz lo bann sit lo Praslin, nou pe koz en kantite sit lo La Digue, nou pe koz lo Mahe, Au Cap North East Point eksetera.

E sa i en elarzisman *Plan Management* Lakot, ki nou pour bezwen fer aköz sityasyon manner pe vini dan pei.

Alor pour nou sa i en, i pa neserman en keksoz ki nou pe konsilte direktman avek *DRMD*.

Me selman nou pour enform zot aköz nou bezwen enform tou *partner*, bann travay ki annan pour fer. Me selman nou vwar li dan konteks elarzisman plan amenazman lakot, ki bezwen ganny fer pour Sesel anvi nou sityasyon lerozyon lo lakot ki pe arive ozordi. Mersi.

MR SPEAKER

Mersi nou avans lo prosen kestyon 43. Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi tou dimoun. Minis dabor avan mon komanse mon le remerci ou formelman pour nou zoli miray ki ou'n donn nou Anse Gaulette.

(APPLAUSE)

HON FRANCOIS ADELAIDE

Aprè bokou letan ale vini e mon krwar zabitan i satisfè, i dir ou kontinyen sa bon travay. Mon kestyon pour Minis i koumsa:-

Eski Minis responsab pour Lanvironnman e Sanzman Klima i kapab donn detay avek Lasanble lo bann demars ki son

Minister pe fer pour amelyor kondisyon delo monte dan plato Anse a La Mouche? Mersi.

MR SPEAKER

Mersi Onorab. Minis repons.

MINISTER FLAVIEN JOUBERT

Mersi Mr Speaker. Mersi Onorab. Mr Speaker, travay Minister pour amelyor sistenm drenaz pour redwir risk delo monte dan plato Anse la Mouche i an progre.

Sityasyon delo monte Anse la Mouche i enn ki Minister in idantifye koman enn bann rezon *côtière* ki ganny bokou afekte par linondasyon – (pardon).

Anse la Mouche in ganny idantifye koman enn bann rezon *côtière* ganny afekte bokou par linondasyon. E sa i baze lo son *topographie*.

Alor i enportan pour en lentervansyon ki lo en pli gran lesel.

An 2022 ziska 2023 Gouvernman in enplimant 2 proze pour ede redwir risk linondasyon.

An 2022 Minister Transpor lo Later, ti komans en proze drenaz o bor semen ziska kot finisyon semen Santa Maria ziska kot Lekol Lagrikiltir. Ki form parti sa gran proze drenaz

e trotwar dan distrik Baie Lazare.

Dapre dernyen lenformasyon sa porsyon drenaz trotwar Anse la Mouche in konplete e i pe fonksyonnen.

Lannen pase 2023, Gouvernman atraver Lazans Lenfrastriktir ti konstrir en nouvo pon ki konekte sa de bout lanmar Anse la Mouche kot landrwa rezidansyel e kot nouvo lotel.

Sa pon in ogmant kapasite pour desarz plis delo dan letan lapli ki minimiz risk linondasyon.

E nou ava rapel Onorab ki sa pon i tir delo dan *estate* i anmenn li dan sa nouvo louvertir ganny kree kot lotel *Canopy*, ki aktyelman i an konstriksiyon Anse la Mouche.

Sa lannen Departman Sanzman Klima ek Lenerzi in komans en proze pour konstrir en nouvo pon, lo semen segonder *Blue Lagoon*. Ki pour osi ede redwir risk linondasyon kot bann propriyete.

Pour konplimant sa louvraz departman pe al retir sediman. Savedir *desilting* dan sa bout lanmar ki trouve ant semen Santa Maria ek *Blue Lagoon*.

Lot travay ki reste pou fer Lazans Lenfrastriktir pou fer en *survey* dan sa plato Anse la

Mouche, pour vin avek bann lentervansyon apropiye anliny avek devlopman lonterm sa distrik.

Alor plato Anse la Mouche nou konnen i vreman difisil pour kapab zis fer bann proze san kalkile. E i enportan ki nou ganny sa bann lenformasyon pour prezan kapab planifye adisyonnèl mezir dan sa landrwa.

Nou ekspekte ki sa travay anmas lenformasyon i ava konplete sa lannen. Mersi.

MR SPEAKER

Mersi Minis. Siplemanter Onorab.

MINISTER FLAVIEN JOUBERT

Mersi Mr Speaker. Minis mersi pour ou larepons. Mon vreman apresye. I annan - apre nou'n fer nou dernyen vizit, mon krwar 2022 ansanm avek Prezidan ou osi ou ti la.

Nou ti remarke ki *in regards to* sa lanmar la ki sorti parey ou pe dir mwan i sorti *from* lot kote *Canopy* i fer letour ziskan *Blue Lagoon*.

Nou ti vwar detrwa *encroachment* kot bann dimoun, zis zot vini zot vid en *pickup* later, i esper ou ale apre i vid en lot. Ler ou gete poudir

sa lanmar aprezan i tant pour bouse.

E nou trouve ki *enforcement* i en pe rar. E sa i fer ki lespas pour sa lanmar kontinyen fer son travay i ganny konpromize.

E Minis petet ki ou kapab dir sa Lasanble lo si Minister Lanvironnman pe kit son promes pour li re-demark sa balizaz lanmar. E fer sir ki tou *encroachment* ki'n ganny fer lo sa lanmar i ganny retire, pour ki sa delo i sirkile e sa i ava ede pour pez en pa sa problem linondasyon? Sirtou sa bann ki o bor, ki baliz ek sa lanmar. *Thank you.*

MR SPEAKER

Mersi Onorab. Minis?

MINISTER FLAVIEN JOUBERT

Mersi. Mersi Onorab mersi Mr Speaker. Mr Speaker, sa size kot dimoun i *encroach* dousman, dousman lo lanmar i en keksoz en pe ki pe arive partou, partou.

E i pa zis ariv ek bann landrwa ki dimoun pa konnen sa bann size. I annan dimoun ki vreman konnen e zot ganny afekte par bann problem e zot osi kontinyen fer bann aksyon ki evantyelman i fer lanmar bloke. E ou war ki nou tou, tou

bann zabitan dan en sel rezyon i ganny afekte.

Me mon dakor avek Onorab Adelaide ki *enforcement* sirtou parey Onorab Larue ti leve depi boner. Koreksyon i annan en problem. Nou vwar bann problem, nou koz ek bann dimoun lo bann size.

Me apre son, sa mezir pour ou re-korize, remet annord e retourn keksoz *back to* son kondisyon kot ti egziste avan, sa ki nou soufer bokou.

Me nou lo nou kote nou pour bezwen amelyor kalite nou bann dimoun, pour ki zot kapab pourswiv bann *case* parey. Pa tou mezir legal ki kapab ganny aplike dan sa ka konmela.

I annan serten mezir ou kapab servi pour retourn en keksoz dan son leta natirel. Me bokou fwa ou annan sa lenter ek propriyete kot dimoun i dir ou sa mon later, sa mon propriyete mon bezwen *enjoy* li mon osi.

E i annan plizyer, plizyer konfli ki leve ant sa de. Me selman mon krwar ki nou bezwen ranforsi byensir lo bann mezir.

E menm retourn avek bann amannman dan serten Lalwa, pour nou permet pour ki sa bann landrwa i ganny proteze san poursan.

Nou a realize ki bokou bann plato ozordi laplipar bann lanmar in ganny koupe an morso. Olye ki nou annan en lanmar ki sirkile deryer plato. I prezan an bout an bout e sa bann bout i ganny inonde e i napa en louvertir letan nou annan gro lapli.

E se sa parfwa ki kree nou problem, i pa en kestyon prezans lanmar me i en kestyon ki bann lanmar ki'n fini ganny afekte e ki prezan i pa pe zwe son rol koman en landrwa ki pe ed nou avek desarz delo.

Alor i annan en kantite keksoz ki pour fer, me nou bezwen osi annan kouraz pour nou dir ek dimoun nou bezwen *reinstate*.

Bokou fwa nou per poudir ek dimoun nou pe *reinstate*, nou pour retire e mon krwar in ler pour nou fer e met zefor lo sa kote. Mersi.

MR SPEAKER

Mersi Minis. Nou avans lo kestyon 44 Onorab Michel Roucou.

HON MICHEL ROUCOU

Mersi Mr Speaker. Bonn apre midi a tous, bonn apre midi Minis ankor enn fwa. Mr Speaker, mon kestyon i al koumsa.

Eski Minis i kapab donn nou en kontrandi lo travay ki son Minister in fer lo degradasyon lans Ile au Cerf? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab pour ou kestyon. Mr Speaker pour evalye degradasyon lo Ile au Cerf Departman Sanzman Klima ek Lenerzi in konsilte avek en eksper dan sedimantasyon, pour nou kapab konpran rezon deryer sa bann lerozyon ki pe arive.

Letid in konplete e nou pe travay avek lofis Onorab pour nou kapab organiz en *meeting* avek bann zabitan pour fer zot - donn zot lenformasyon lo sityasyon aktyel.

E osi pour gid zot lo bann pratik ki zot kapab enplimante lo bann propriyete devan lakot, pour redwir lakantite lerozyon ki pe arive devan zot propriyete.

E la Mr Speaker, mon ti a kontan an rekonnèt zefor ki Onorab pe fer pour li vreman kontinyen ale vini avek bann dimoun Ile au Cerf, pour kapab konsilte avek zot, e trouv solisyon pour sa problem ki

nou konnen i en keksoz ki pour kontinyen dan *long term*.

Nou konnen ki Ile au Cerf parfwa i en pe annan difikilte pour nou ganny en *venue* ki aproprye pour tou dimoun ki reste lo sa zil.

Enn bann opsyon ki nou'n kapab gannye, se pour servi lasapel koman en landrwa rankont.

E nou pe anvizaze ki nou pour fer sa rankont boner an Avril e ki nou ava osi kapab trouv en pe resours, pour ede dan bann travay ki nou pou fer lo Ile au Cerf pli tar dan lannen. Mersi Mr Speaker.

MR SPEAKER

Mersi. Siplemanter Onorab Roucou.

HON MICHEL ROUCOU

Wi Mr Speaker. Annefe Minis, zis pour lenformasyon manm piblik ki pe ekout nou, ki Ile au Cerf i tonm dan distrik Mont Fleuri. Enn parmi bann pli zoli distrik lo Mahé, dan Sesel an antye.

Minis, ou dir se ki *meeting* nou pour fer li an Avril. E ki i annan - travay in ganny fer ki aprezan mon kestyon i se ki pour fer sir poudir bann plan ki zot pour vin avek ki marse pour bann zabitan.

E ki ou bann travayer ki ava la pour donn bann zabitan laba plis gidans lo sa travay. Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Wi Mr Speaker nou pour prezant bann evalyasyon ki'n ganny fer. Me osi nou pour prezant bann solisyon ki'n ganny propoze pour kapab redwir lerozyon lo bann diferan propriyete.

E i pour enplik travay ki kapab ganny fer par bann propriyeter e osi ki petet serten kontribisyon ki nou kapab fer koman Gouvernman.

Me mon krwar i enportan osi pour nou fer remarke ki Ile au Cerf i annan plizyer pratik ki nou ti a kontan osi bann rezidan i travay avek nou lo la.

Par egzanp letan mannyer nou netway lans, sa i enfliyans kantite lerozyon ki nou gannyen lo bor lans e nou retir vezetasyon.

Alor tou sa bann keksoz pour ganny prezante e apre nou pour tonm dakor lo travay e lafason ki pe ganny fer. E lafason ki nou pe kolabore osi ant bann rezidan. Mersi.

MR SPEAKER

Mersi Minis. Onorab Loze.

HON JOHAN LOZE

Mersi Mr Speaker. Minis, mon kontan pou vwar ki i annan de Manm lo ou kote ki'n remerisi ou pour ou travay. E Onorab Michel Roucou in enn ant sa de Manm akoz tou Minis ki vini dan Lasanble i ganny felisite, i ganny aplodi.

Be ou i annan en litani kestyon problem ki'n ganny balanse lo ou, sorti lo ou prop kote. Enn ler mon krwar ou pe ganny *set up* pour fel Minis.

(comments off-mic)

MR SPEAKER

Order! Wi Onorab Loze.

HON JOHAN LOZE

Ah ok, Mr Speaker. Deputy Speaker avek Onorab Larue..

MR SPEAKER

Wi Onorab Loze si ou annan en kestyon poze.

HON JOHAN LOZE

Mersi Mr Speaker. (Tande Mr Speaker mannyer i malelve Onorab Larue). Mr Speaker mon kestyon pour Minis. Eski sa *issue* Ile au Cerf i lokalize pour Ile au Cerf an partikilye?

Kot i annan - mon pa konnen si mon kapab servi sa mo lenterferans imen or ouswa zis senpleman labitasyon.

Oubyen i pe ganny vwar lo bann lezot zil dan sa group e partikilyerman bann ki napa lenterferans imen. Mersi Mr Speaker.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mr Speaker, Lazans *Parks and Gardens* zot fer bann verifikasyon regilye lo bann lakot dan zot landrwa ki zot pe travay ladan. E zot enform nou ki i annan levidans lerozyon en pe partou dan bann landrwa, menm kot ou napa prezans imen.

Me selman Ile au Cerf nou pe donn li latansyon aköz sa bann lenfrastruktir ki pe menase, bann propriyete ki pe ganny menase, e bann aktivite ekonomik ki nou konnen i kapab ganny afekte severman par sa bann kalite aktivite.

Alor pour nou Ile au Cerf i en landrwa kot nou merit pe donn latansyon e non pa zis Mahé, menm si Ile au Cerf napa en lespas ki piblik.

Laplipar bann propriyete ouswa tou bann propriyete

prive. Me nou osi bezwen kapab ed bann zabitan e trouv solisyon pour zot osi, letan zot annan bann problem.

Me zis pour konfirman ki problem lerozyon i eparpiye partou. Me nou bezwen priyoritiz li baze lo son lenpak potansyel ki kapab annan sirtou pour bann aktivite ki enportan, bann aktivite ekonomik, bann diferan zabitan dan pei. Mersi.

MR SPEAKER

Mersi. Nou ava avans lo prosen kestyon numero 45, Onorab Philip Arissol.

HON PHILIP ARISSOL

Mersi Mr Speaker. Mersi Mr Speaker. Bonn apre midi tou dimoun. Minis mon kestyon i lir koumsa:-

Eski Minis i kapab dir Lasanble, si Gouvernman pe konsider pran okenn mezir pou diminyen risk lerozyon kot rezidan ki reste o bor larivyer e o bor lanmar, e an menm tan pou anpes plis domaz koze par linondasyon dan sa bann zone vilnerab? Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab. Mr Speaker wi Gouvernman pe deza pran diferan mezir pour redwir risk linondasyon ek lerozyon o bor bann lanmar ek larivyer dan bann rezyon, ki Onorab pe koz lo la.

Aktivite i varye i enkli konstriksyon miray, *rock-armoring*, retir sediman dan lanmar e larivyer.

E enplimant bann mezir metod natirel pour protez bann landrwa rezidansyel par egzantp baraz avek later *bunding*.

E osi plant vezetasyon pour stabiliz bann zone ki annan risk degradasyon.

Swivan bann proze ki'n ganny fer pour redwir risk linondasyon ek lerozyon dan bann landrwa rezidansyel.

Swivan i bann proze ki'n ganny fer pour redwir sa risk linondasyon ek lerozyon dan bann landrwa rezidansyel e osi lo lakot dan distrik Anse Boileau:-

Konstriksyon miray kot lanmar *lower* Anse Louis, *rock armoring*.

Retir sediman dan lanmar ek larivyer Anse Louis, Montagne Posee kot *Bahai Center*, e osi deryer kordgard.

Anse Boileau in osi benefisye avek en seri proze enplimante par Lazans

Lenfrastriktir avek lentrodiksyon *Flood Free Seychelles* an 2012, depi kot laplenn ziskan kot lekol segonder.

E Lazans Lenfrastriktir i fek termin proze pour deblok sa pasaz delo kot lekol segonder e kot masin desalinasyon pour ede ki delo i desarz pli byen pandan gro lapli.

I annan ankor lezot travay ki Minister pe fer avek lezot lazans ek departman. Par egzantp Lenfrastriktir, Departman Lagrikiltir. Par egzantp retir sediman dan lanmar.

Bonne Espoir pre kot lafanmir Malvina, sa pe ganny fer.

Dan lanmar ki konnekte avek Riviere Neuf Mille, sa bann travay pe ganny fer, retir *sediment*.

E dan larivyer Hermitage, e dan larivyer Montagne Posee pre kot rezidans Jeremie.

E osi deblokman lanbousir e netwayaz larivyer ek lanmar pe kontinyen. E sa pe ganny fer par lazans *LWMA*.

Mr Speaker, en lot travay ki merit ganny fer Anse Boileau se en *survey topographie* dan plato Anse Boileau, pour determin bann lentervansyon lonterm. E sa travay pour

ganny fer par Lazans Lenfrastriktir.

Me sa lannen Lazans Lenfrastriktir pour enplimant 2 *survey, topographie* parey mon'n enformen. Enn pour fer Anse la Mouche e lot pe fer Anse aux Pins.

E apre letan sa travay i a konplete dan sa de landrwa. bann travay *topographie* i a bouze, i ava vin osi, i ava kouver osi Anse Boileau. Mersi bokou.

MR SPEAKER

Mersi Minis. Siplemanter Onorab.

HON PHILIP ARISSOL

Mersi Mr Speaker. Eski Minis i kapab dir Lasanble, ki fason son Minister in planifye kolabor avek Lotorite lokal e kominoter pour aplik solisyon dirab pour anpes, pour protez rezidan e bann rezyon ki pli a risk? Mersi.

MR SPEAKER

Mersi. Enn pti pe konfize, akoz i sanble egzaktaman parey ou kestyon orizinal. Minis ou annan nouvo detay pour azoute.

MINISTER FLAVIEN JOUBERT

Ok. Mersi Mr Speaker. Mr Speaker nou lapros se pour nou kontinyelman reste an kontak

avek Departman - Minister Gouvernman Lokal.

Me osi regilyerman pour nou al vwar sa bann landrwa e nou bann zofisye i al konstat lo teren ki mannyer keksoz i ete pour nou kapab an mezir nou ale evolue nou plan.

Parey ou konnen bann problemn lo *site* i kontinyen sanze detanzantan. E nou bezwen reste azour avek lenformasyon bann ki sorti kot bann *DAs* ek bann dimoun dan kominote.

Alors sa i en travay kontinyel kot nou bann zofisye i kontinyen konsilte. E i annan en group ki apel *Flood Free Seychelles*.

Kot bokou lenformasyon i ganny anmennen ladan e dan sa group plizyer antite sakenn i swazir son morso dapre so responsabilite. Pour li pran sa bann travay met ansanm e fer li vin en proze pour nou kapab rezourd problemn.

Alor i annan, i annan en travay kontinyel ki i ganny fer avek Gouvernman Lokal e mon poudir ki ziskan konmela bann travay avek bann *DAs* i pe mars tre byen.

E i annan en gran langazman par distrik pour fer sir ki nou vwar solisyon pour bann zabitan dan plizyer rezyon

kot zot pe ganny afekte par linondasyon. Mersi.

MR SPEAKER

Mersi. Kestyon Onorab Larue.

HON FLORY LARUE

Mersi Mr Speaker. Mr Speaker, lefe ki Minis i dir i annan en relasyon etrwat, eski kekfwa zot annan en travay en pe pli detaye pour fer?

Lefe ki annan en kantite devlopman ki pe ganny fer e bann dimoun ki avan sa in donn lotorizasyon pour fer kek *runoff* avek lanmar lo zot later, i vwar ki letan lezot konstriksyon i ganny fer pli o ouswa lezot devlopman.

Sa lotorizasyon ki zot ti donn petet 15 an, 20 an pase, sa konstriksyon nepli pe deservi sa ki zot ti anvi fer.

So eski kekfwa zot annan en letid pour zot retourn kot bann zabitan ki zot, zot lakaz *direkteman* lo sa *drain*. Ki prezan letan i annan gro lapli, ou vwar ki letan sa delo i desann i antre anndan kot zot ouswa anba zot lavarang akoz i tro pre. Lefe ki Gouvernman menm ki'n fer sa bann devlopman. Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Onorab, mon krwar i merit annan en bann verifikasyon pli an detay lo bann devlopman mannyer i arive dan pei.

E sirtou la kot nou vwar en kantite landrwa kot i dansite devlopman e dimoun pe sey servi *maximum* zot later. I annan serten devlopman i telman ki nou vwar nou avek en kantite problem.

E i neser pour nou fer sa bann evalyasyon pour nou kapab vreman konstate kwa ki nou bezwen fer koman bann entervansyon *long term*.

Parey mon'n dir pli boner, i annan serten landrwa kot nou pour bezwen menm konsider serten mezir en pe pli ekstrenm, kot serten striktir pour bezwen ganny bouze, aziste. E kot nou kapab koriz sityasyon e fer ki keksoz i fonksyonnen pour ki nou pa ganny okenn dezaz.

Me i annan en lot keksoz osi ki mon'n lev sa avek bann *staff* ki mon krwar i enportan e nou amelyore. E sa se dan nou evalyasyon ki nou fer ozordi an term *planning*, e an term lanvironnman letan bann propozisyon devlopman i vin devan nou.

Nou bezwen get sa bann propozisyon dan son an antye

koman devlopman dan en *zone* e non pa zis en devlopman izole lo li menm. Akoz bokou fwa se sa ki arive, nou get li koman en ka izole. Me apre ler nou met li tou ansanm nou vwar ki annan lenpak enn lo lot.

E ozordi nou pe vwar rezilta sa bann keksoz kot en senp pti lapli, i kree en kantite problemn dan kominote.

Alor i annan, i annan sa bezwen pour en letid e mon krwar sa mesaz in arive kot bann dimoun, kot *Planning* par egzanz nou'n koz lo la.

E mon krwar i enportan ki prezan nou met li an mars e nou aktyelman fer sa bann evalyasyon. E nou vin avek bann rekomandasyon pour diferan *zone* ki mannyer nou kapab dan en fason konpreansiv adres drenaz dan pei. Mersi.

MR SPEAKER

Mersi. Onorab Pillay ou annan en kestyon?

HON SEBASTIEN PILLAY

Mersi Mr Speaker. Mr Speaker, kestyon i demande pour anpes plis domaz koze par linondasyon dan sa bann *zone* vilnerab.

Mon ti a kontan ganny en konpran la. Si en dimoun i fer son lakaz o bor en lanmar, pa i

vin ek en lekspektasyon ki ler lanmar pou plen ou pour ganny sa problemn.

So konbyen sa bann *zone* vilnerab an kestyon ki nou pe koz lo la Mr Speaker? E ki Gouvernman pe fer pour anpese ki bann gran devloper i afekte bann lanmar lo rezyon lakot?

E ki par deryer sa problemn ki zot in kree lo sa bann lanmar i al refoul lo bann dimoun par deryer. Par egzanz nou'n vwar polisyon dan ki *Cheval Blanc* in fer Prezidan ti pe sey eksplike.

Konmsi ki ou Minister pe fer pour defann lenterer sitwayen an sa ki konsern bann *wetlands* Sesel?

Dan lepase nou ti vwar bann group vremen aktiv avan. Parey *Preserve Seychelles* ozordi nou pa tann zot ditou. So mon ti a kontan konnen ki ou Minister pe fer? Mersi Mr Speaker.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Onorab *Cheval Blanc* mon pa tro krwar poudir i pe afekte lanmar pour koz okenn problemn, pour okenn rezidan o bor aköz

Cheval Blanc i preski li tousel kot i ete.

Me selman *ok* ou'n lev sa pwen polisyon kot *Cheval Blanc* e konmsi *Cheval Blanc* letan i vin la in polye lanmar. Me sa lanmar ti pe ganny polye.

So si sa lanmar ti pe ganny polye depi ler sa lotel avan ti egziste nou bezwen aksepté poudir i ti ganny polye e nou'n remarke poudir i ganny polye me nou bezwen korize letan en nouvo proze i vini.

Me selman fodre nou fer sir ki nou pa, nou pa zis dir bann keksoz aköz nou'n vwar li la devan nou. Me sa bann keksoz ti la, e sa polisyon i pa en keksoz ki fek aparet la letan sa nouvo devloper in pran sa *site*. Sa i kler sa.

So i annan serten keksoz ki nou bezwen pran li dan son konteks egzakt. Me kot i konsern lenpak bann devlopman lo bann *zone*, bann *zone* a risk.

Mon krwar i enportan ki dimoun i konpran poudir nou pe konstrir dan bann *zone* risk, i pour annan lenpak lo nou. Me selman nou bezwen pran serten prekasyon. I annan bokou dimoun par egzantp ki *Planning* i dir zot, zot bezwen fer en fondasyon ki annan en serten oter.

E bokou pa fer sa, zot *save* petet, zot pa pran konsey e zot pa krwar dan sa konsey. Me apre letan problem i arive nou vwar nou pe kriye ki Gouvernman pour fer.

Me bokou fwa dimoun i merit pran konsey letan ou ganny dir sa *zone* i kapab inonde ziska 2 met oter. Ti a bon si letan ou fer ou lakaz, ou lev li a en oter, ou fer peron mont anler dan ou lakaz e ou pa kit li aplat ater, ki apre ou pour kriye in inonde.

Alor mon krwar i enportan ki bann dimoun i konnen poudir zot pe travay dan bann *zone*. Zot pe konstrir dan bann *zone* risk, i enportan ki lenformasyon i ganny pase avek zot.

Me i enportan ki dimoun osi i vin responsab lo son kote. E Gouvernman li i bezwen fer son bout kot i konsern deblokaz, anpese ki annan akimilasyon delo eksetera. Me selman Gouvernman pa pour kapab fer tou.

Dimoun pour bezwen pran zot responsabilite e konpran poudir zot pe konstrir dan en landrwa ki potansyelman i pour annan serten lenpak dan lavi sa devlopman li menm ki zot pe fer.

Me ek bann – ou'n osi nonm bann gro devloper ki nou

pe fer pour anpes ki bann gro devloper i annan lenpak lo drenaz. Bokou bann gro devlopman Onorab mon krwar ou a remarke ki zot pe investir bokou, zot ganny demande pour investir bokou lo bann size parey drenaz, lo lespas zot devlopman.

E menm si nou pa kontan, parfwa nou pa kontan vwar zot la. Be selman pa toultan ki zot ki annan tou tor. Parfwa i bann keksoz ki nou fer dan nou kominote fodre nou osi nou aksepte ki dan nou kominote nou fer keksoz ki kree problemn.

E nou pa kapab zis met tou blanm lo bann gro devloper. Mersi.

MR SPEAKER

Mersi. Nou a pran *Question Without Notice* Onorab Regina Esparon. Onorab.

HON REGINA ESPARON

Mersi Mr Speaker. Mr Speaker, keston i dir koumsa:-

Eski Minis i kapab dir Lasanble ki demars irzan ki son Minister pe fer pour rezourd ou *mitigate* sa sityasyon inondasyon e lanmar bloke dan plato North East Point, avek bi pou rezourd bann problemn ki pe kontinyelman afekte zabitan

sa landrwa sak fwa ki i annan gro lapli? Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab pour keston. Mr Speaker pour adres sa sityasyon North East Point i annan en plan ki'n ganny devlope pour adres sa sityasyon.

Lentervansyon mazer i pour ogmant, i pou enkli ogmant sirkilasyon avek desarz sorti kot sa lanmar e osi ogmant kapasite pour retenir delo dan letan gro lapli.

E sa i annan de pwen prensipal, de morso prensipal. Enn se en drenaz ek pon ki pour konnekte avek lanmar pre kot *Rehab Centre* ki pour koup semen *main road* e desarz dan lanmer.

Sa striktir pour ede redwir risk linondasyon lo bann propriyete ki trouve pros avek *Rehab Centre*, sirtou bann ki'n konplent resaman dan bann ka letan nou ganny gro lapli.

Dezyenm solisyon se pour konstri en pon pour ranplas sa vye tiyo kirmol ki akote, ki pros avek Lopital North East Point. E sa pour permet koneksyon ant

sa de kote lanmar e fer ki delo i kapab pli byen sirkile e pli byen desarze dan bann louvertir ki egziste.

Desen in fini ganny fer pour sa de striktir. Malerezman Minister pa ankor ganny sours finansman pour enplimant sa de proze.

Minister i an diskisyon pour ganny finansman pour sa de lentervansyon avek Minister Finans dan Bidze, ouswa atraver bann lezot proze. Kot nou kapab trouv en sours finansman.

Antretan Minister atraver Departman Sanzman Klima e osi Lazans *LWMA* pe kontinyen zot travay mentenans lo bann lanbousir, debloke.

E osi netwayaz bann larivyer ek lanmar lo kote North East Point pour asire ki nou annan en *minimum* desarz a toultan.

E ki nou pa ganny bann problemn kot bann debri i blok bann louvertir ki nou konnen ozordi i pa sifizan. Mersi.

MR SPEAKER

Siplemanter Onorab Esparon?

HON REGINA ESPARON

Mersi Mr Speaker. Mr Speaker, eski Minis i kapab dir nou anvi ki dan sa landrwa parey in dir i annan deza sa problemn kot

kontrakter ki pe netway sa lanmar la, pa pe kapab fini fer sa travay.

Parski sa volim travay ki annan pour fer. Ler sa kontrakter ti ganny donnen sa lanmar pa ti ankor fer sa proze *EBA* e apre sa proze *EBA* nou'n vwar ki sirfas sa lanmar in ogmant konsiderableman, ki fer ki sa volim travay ki annan pou fer i pa pe kapab fini.

Ler i fer dan nor, dan sid in fini ganny bann *invasive plant* e sa ki fer ki lanmar pa toultan ki pe *flow* fasilman.

E Mr Speaker, epi nou'n vwar osi kot sa, i annan sa *V-sump* devan, devan ki desarz delo dan bokou fwa i ganny bloke. I ganny bloke avek debri i ganny bloke avek bann disab li menm li ki monte ki bous lagel sa desarz laba.

Eski dan sa plan ki zot pe fer pour fer sa *culvert* la kot *rehab*, zot pe menm mazin pour met li par lao nivo delo. Pour fer ki letan sa disab i monte lanmer plen, i pa bloke pour nou vwar nou dan menm sityasyon? Sa i enn.

E dezyenmman Minis; mon pa konnen ki dan imedyat la ki nou pour fer parski letan sa problemn lanmar i monte i vremen afekte bann dimoun ki reste dan plato.

E mon pran loportinite pour mwan senpatiz avek bann ki'n ganny afekte semenn pase, avek sa problemn delo monte.

Eski nou pa kapab regarde kote nou kapab *divert* en *fund* pour nou kapab fer sa louvraz?

I annan en 3 milyon anba *Climate Change*, pour en *Carana drain*. Mon pa konnen si petet nou ti kapab komans avek sa, sey *divert* sa pour benefis bann dimoun dan plato North East Point.

Regarde ki mannyer nou kapab komans rezourd sa problemn. Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab. Mon krwar Onorab in lev en bon pwen. Nou ava get dan nou Bidze. E nou ava trouve si larzan pa'n ganny *allocate* pour okenn proze nou a servi li pour nou amelyor sityasyon North East Point.

Me osi nou annan en sa revi ki ganny fer milye lannen, *Mid-year Review*, e si i annan bann larzan ki, par egzantp pour lezot proze ki an deor nou Minister ki pa'n ganny servi, petet nou kapab osi reservi li

pour sa enn proze pour rezourd sityasyon North East Point.

Mr Speaker, avek ou permisyon mon ava pas laparol avek Mr Labrosse Jean-Claude pour li koz enn pti pe lo kontrakter, travay ki kontrakter pe fer ek son bann limitasyon.

E osi lo *V-sump* ki bann solisyon pour asire ki i pa reste bloke toultan. Mersi.

MR SPEAKER

Mersi Minis. Mr Labrosse, ou annan laparol.

PRINCIPAL JEAN-CLAUDE LABROSSE

Mersi Minis. Mersi Mr Speaker, mersi Onorab pour ou kestyon. Onorab nou okouran sa sityasyon ki sa kontrakter pe rankontre.

Dernyerman nou'n zwenn avek *LWMA* pour nou rezourd sityasyon. I annan lenstan kot nou'n menm fer sa ki nou apel bann *one-off* pour nou kapab rezourd sityasyon dan limedya.

E nou ankor pe travay avek *LWMA* pour kontinyen vwar ki mannyer nou kapab asiste sa kontrakter, pour li kapab si oule fer en louvraz ki ase efikas. E ki anmenn rannman pour bann zabitan North East Point.

Nou konnen atraver sa ki lanmar in agrandi avek sa

travay *EBA* ki'n ganny fer. Me toutfwa nou konnen poudir dan sa Kontra osi nou'n deza fer provizyon pour nou ogmant si oule son reveni ki i gannyen pour nou kapab si oule rod adisyonnèl *workforce* pour li kapab desarz son responsabilite.

E si ou regarde an se moman i annan amelyorasyon ki'n ganny fer e nou tre satisfè. Tou dernyerman ti annan en kontrakter ki ti pe fer en travay adisyonnèl ki'n ede osi pour redwir presyon ki li sa kontrakter i ti pe gannyen pour li *maintain*.

E mon asire ki si *LWMA* taler dan son lentervansyon pour probableman, in koz lo bann nouvo Kontra ki pour vini, ki pour reganny distribye. E bann landrwa pour *être* si oule pli byen aporsyonnen pour ki bann kontrakter i annan kapasite pour delivre lo sa oter.

Lo kote *V-sump* nou'n fer en reparasyon lo *V-sump* tou dernyerman. E in kout Gouvernman a pepre R60 mil pour nou refer sa laport ki li ki ti'n kase e i ti pe anmenn en kantite disab, menm ziskan lot kote semen parey ou'n deza vwar e in repare.

An se moman i pe fonksyonnen byen, anefe mon ti fek laba *weekend* pase dan

letan gro lapli. I pe fonksyonnen byen e i pe tir maksimonm delo dan letan lapli. E nou osi annan sa *culvert* o bor li ki i pe *maintain*.

Nou an kolaborasyon avek *LWMA* dan lafason ki deblokman lanmar i ganny fer. I *mean* deblokman lanbousir, pour ki son *timing* i byen, i bon pour ki i kapab tir *maximum* delo letan lapli pa pe tonbe oubyen sirtou letan mare i ba pour ki i kapab retir *maximum* delo. E evite pour ki letan lanmer i plen, e lapli pe tonbe ou annan en kantite delo deryer.

So tou sa bann keksoz nou pe fer, pour ki i amelyorasyon. E nou ankor pe sirvey sityasyon tre pre pour ki letan lapli i tonbe nou kapab *action* lo sa bann, si oule sa bann keksoz pour ki i evite ki bann dimoun North East Point dan plato i ganny afekte sitan. Mersi.

MR SPEAKER

Mersi Mr Labrosse. Bon, nou a termin sa sesyon kestasyon la. Mon remerisye Minis e son delegasyon pour zot partisipasyon.

E mon swet zot bon depar e bonn kontinyasyon. Mersi bann Manm pour zot kestasyon. Lasanble a *adjourn* e nou a

repran demen *matin* 9er.
Adjourn.

(ADJOURNMENT)

